

Wedau Mark



The Gospel of Mark in the Wedau Language of Papua New Guinea

Wedau Mark

The Gospel of Mark in the Wedau Language of Papua New Guinea

Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 11 Nov 2022 from source files dated 9 Oct 2020
aa19f3e3-98fb-51fa-9c53-3906edc75f11

Contents

Mark	1
Apasol	35
Psalm - Wela ma Pari	85

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana ega ita riweta. Wate tauviararamana e ririwa da Mark i girumi. Mark, lamna ega Apasol, wate tauviararamana magamaagai i notai da tauna, Peter maiteni au Rome i mae. Ma Peter, Iesu ana kaua ma ana viararamana magamaagai Mark i riwei. Anina ma Mark wei riwana i girumi da tauvitumagana au Rome ita aramanei, Iesu aiwai i kauai.

Riwa karena i girugirumia e viviegeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kaua magamaagai ita kauai. Wei kauai tana inainai maranai: e viviararamana; ma arua-apoapoei e viviaagana-opunei; ma rava doridoriai e vivilawani; ma go'apoapoe e notanota tawanei. Mark, Iesu ana nola ma ana kaua i girumi ma ega ana viararamana ita girumaguratei. Mark i viegeta menanare Iesu au korosi i rage da rava anatapui ita vilawanai ma God menanare, Iesu iraalei i vovaimairini.

John Taubabataito, Iesu ana aninae i vovokaukauei

(Matthew 3:1-12; Luke 3:1-18; John 1:19-28)

¹ Wei lamna Iesu Keriso Messiah God natuna Riwana Aiaina karena.

² Wariağa peroveta Isaiah i girugirumia nanare:

“Ona rautaniġane! Au peroveta au naom ana paritawanei

da am aninae ina vokauei.”

(Malakai 3:1)

³ ✧ *“Peroveta au mutulua e viviġoreġore:*

‘Taumi BADA ana aninae ona vokauei,

ana eta ona vovai-jijimani!”

(Isaiah 40:3)

⁴ Ma taupariverena John i nei au mutulua da rava i bababataitoi ma God riwana i jimejimei i pa, “Ami go'apoapoe ona voterei, ma ona mae-taviremi God awarina ma ami go'apoapoe ina nota-tawanei ma ana babataitoimi.”

⁵ Ma rava anatapui Judea au paratana ma au Jerusalem i nae da John ita rautaniġane. Maranai ai go'apoapoe i rupeni, John, tau i babataitoi au waira Jordan.

⁶ Ma John, kamel aparana metametanana i oteoteni ma ana tairoro gamogamo opina. Ana lam kapau ma manigewa. ⁷ Ma tauna, rava i ririwei i pa, “Rava au muriu e nenei i getelara, ega me tau. Ega tagotagogiu da ana ae uma guravana ana rupeni. ⁸ Tau wairei a babataitoimi, wate tauna, Arua Vivivireinei ina babataitoimi.”

John, Iesu i babataitoi

(Matthew 3:13-17; Luke 3:21-22)

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi. ¹⁰ Ma maranai Iesu wairei i gegetai, i nana da mara i wanatawanei ma Arua Vivivireina me gabubu i ġairai.

¹¹ ✧ Ma God ponana marei i opu ma i riwa i pa, “Tam, tau natu au nuavaina ma u vinuaiainiu.”

Satan, Iesu i raelari

(Matthew 4:1-11; Luke 4:1-13)

¹² Ma lamna au murina God Aruana Vivivireina Iesu i paritawanana-opunei au mutulua. ¹³ Ma au pom 40 au mutulua i mae. Ma Satan, tauna i raelari. Ġamoġamo ġaiġaiawai nai au dobuna i mamae ma God ana anela marei tauna i paini.

Iesu, lebalebaġai ruaġa ma ruaġa i raukwatuei

(Matthew 4:12-22)

¹⁴ Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei. ¹⁵ Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo’apoapoena ona rupeni ma ona mae-tavirem ma Riwana Aiaina ona vitumaġaneil!”

¹⁶ Mara tagogi Iesu Galili topana au gerana i bababara nae. Ma lebalebaġai ruaġa i ’nanai, Simon* ma ana tevera Andrew au topa i rarauagida. ¹⁷ Iesu i riwei i pa, “Ona nei ma ona votaġotaġoiu. Ma me marina iana o tutuarui; nanare, ana viararamanimi da rava ona tuarui da ina vitumaġaneul!”

¹⁸ Ma maratogogi ai agida i voterei ma Iesu i votaġotaġoi. ¹⁹ Ma tau i gera i verau-nae. Iesu, Zebedi natunatuna i ’nanai, James ma John ai au waga ai agida wanawanarorona i vokaukauei. ²⁰ Ma maratagogi tau i ġorei, “Taumi ona nei ma ona votaġotaġoiul!” Ma taui amai Zebedi† ana taunola maiteni i voterei ma Iesu i votaġotaġoi.

Iesu, arua-apoapoena rava awarina i viaġaġana-opunei

(Luke 4:31-37)

²¹ Iesu ana Tauvotaġotaġo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei. ²² Tauna ana rewapanana i viararamana eġa me mai Jew ai tarawatu babadai § nanare. Ma taurautaniġana ana viararamana i baiei.

²³ Maranai Iesu pari au numana i viviararamana ma oroto arua-apoapoena orana i rui ruinia i garara ²⁴ i pa, “Iesu Nasaretei, aiwai e ġoeġoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

²⁵ Ma Iesu riwa bagibaginei i riwei i pa, “Ma genuana! Nai orotona ma opu-tawaneil!”

²⁶ Ma arua-apoapoena orotona i viaikwajiei ma ponana i rata, i garara ma i opu-tawanei. ²⁷ Ma rava anatapui i bana-kauei ma tau i vitarapiri, “Wei aiwai? Wei viararamana vouna ma ana rewapana maiteni! Wei ravana awarina rewapana e mamae da arua-apoapoena i riwei ma tauna i vovoteletelei!” ²⁸ Iesu nolana, maratagogi i tua Galili au anatapuna.

Iesu, rava maġamaġaui i vilawani

(Matthew 8:14-17; Luke 4:38-41)

²⁹ Nai marana pari numana i opu-tawanei ma ana tauvotaġotaġo maiteni i nae Simon ma Andrew ai au numa. James ma John maiteni i nae.

³⁰ Simon poiana wavinena ini ġuġurana ana au animatave i matamatave ma maranai Iesu i ġeta ma numa ravai, tauna i pariverei. ³¹ Tauna

* 1:16: Wavana ġelauna Peter † 1:20: Eng. Zebedi. ‡ 1:21: Eng. Capernaum. § 1:22: Wariaġa BADA, ana Tarawatu Moses i verei mai Israel aubai.

i nae wavine awarina, nimana i vojijini ma i voagui da i vomairi. Lamna maranaina, ini ġuġurana i voterei ma wavinena, tau i paini.

³² Ma au bigai madeġa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.* ³³ Ma rava anatapui nai au melagaina i vitagogiei numa au metaetana. ³⁴ Ma Iesu, maġamaġgai ai doria nununai i vilawani ma arua-apoapoe maġamaġgai rava awari i viaġaġana-opunei. Ma arua-apoapoena i aramanei da tauna anina God natuna ma lamna aubaina tau i viġaei da i genuana.†

Iesu au Galili i raugugula nae

(Luke 4:42-44)

³⁵ Ubaubana boiboġi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari. ³⁶ Muriai, Simon ana rava maiteni i nae da i baiei. ³⁷ Ma maranai Iesu i nelaġai, ma i riwei i pa, “Rava anatapui e baibaieim.”

³⁸ Iesu i paribelei i pa, “Tana nae taon ġelau i ġereġere, ma kampa maiteni God Riwana Aiaina ana raugugulei. Tau wei lamna aubaina a nei.” ³⁹ Ma Galili au anatapuna i naeni ma pari au numai i raraugugula ma arua-apoapoei i viopuni.

Iesu, oroto opi dorianana i vilawani

(Matthew 8:1-4; Luke 5:12-16)

⁴⁰ Anina ma rava awarina opi dorianana, i nei Iesu awarina ma au naona i peu ma i raudune ma agu i vibaġei i pa, “Mepa da ma ġoei, anina da ma viaiainiu.‡”

⁴¹ Ma Iesu nuabola orana i oai ma urana i viloloi da i vodadani ma i riwa i pa, “Anina a ġoeġoei, ma aii!” ⁴² Ma maratogogi opi-dorianana, oroto i voterei ma tauna i aii me. ⁴³ Anina ma Iesu i riwana-guratei i pa, ⁴⁴ “Tam ma nae! Aiiwai i tuputupua awarim, eġa rava ma vieġei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauai da ina vimataira tau awari! Pirisi pulo tauapuina ana vianina ina verei da tam u lawana.”

⁴⁵ Wate orotona i nae ma aiiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa eġa rava ita mamaelana kampa i nae. Wate rava mepa maemaei i nei Iesu awarina.

2

Iesu, oroto gwaġagwaġana i vilawani

(Matthew 9:1-8; Luke 5:17-26)

¹ Iesu ana tauvotaġotaġo maiteni i wanavira-melei au Capeniam. Ma au pom ruaġa au murina, rava nolana i nonori da tauna i nememei au melagai. ² Ma rava maġamaġgai i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana

* **1:32:** Madeġa ina neulai au murina anona lauvitau ana mara damona. Mai Jew ai lauvitau ana mara au Friday madeġa e neneulai au murina e vivikarei da Saturday madeġa e neneulai au murina e vorovorovei. † **1:34:** Iesu i aramanei, mepa da ita kauai da arua-apoapoei ita riwa da tauna Keriso; lamna rava tauna ita eġari da sorodia ita vibadei ma ta viġavia, me tau i vivinua-notenotei nanare. Jhn 6:15 ma inana. ‡ **1:40:** Mai Jew ai Tarawatu e ririwa da rava lepeleperai, tau mirimirai me dobu ġela ravai - Jentail. Mai Jew amapo nai ravai eġa ina vodadani. Rava mirimirai eġa maiteni ina vitaparoro bo au melagai ina mae. Lamna aubaina mepa da rava mirimirana i lawana, tauna ina ai-me, God tauna ina vaimeli ma rava maiteni ina mae ma ina taparoro.

i raraugugulei. ³ Nelara ruağa ma ruağa, oroto gwağagwağana rasirasiei i avarai da i neiai Iesu awarina. ⁴ Rava i mağa guratana ma eğa tagotagogina da ita neiai Iesu awarina, lamna aubaina da tetelei i amğaena da au poewa ma gavogavo i bauni ma kampa gwağagwağana ana rasirasina i tere-ğairei Iesu au naona. ⁵ Ma Iesu, nai ravai i 'nanai da ai vitumağana i rata, lamna aubaina gwağagwağana i riwei i pa, "Natu, am ġo'apoapoei, a nota-tawanei."

⁶ Anina mai Jew ai tarawatu babadai ġelau i kiakiala, au orai i vinua-notanota i pa, ⁷ "God ainelana ġo'apoapoei e notanota tawanei. Aiwai aubaina wei ravana nanare e bababani? Tauna, God e vivijiboği ma e ririwa da tauna, God nanare."

⁸ Maratagogi, Iesu Aruanei ai nota i vaia ma i riwei i pa, "Aiwai aubaina wei kauai o vivinua-notenotei? ⁹ Metauna i telatela: ġwağagwağana ata riwei, 'Am ġo'apoapoe a nota-tawanei.' Bo ata riwei, 'Ma vomairi, am animatave ma vaia ma ma babara?' ¹⁰ A ġoei da taumi ona aramanei da Rava Natuna au dobu ana rewapana e mamae da rava ai ġo'apoapoe ina nota-tawanei ma ina vilawani." Ma gwağagwağana i riwei i pa ¹¹ "A riwem, ma vomairi, am animatave ma vaia ma ma nae au numa!"

¹² Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, "Tauai eğa melanai kaua wenanare ata inanai!"

Iesu, Levi i kwatuei

(Matthew 9:9-13; Luke 5:27-32)

¹³ Iesu, Capeniam i voterei ma Galili topana au gerana i bababara ana tauvotağotağō maiteni. Ma patara i nei awarina ma tauna God riwana viararamanana i vikarei. ¹⁴ Ma i verau-nae aburuna ma Apius* natuna Levi i 'nanai, ana bagibagi au gabuna i kiakiala ma *tax* i tamitami Rome gabemanina aubaina. Iesu i riwei i pa, "Ma votağotağoiu!" Levi i vomairi ma i votağotağoi.

¹⁵ *Tax* tautami ma ġo'apoapoei ravai mağamağau, Iesu ma ana tauvotağotağō i votağotağoi. Ma anatapui, Levi ana au numa i kiala gogona ma i amam.† ¹⁶ Tarawatu Babadai ġelau lamna Pharisi, ma tau i 'nanai da Iesu *tax* tautami ma ġo'apoapoe ravai maiteni i amam. Anina ma Iesu ana tauvotağotağō i riwei i pa, "Aiwai aubaina Iesu *tax* tautami ma ġo'apoapoei ravai maiteni e amam?"

¹⁷ Ma maranai Iesu wei riwana i nononori ma tau i riwei i pa, "Rava lawalawai, doketa eğa ita goeğoei ma rava doridoriai, doketa e goeğoei. Tau a nei ġo'apoapoei ravai aubai ma eğa rava jijimani aubai."

Uji vitaraviravirana

(Matthew 9:14-17; Luke 5:33-39)

¹⁸ Mara tagogi, John Taubabataito ma Pharisi ai tauvotağotağō i ujiuji. Ma rava ġelau i nei Iesu awarina ma i vitara-virevirei, "Aiwai aubaina John Taubabataito ma Pharisi ai tauvotağotağō e ujiuji, wate tam am tauvotağotağō eğa ita ujiuji?"

¹⁹ Iesu i paribelei i pa, "Taumi o notanotai da tau aiavoi i raukwatuei tavine ana au torela, ina mae lota bo? Eğateni kaua! Maranai tavitavine

* **2:14:** Eng. Alphaeus. † **2:15:** Moses, BADA ana Tarawatu i girumi ma mai Pharisi wei Tarawatuna i votağotağō-kauei. Ma tau kaua waduboi amamai ġariei maiteni i vovoteletelei ma i riwa da aiavoi Tarawatu eğa ita voteletelei lamna tau rava apoapoei, ġo'apoapoe tau kauai.

vou orotona, tau i maiteni e mamae, tau i eġa ina uġi. ²⁰ Wate mara ina ġeta maranai tavitavine vou orotona ina vaitawanei ma lamna maranaina ana rava ina uġi.”

²¹ Ma riwa e mamae, “*Tau kaua vouna a neiai eġa me taumi ami kaua wadubona nanare.* Eġa aiai ravana, gara vounei gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata. ²² Ma nanare, eġa aiai *wine* vouna ina vaini da *wine* aniterenana wadubona ġamoġamo opinei au orana ina iwaġi. Mepa da ina kauēi, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni[†]. Wate *wine* vouna, anina da *wine* aniterenana vouna au orana ina iwaġi.”

Iesu ana riwa Sabat aubaina
(Matthew 12:1-8; Luke 6:1-5)

²³ Mara tagogi au Sabat, Iesu ana tauvotaġotaġo maiteni, witi wapuna au orana i nenaē. Ma ana tauvotaġotaġo witi rovei i vaini ma i amam. ²⁴ Pharisi ġelau i 'nanai wei kauana i kaukauēi ma tau i Iesu i riwei, “Ma inana i, ata Tarawatu e mamae da Sabat, lamna lauvitau ana mara. Aiwai aubaina tau i vovobagibagi?”

²⁵ Iesu i paribelei i pa, “Me peroveta i girugirimia nanare. David ana tauvotaġotaġo maiteni am-iraġe ma aiwai i kauēi? Taumi o iavi ma aiwai aubaina anona, eġa ota vinua-notenotei? ²⁶ *Pirisi Ġeġetelarana Abiathar ana au mara, David, God ana au numa i rui ma palawa vovivirana i vaia ma ġelau ana tauvotaġotaġo maiteni i verei da i ani. Moses ana Tarawatu e mamae da pirisi ava palawana e aniani.”

²⁷ Ma Iesu ana riwa au damona i riwa i pa, “God, Sabat i kauēi da rava voaguna aubaina ma eġa rava ita kauēi Sabat voaguna aubaina. ²⁸ Ona vinuanotenotei, tau Rava Natuna, lamna aubaina tau anina Sabat badana.”

3

Iesu, Orotu urana irairāġena i vilawani
(Matthew 12:9-14; Luke 6:6-11)

¹ Mara ġelauna au Sabat, Iesu i naeme au pari numana ma oroto urana irairāġena i 'nanai kampa i kiakiala. ² Ma Pharisi ġelau i ġoei da aiwaiei Iesu ita viwavui. Lamna aubaina i 'nana-taġotaġoi da oroto ita vilawani bo eġa au Sabat. ³ Ma Iesu, orotona i riwei, “Ma nei, au naoi ma mairi!” ⁴ Ma Iesu, ravai i vitara-virevirei i pa, “Sabat au marana, metauna i aii: Aiaina tana kauēi bo apoapoena? Tana vilawana bo tana virāġena? Tarawatu aiwai i riwei?” Ma anapui i genuana. ⁵ Iesu ana amloġaiġaina i 'nana viravira ma i 'nanai da tau i orai i bado ma nuanuana i bola-kauēi. Ma orotona i riwei i pa, “Uram ma viloloi!” Ma i viloloi ma i lawana. ⁶ Ma Pharisi maratagogi i opu ma i nae Herod ana rava awarii* ma ai oga i tarai da Iesu mena ita virāġenanei.

Iesu, Patara awari i babani

[†] **2:22:** Wine e tuputupua ma puropurona wine ana aniterenana ina viasisikikai [☆] **2:26:** 1Sa 21:1-6 * **3:6:** Herod ana rava anona lamna mai Jew ai boru, tau i aiavo i Rome gabemanina i vovoagui. Tau i ai bada wavalatona Herod Antipas. Mai Jew maġamaġau ma mai Pharisi maiteni, i notai da Herod ana rava tau i tauvibenabenam ai rava au oiena awarii.

7-8 Iesu ana tauvotaḡotaḡo maiteni, tau i netawanei ma i nae au gera da ita vilauvitau; ma mai Galili patara ḡaeḡaena i votaḡotaḡo. Rava maḡamaḡai, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ḡelau waira Jordan taon au babagelauna, Taia taon ma Sidon taon,† tau i anatapui i nei Iesu awarina. 9-10 ✱Iesu, rava maḡamaḡai i vilawani. Ma lamna aubaina doridoriai maḡamaḡai i viviamdudu ma i ḡoei da tauna ita vodadani. Lamna aubaina ana tauvotaḡotaḡo i riwei da waga i vokaukauei. 11 Maranai, arua-apoapoei rava au orai maemaei, Iesu i 'nanai ma au naona i peu ma i garara, “Tam God Natuna!” 12 Ma Iesu tau i viḡaei da avena ita vieḡa da tauna aiai.

Iesu ana Apasol 12 i vinei

(Matthew 10:1-4; Luke 6:12-16)

13 Anina ma Iesu i ḡae au ola ma ana ḡoanei nanare, rava i kwatuei da awarina i ḡei. 14 Tauna, nelara 12 i vinei da maiteni ita mae ma muriai ita paritawanei da ita raugugula. Ma i ḡorei Apasol. 15 Ma i vovai-virewapani da arua-apoapoei rava au orai ina viopuni.

16 Tau i vinevinei 12 ai wava wenanare,

Simon i ḡoreḡoreia Peter†

17 ma Zebedi§ natuna James ma ana tevera John i ḡorei Boaneges, anona waiparara natunatuna,

18 Andrew,

Philip,

Batolomeo,*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

19 ma Judas Iskariotei; * tauna, Iesu tauvibenabenameina.

Rava i riwa da arua-apoapoei Iesu e vivibadei.

(Matthew 12:22-32; Luke 11:14-23; 12:10)

20 Ma Iesu ana tauvotaḡotaḡo maiteni i rui au numa. Ma patara i rieiai da tau i eḡa tagotagogina da ita am. 21 Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

22 Tarawatu babadai ḡelau i Jerusalemei i nei ma i riwa i pa, “Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni.”

23 Lamna aubaina Iesu, wei Babadai i ḡorei ma awanainei i pa, “Satan amapo Satan eḡa ina viopuni. 24 Mepa da dobu ravai ina viḡavia vivira, lamna dobuna ita mae ava. 25 Ma nanare dam ina viḡavia vivira, nai damna ita mae ava. 26 Ma Satan ita vomairi ma ita viḡaviana-melei, amapo

† 3:7-8: Eng. Tyre & Sidon. Wei ravana eḡa mai Jew. ✱ 3:9-10: Mrk 4:1 ‡ 3:16: Anona Gaima. § 3:17: Eng. Zebedi. * 3:18: Eng. Batolomeo. † 3:18: Eng. Alphaeus. ‡ 3:18: Wavana ḡelauna Judas - Luk 6:16 § 3:18: Anona lamna tau i mai Jew ma tau i Rome e viviḡaviei. * 3:19: Iskariot, lamna Judas ana melagai wavana da auna lamna Iskariotei. † 3:22: Eng. Beelzebub. Anona lamna, nabugara ai bada.

ita mae ava. ²⁷ Taudanene amapo eġa rava virewapanana ana au numa ina danene, eġa da au naona ravana ġuravei ina raġini ma muriai ina danene. ²⁸ Riwa kaua a ririwemi da God ami ġo'apoapoei ma ami vijiboġa anatapu i ina nota-tawanei. ²⁹ Wate ai ai da Arua Vivivireina e vivijibogi, God, nai ravana ana ġo'apoapoei eġa melanai ina nota-tawanei ma ana ġo'apoapoei ina mae-nonoa." ³⁰ Iesu wenanare i babani, aubaina rava ġelaui e ririwa, "Iesu au orana arua-apoapoei e mamae."†

Iesu ana dam oina

(Matthew 12:46-50; Luke 8:19-21)

³¹ Iesu alona ma varevareina i nei ma au doa i maimairi ma riwa i paritawanei Iesu awarina da ita nei. ³² Ma patara Iesu i kiala kwaviviroi, ma taupariverena i riwei i pa, "Alom ma novunovum ma varevareim au doa ma e ġoġoem."

³³ Iesu i paribelei i pa, "Ai ai alou ma aiavoi varevareiu?" ³⁴ Anina ma tau i kiakiala i 'nanai ma i riwa i pa, "Ona inana! Wei tau i alou ma varevareiu. ³⁵ Ai ai God ana ġoana e kaukauei, tauna alou ma novu ma vareiu."

4

Doa tapuna ma tapuna ai awanaina

(Matthew 13:1-9; Luke 8:4-8)

¹ Iesu, giu i raukarena-melei Galili topana au adana. Ma patara i riei da ita rautaniġane. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

² Ma kaua maġamaġaui awanainei i giu ma i viararamana i pa, ³ "Ona rautaniġana! Taupaewa, ana wapu i vokaukauei ma pei i ravi awawari. ⁴ Pei ġelaui au eta i peu. Ma kiu i ġeta ma i ani. ⁵ Ma pei ġelaui doa au ġaiġaimana i peu, doa au avavana. Ma lamna aubaina maratagogi i gogo. ⁶ Wate maranai madeġa i rarani, maratagogi i poi, anona warami eġa ita ġaira guratana doa au orana. ⁷ Pei ġelaui, modu donadonai au poui i peu. Ma modu donadonai i gogo ma pei i gogogo i lavani, ma eġa ita ua. ⁸ Ma pei ġelaui doa au aiaina i peu ma i gogo kaua ma i ua, ġelaui 30, ġelaui 60 ma ġelaui 100."

⁹ Ma Iesu i riwa i pa, "Mepa da taniġami e mamae, riwa ona nonori!"

Aiwai aubaina Iesu awanainei i babani

(Matthew 13:10-17; Luke 8:9-10)

¹⁰ Maranai Iesu ainelana i mamae ma ana tauvotaġotaġo 12 ma tau-rautaniġana ġelaui i ġeta ma Iesu i vibaġai da awanaina anona ita riwei.

¹¹ Ma Iesu i paribelei i pa, "God ana vigulau ana kaua mamae go-vaġana; taumi i vieġemi ma rava au tano maemaei, tau i aiwai anatapu i awanainei e paripari-verei. ¹² Lamna ana kau i da wariġa peroveta aiwai i girugirumia ina tupua:

"Tau i ina inana ma eġa ita inainanai.

Tau i e rautaniġana ma eġa ita araramanei;
ma lamna aubaina tau i eġa ita nenei God awarina

da ai ġo'apoapoei ita notatawanei."

(Isaiah 6:9-10)

† 3:30: Tarawatu tau girumi i parivaijijgei aubaina tau i ririwa da Arua Vivivireina ana nola lamna baravu da parauma. BADA eġa melanai ai ġo'apoapoei ina nota-tawanei.

Doa tapuna ma tapuna anoi.

(Matthew 13:18-23; Luke 8:11-15)

¹³ Anina ma Iesu i riwei i pa, “Wei awanainei a babani ma anona eġa ota aramanei bo? Ma awanaina ġelau menanare ona aramananei? ¹⁴ Taupaewa, God riwana, rava anatapui e paripari-verei. ¹⁵ Rava ġelau orai i bagibagi me etanai. Riwa au tepana e rauraei, wate maratagogi Satan e nenei da riwa rava au orai e vaivai-tawanei. ¹⁶ Ma rava ġelau orai me doa viġaigaimana. Tau, riwa i nonori ma maratagogi ana nuaiaii riwa e vaivaia. ¹⁷ Wate warami eġa da eġa ita mamae guratana. Ma maranai nuabola bo rau-iviapoapoe e nenei tau awari, aubaina tau ai tumaġana God awarina e tereterei. Tau maratagogi e peupeu. ¹⁸ Rava ġelau orai me pei, modu donadonai au orai e gogogolana. Tau anina riwa e nononori. ¹⁹ Wate lawana ai nuabola ma mane ai nuavainana ma kaua ġelau ai au nuaiai e ruirui ma God riwana e lavalavani da eġa ita uaua. ²⁰ Ma ġelau, tau me pei doa au aiaina i peu. Tau, lamna anina riwa e nononori ma e vaivai-kauei ma e uaua: ġelau 30 ma ġelau 60 ma ġelau 100.”

²¹ Iesu i riwei i pa, “Rava, eġa rampa ita neinei dai iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa? ²² Kaua mamae govaġai, anataputapui a vieġai ma kaua govagovaġai nanarena ana vieġai. ²³ Mepa da taniġami e mamae, riwa ona nonori!”

²⁴ Iesu i riwa i pa, “Aiwai o nononoria ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi. ²⁵ Lamna aubaina, mepa da riwau ona aramanei, tau ġelauna ma ġelauna ana veremi. Ma tau eġa ita aramanei, lamna aiwai aburuna i nononoria, ina vine-boai.”

Pei gogogona ana awanaina.

²⁶ Iesu e ririwa i pa, “God ana vigulau me rava, witi peina au doa ita ravi-awawari. ²⁷ Ma waguvara e matamatave ma maratomi e vovomairi ma pei e gogogo ma e rarata. Wate aiwaiei e gogogo, tauna e vivinuanainei. ²⁸ Doa ana nuaina, pei me witi e vivigogoi ma e uaua. Au naona e raurapairei ma muriai e roverove ma muriai anona e magumagura au tapina. ²⁹ Maranai i magura, rava petona e raraukarei. Tuaruta marana i ġetai.”

Pei aburuoina ana awanaina

(Matthew 13:31-32, 34; Luke 13:18-19)

³⁰ Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi? ³¹ Wenanare, wei aina peina, lamna me gaga peina, pei aburuoina au dobu ma au doa i paewi. ³² Ma peina i gogo ma i rata da ai muomuoi i ġetawanei ma raġaraġai ġaeġae i terei ma au ġoui, kiu ai noġi ita voai.”

³³ Ma Iesu, awanaina maġamaġai, rava au matai i raugugulei da tau ai rau-taniġana ana au ruva nanare. ³⁴ Awanainei, rava awari i ġiugiu, wate ana tauvotaġotaġo ava awari kaua anatapui i vivieġai.

Iesu, kojikojira i ravi-daumorai

(Matthew 8:23-27; Luke 8:22-25)

³⁵ Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.” ³⁶ Anina ma tau patara i voterei. Ma anatapui Iesu, maiteni au waga i geru ma i damana, waga ġelau maiteni. ³⁷⁻³⁸ Iesu, waga au murina unutana i terei ma i raunuavuru. Ma kojikojira ġaeġaena i tupua

ma rabama, waga au tepana i rauraei ma waira, waga i oaoi. Ma ana tauvotaḡotaḡo, tauna i ravi-dagudagui ma i riwei i pa, “Taugiu, nuanuam e bolabolai bo eḡa da tana iraḡe?”

³⁹ Ma tauna i vomairi ma ive i viḡaei ma i riwei i pa, “Ma genuana!” Ma rabama i riwei i pa, “Ma mae-genuataul!” Ma ive i wanatuini ma daumora ḡaeḡaena i matave. ⁴⁰ Iesu ana tauvotaḡotaḡo i riwei i pa, “Aiwai aubaina o rovorovo? Taumi amapo da eḡa ota vitumaḡana!”

⁴¹ Ma tau i rovo kaua ma i riwa vivira i pa, “Wei aiai ravana da ive ma rabama tauna e vovoteletelei?”

5

Iesu, arua-apoapoena oroto awarina i viaḡaḡana-opunei.

(Matthew 8:28-34; Luke 8:26-39)

¹ Iesu ana tauvotaḡotaḡo maiteni Galili topana au baba ḡelauna i ḡeta, mai Gerasa ai au dobu. ² Wei au dobuna, arua-apoapoena oroto au orana maemaena. ³⁻⁵ Eḡa aiai tagotagogina da ita vovaiubai. Mara maḡamaḡauna, aena ma urana seinei i pani. Wate wei i viaituituini, ma eḡa tagotagogina da seinei ita pani. Marai ma waguvarai i nene-labalababa ma i garagarara ma ḡaimei tupuana i boribori-melei ma au kokoaga ma au ola i raunuma. ⁶ Maranai Iesu wagei i opuopu, arua-apoapoei orotona i ruiuinia, aueia Iesu i 'nanai ma kokoagei i ruba ma Iesu au naona i mae-peu ma i raudune. ⁷⁻⁸ Iesu, ravana i riwei i pa, “Arua-apoapoena, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ḡoeḡoei? God wavanei a vivibaḡaim da eḡa ma kovoḡiu!” ⁹ Iesu, orotona i vitara-virevirei i pa, “Tam wavam aiai?”

I paribelei i pa, “Tauai a maḡa, aubaina tau wavau lamna Ḡavia Patarana.”

¹⁰ Ma arua-apoapoei, Iesu i vibaḡa-guratei da avena nai dobunei ita viopuna-tawanei.

¹¹ Ma poro boruna ḡaeḡaena au ḡereḡere ola au adana i labalaba. ¹² Ma arua-apoapoei, Iesu i vibaḡai, “Ma paritawanelai poro au orai ana rui.”

¹³ Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ḡaira da au topa i monu.

¹⁴ Ma poro taipainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua. ¹⁵ Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma tau i rovo kaua. ¹⁶ Ma aiwai i tupua orotona ma poro awari, tau i 'nainanaia, rava i riwana-naiei.

¹⁷ Ma dobuna ravai, Iesu i vibaḡai da dobuna ita oputawaneii.

¹⁸ Iesu au waga i gerugeru ma orotona, Iesu i vibaḡai i pa, “Tau maiteni tana nae.”

¹⁹ Iesu i viḡaei ma i riwei i pa, “Ma naeme am au dam. Ma BADA kaua aiwai ḡaeḡaena i kaukaueia ma ana iviaiai tam awarim, tau i pariverei.”

²⁰ Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma tau i anatapui i nononoria i baiei.

Iesu, Jairus natuna wavinena ma wavine doridoriana i vilawani.

(Matthew 9:18-26; Luke 8:40-56)

²¹ Iesu wagei i damana me topa au baba ġelauna. Maranai kampa i ġeta ma topa au adana, ma patara i rieiai. ²² Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu ²³ ma i vibaġa-guratei i pa, "Natu guguinina e irairaġe. Ma nei ma uram au inina ma terei ma ina lawana."

²⁴ Anina ma Jairus, Iesu maiteni i nae ma patarana i mae gariġuruvi ma i votaġotaġoi.

²⁵ Wavine tagogi kampa patarana au orana awarina tara-doriana i mae da madeġa 12 i kwa. ²⁶ Ana mane anataputapuna, dokedoketa maġamaġau awarii i tawanei ma eġa tagotagogina ita vilawani ma amapo da ana doria i rarata. ²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani. ²⁹ Maratagogi, tara-doriana i wanatuini ma malana i vaia da i lawana. ³⁰ Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, "Aiai au gara i vodadani?"

³¹ Ana tauvotaġotaġo, tauna i riwei, "Ma inana, patara i mae gariġuruvim! Ma menanare da u riwa 'Aiai i vodadaniu?"

³² Wate Iesu i 'nana viravira da ita inana aiai i vodadani. ³³ Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieġei. ³⁴ Anina ma Iesu, wavine i riwei i pa, "Natu, am tumaġana i vilawanim. Am doria i kwa, ana nuaubam ma nae!"

³⁵ Maranai i bababani ma rava ġelaui Jairus ana numei i nei ma i riwei i pa, "Natum ana mara i kwa. Eġa Taugiu ma visina-viravirai."

³⁶ Iesu ai babani i nonora-tawanei ma Jairus i riwei i pa, "Eġa ma rovo, ma vitumaġana!" ³⁷ Iesu, rava ġelaui i viġaei ma Peter ma James ma ana tevera John maiteni i nae. ³⁸ Ma Jairus ana au numa i ġeta ma Iesu, patara i 'nanai; i toutou ma i taratarakwatu ³⁹ ma i rui ma tau i riwei i pa, "Aiwai aubaina o taratara-kwatu ma o toutou? Tevera eġa ita iraiġe, tauna e matamatave ota."

⁴⁰ Ma tau i, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġotaġo tonuġa maiteni i rui mepa tevera i matamatave lana. ⁴¹ Iesu, tevera nimana i vaia ma i riwei i pa, "Talitha koum!" wei anona, "Kukuma, ma vomairi!"

⁴² Maratagogi i vomairi ma babara i vikarei (Tauna ana madeġa 12). Ma tau i ba kaua. ⁴³ Iesu, tau i riwana-guratei da eġa aiai ita vieġei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaġotaġo maiteni nai dobuna i netawanei ma i naeme ana au melagai. ² Ma Sabat marana i ġeta ma tauna giu i vikarei au pari numana. Ma rava maġamaġau i rie i rautaniġanei. Tau i anatapui i baiei ma i vitara-viravira vivira i pa, "Wei tauna nuaula ma aramanana mepa i vaia?" Ma, "Kaua aiwai e kaukaui?" ³ Anina ma tau i ava i babani vivira i pa, "Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?" Ma lamna aubaina mai Nasaret, Iesu i parivirevirei.

⁴ Iesu, tau i riwei i pa, “*Peroveta* dobu au ġelau i vivivirei, wate ana au melagai, ana rava ma ana dam oina, eġa ita vivivirei.”

⁵⁻⁶ Tauna i baie i da rava eġa tauna ita vitumaġanei. Ma eġa tagotagogina da kaua vivirewapanai kampa ita kauē. Tauna urana, rava ruaġa ota doridoriai au tepai i terei ma i vilawani. Ma muriai, melagai nununai au ġereġerei i viararamana nae.

Iesu ana Apasol i paritawanei da ita viararamana

⁷ Ma Iesu, tau i 12 i ġoreiai ma ruaruagei ava i paritawanana-opunei ma rewapanai i verei da arua-apoapoei ina viaġaġana-opunei. ⁸ Ma riwa bagibaginei i riwei i pa, “Ami au vaġai, eġa aiwai ona vaia anina jiġona ava; eġa lam, eġa autu bo mane au urami. ⁹ Ae uma ona oten i ma eġa kwama ġelauna ona vaia.” ¹⁰ Ma i riwei i pa, “Metauna melagaina o rui ruiana ma i vianinemi. Numa tagoginina au orana ona mae da melagaina ona oputawanei. ¹¹ *Mepa da au melagai o ġeta ma rava eġa ita vianinemi bo eġa ita rautaniġanemi. Nai melagaina ona oputawanei ma aemi pokauna ona rauabuabui da ina aramanei da tau i ai wavu!”*

¹² Ma tau i opu ma rava awari i raugugula ma i riwei i pa, “Taumi ami ġo’apoapoei ona voterei ma ona mae-taviremi God awarina!” ¹³ Tau i, arua-apoapoei i viaġaġana-opunei. Ma rava doridoriai maġamaġau, olive oirana au kolai i buloi ma i vilawani.

John Taubabataito ana iraġe

¹⁴⁻¹⁶ *Iesu nolana i nae da rava anatapu i aramanei ma tauna i babaniei. Ma rava ġelau i ririwa i pa, “Tauna, kaua vivirewapanai e kaukauei, aubaina tauna John Taubabataito iraġelei i vomairi me.” Ġelau i ririwa i pa, “Tauna Elijah i nememei.” Ma ġelau i ririwa i pa, “Tauna peroveta wariġai nanare.” Ma gulau Herod,† nolana i nonori ma i riwa i pa, “Tau, John Taubabataito uana a borituini; marina i vomairi me.” ¹⁷⁻²⁰ John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġiriġiriei i pa, “Tarawatu e mamae da eġa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rautaniġanei. Wate nuanuana i raġaraġa.

Ma Herodias, John awarina amlona i ġaiġai ma viragēnana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eġa tagotagogina da aiwai ita kauē.

²¹ Ma wavine, gavogavo i ’nanai, maranai Herod ana tupua marana i ġeta ma torela i vokaukauei. Ma gabemani babadai ġaēġaei ma sorodia ai babada ġaēġaei ma Galili babadai i raukwatuei. ²² Ma Herodias natuna wavinena i nei ma i ara. Herod ma tau i maiteni i amam i vinuaiaini. Ma gulau, guguini i riwei i pa, “Aiwai u ġoeġoeia ma vibaġaiu ma ana verem!” ²³ Ma i parivainuagani i pa, “God au matana a ririwem da aiwai u vivibaġeiu ana verem da au vigulau navanavana au paratana.”

☆ **6:11:** Act 13:51 * **6:11:** Wariġa mai Jew, tauvaġai e nenememei au Israel. Tau i aei pokau e raruabuabui maranai Israel ana au parata e ġeġeta, lamna tau i orai e viaiaini. Ma Iesu ana tauvotaġotaġo wei i kauē da melagai ravai ina notai, “Tauvotaġotaġo e ririwa da tauta orata apoapoena me tauta eġa mai Jew.” ☆ **6:14-16:** Mrk 8:28 † **6:14-16:** Herod Antipas, Galili ana Wavalatona.

²⁴ Ma tevera wavinena i opu ma alona i paridadanei i pa, “Aiwai ana vibaḡei?”

Ma i paribelei i pa, “John Taubabataito kolana.”

²⁵ Ma maratagogi i vipaparana ma gulau awarina i rui ma i vibaḡai i pa, “A ḡoeḡoei da marina John Taubabataito kolana ma vereu au aboma!”

²⁶ Ma gulau nuanuana i bola-kauei. Wate parivainuaḡana boiboḡi i kauei tau i amam au matai. Ma lamna aubaina guguini, aiwai i vivibaḡei anina i vianinei. ²⁷ Ma tauviraḡena i paritawanei ma i riwei da John kolana ita neiai. Ma i nae panipani au numana ma John uana i borituini. ²⁸ Ma kolana au aboma i terei ma guguini i verei ma guguini, alona i verei. ²⁹ Ma John ana tauvotaḡotaḡo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagibagi

(Matthew 14:13-21; Luke 9:10-17; John 6:1-14)

³⁰ Apasol i ḡeta memei ma aiwai anataputapuna i kaukauei ma i raraugugulei, Iesu i vieḡei. ³¹ Lamna maranai, rava maḡamaḡau i nenei ma i nenaē da Iesu ana tauvotaḡotaḡo maiteni eḡa gavogavo ita maemaē da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.” ³² Ma anatapui wagei i nae au mutulua.

³³ Wate rava maḡamaḡau i 'nanai i nenaē ma i aramanei tau aiavoi. Ma melagai nununai anatapui geraei i ruba gogona da au dobuna i aiḡeta. ³⁴ Maranai Iesu wagei i tuopu au gera ma patara ḡaeḡaena i 'nanai ma nuanuana i bola-kauei. Tau me sipu ma eḡa ai tauvipaipai. Ma Ri-wana Aiaina viararamanai i raukarei. ³⁵ Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere. ³⁶ Rava ma paritawanei da ina nae au melagai ma au wapu au ḡereḡere da ai lam ina gimarai.”

³⁷ Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 *denarii*† tana vaia da wei patarana tana viambagibagi?” ³⁸ Ma Iesu i paridadanei i pa, “Palawa biaḡa awarimi? Ona nae ma ona baiei!”

Maranai i nelaḡai ma i riwa i pa, “Awariai, palawa five ma iana ruaḡa.”

³⁹ Anina ma Iesu, patara i riwei i pa, “Boru nununai, gidagida au majimajiḡai ona kiala nae.” ⁴⁰ Ma tau ai au boru 50 da 100 nanare i kiala nae. ⁴¹ Ma Iesu, palawa five ma iana ruaḡa i vaia ma i ḡoutata au mara ma God i viegualauei. Ma palawa i vogimagimai ma iana i ḡutai da ana tauvotaḡotaḡo i verei ma tau, rava i verei. ⁴² Ma patara i am ma i am-iaua. ⁴³ Ma ana tauvotaḡotaḡo, lam am tereterenai i tuarui da poa muomuoi 12 i vioai. ⁴⁴ Nelara 5,000 i viambagibagi.

Iesu, waira au tepana i babara

(Matthew 14:22-33; John 6:15-21)

⁴⁵ Anina ma Iesu, ana tauvotaḡotaḡo i egari da ita aidamana au Bethsaida,§ Tau i waga i geru da i nenaē ma tauna, patara i paritawanei. ⁴⁶ Patara i paritawanei ma tauna ava i ḡae au ola da ita raupari. ⁴⁷ Ma waguvara ana tauvotaḡotaḡo au waga au topa ma Iesu au alala. ⁴⁸ Ma ana

† 6:37: 200 denarii. Denarius tagogi lamna taubagibagi ai maia au pom tagogo nolana aubaina.

§ 6:45: Eng. Bethsaida.

tauvotaḡotaḡo, lare i vovoguratei da ita ḡota wate ive i viraumatamatani. Ma maratomtōm nanare, Iesu i nae awari. Tauna waira au tepana i bababara ma i ḡoei da tau i ita tutelarei. ⁴⁹⁻⁵⁰ Ma maranai tau i, Iesu i 'nanai topa au tepana i bababara ma i notai da tauna konaḡa ma i rovo kaukaua ma i vigaragararei. Ma maratagōgi Iesu i riwa i pa, "Tepami ina tora! Tau, eḡa ona rovo!"

⁵¹ Ma au waga i geru ma ive i wanatuini ma tau i bana-kauēi. ⁵² Avena da kaua palawa awarina i kauēi i 'nanai, wate ana rewapana eḡa ita aramana-kauēi. Tau i orai i bado ma i vinuanaina.

*Iesu, rava doridoriai maḡamaḡau i Genesaret i vilawani
(Matthew 14:34-36)*

⁵³ Tau i, topa i damani ma au Genesaret i ḡota ma ai waga i raḡini. ⁵⁴ Tau i, waga i oputawanei ma rava, Iesu i 'nanai ma maratagōgi i aramanei da tauna. ⁵⁵ Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasirasiei i vivaneiai. ⁵⁶ Iesu mepa i nenelana, melagai ḡaeḡaei ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaḡa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

7

*Amamami ai giu
(Matthew 15:1-9)*

¹⁻⁴ Pharisi ma Jew anatapui, magumagura ai giu maḡamaḡau e notanota-jijini. Tau i, ai aniuma ma ai aniam anatapui e oḡaoḡai lamnei tau i e viaiaina-melei God au matana. Ma maranai au maket da e nenei, urai ina oḡai ma ina am. Tau i eḡa ina am da au naona urai ina oḡa kauēi me ai magumagura ai giu nanare.

Maratagōgi Pharisi ḡelau i ma Tarawatu Babadai, Jerusalem ei i nei Iesu awarina da ita rautaniḡanei. Ma tau i i 'nanai da Iesu ana tauvotaḡotaḡo ḡelau, urai eḡa ita oḡai ma i amam.

⁵ Ma tau i, Iesu i vitara-virevirei i pa, "Aiwai aubaina am Tauvotaḡotaḡo magumagura ai giu, eḡa ita votaḡotaḡoi ma ana ura miramirai e amam?"

⁶ Ma Iesu i paribelei i pa, "Taumi morumorumu ma o vikaua-aiaina-melemi. God ana peroveta Isaiah i riwa kaua maranai i riwa, i pa:

'Wei ravai ipiriei e vovoepaepaiu,
wate nuanuai aueia.

⁷ Tau i rava ai giu e viwararamani.

Lamna aubaina ai voepaepa anona eḡa.'

(*Isaiah 29:13*)

⁸ Taumi, God ana Tarawatu o teretere-tawanei ma ami giu o votaḡotaḡoi."

⁹ Ma i riwana-melei i pa, "Taumi o aramana kaua da God ana Tarawatu o gedugeduaiei ma amamami ai giu o vovotaḡotaḡoi. ¹⁰ *God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viraḡeni.* ¹¹ Wate taumi o viararamana da aiai awarina mane bo purapura, amana bo alona ita voagui ma ita riwei, 'Awariu e mamae da ata voaguim; wate lamna *Corban* - a tereriei pulo, God aubaina.' ¹² Wei viararamanana, tau i e viviḡaei da amana ma alona ina voagui. ¹³ Ma wei taunei viararamana, rava awari o vividamani;

ma God riwana o vivikwakwavi. Ma kua maḡamaḡau ḡelau maiteni o kaukaui.”

Metauna kauai, rava orai e vivimirai.
(Matthew 15:10-20)

¹⁴ Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei. ¹⁵⁻¹⁶ Aiwai au tanoai au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”*

¹⁷ Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai. ¹⁸⁻¹⁹ Iesu i paribelei i pa, “Taumi maiteni eḡa ota aramanei bo? Kua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

²⁰ Anina ma i riwa i pa, “Aiwai, rava oranei e opuopu; lamna, rava e vivimirai God au matana. ²¹ Anina rava nuanuane vinuanotan-ota apoapoei e opuopu me: viawawana labalababa, danene, viragena, awadanene, ²² ambo, rau-iviapoapoe, moru, erawa, unura, terevaideḡa, mae-ḡaeḡae ma opa. ²³ Wei kauai apoapoei anatapui oranei e opuopu ma rava e vimiramirai.”

Jentail wavine, † Iesu i vitumaḡanei
(Matthew 15:21-28)

²⁴ Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa. ²⁵⁻²⁶ Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni. ²⁷ Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

²⁸ Ma wavine i paribelei i pa, “Bada, aiwai u riwei; lamna riwa kua. Wate auou, roaroa ai lam momoḡina, kepakepa au gabaurina e rauraua e aniani.”

²⁹ Ma Iesu wei i riwei i pa, “U paribelana kua, aubaina ma nae au numa. Arua-apoapoena natum i opu-tawanei.”

³⁰ Ma wavine i naeme au numa. Natuna wavinena i 'nanai i matamatave, arua-apoapoena boiboḡi tevera i opu-tawanei.

Iesu, oroto taniḡa-potapotana ma mena birebirena i vilawani

³¹ Iesu Taia ma Sidon ana parata i netawanei ma au babaḡela Dekapolis i verautuini ma i nae au Galili topana. ³² Orotu taniḡana potapotana ma menana birebirena i nei ai Iesu awarina ma i vibaḡai da urana au inina ita terei da ita vilawani. ³³ Iesu, oroto i taravaina-opunei da tau i ava ma ura-gigina, oroto au taniḡana i terei ma ura-gigina ḡelauna i ovai ma menana i vodadani. ³⁴ Nuanuana i bolai ma i ḡoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!” ³⁵ Maratagogi

* **7:15-16:** Giruma ḡelau Mark uranei i girugirumia wei riwai wenanare e mamae, “Mepa da taniḡami e mamae, ona rautaniḡana.” † **7:23:** Rava eḡa mai Jew. ‡ **7:27:** Riwa roaroa wei au awanaina lamna mai Jew. Tau i e notanotai da tau i ai guratana eḡa me rava ḡelau. Lamna aubaina tau i dobu ḡelau ravai e ḡoreḡorei auou.

taniġana i wanatawanei ma menana i vidagudagu ma i babani kaua. ³⁶ Ma Iesu, tau i viġaei da aiwai i tuputupua, avena rava ita vieġei. Iesu, rava i viġaei; wate tau i eġa ita rautaniġana ma riwa i vituai. ³⁷ Ma maranai ravai wei i nonori, tau i bana-kauei ma i riwa i pa, “Aiwai anatapui i kauana-kauei. Tauna, rava taniġa potapotai e vivilawani da e rarautaniġana ma menabirebirei e bababani.”

8

*Iesu, rava 4,000 i viambagibagi
(Matthew 15:32-39)*

¹ Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa, ² “Au pom tonuġa patara maiteni a mae ma ai lam eġa ma a rau-nuapoapoelei. ³ Tau i ġelau, uamei i nei. Mepa da ana am-iraġe ana paritawane i ai au numa, ma au etanai ina raumolaġau.”

⁴ Ma ana tauvotaġotaġo i paribelei i pa, “Wei mutulua ma mepa lam tana vaia da wei patarana tana viambagibagi?”

⁵ Ma Iesu, tau i paridadanei i pa, “Awarimi palawa biaġa?”
Tau i riwa i pa, “seven.”

⁶ Ma Iesu, patara i riwei da au doa i kiala. Ma palawa seven i vaia ma God i viegualauei ma i vogimagimai ma ana tauvotaġotaġo i verei da patara i verei. ⁷ Ma tau i awari, iana muomuoi ruaġa ota. Iesu i vaia; God i viegualauei ma ana tauvotaġotaġo i verei da patara i verei. ⁸ Tau i anatapui i am da i am-iaua. Ma lam am tereterenai i tuarui da poa ġaeġaei seven i vioai. ⁹ Rava 4,000 i viambagibagi. Ma muriai i paritawane i ai au numa.

*Pharisi, God ana mataira i vibaġei
(Matthew 15:39-16:4)*

¹⁰ Maratagogi, Iesu ana tauvotaġotaġo maiteni au waga i geru ma i nae Damanuta ana au parata. ¹¹ Pharisi ġelau i nei ma viparipariġai i vikarei Iesu maiteni. Tau i ġoei da Iesu ita raudadani da mataira Godei ita viatataiei. ¹² Iesu, Aruane i lavutu tawanana ma i riwa i pa, “Wei kimta voui, aiwai aubaina mataira e ġoeġoei? A ririwana-kauemi, amapo mataira eġa ona inana i.”

Iesu, ana tauvotaġotaġo I parivainotai

¹³ Anina ma Iesu, patara i netawane i ma ana tauvotaġotaġo maiteni au waga i geru me ma i damana Topa Galili au baba ġelauna. ¹⁴ Ma ana tauvotaġotaġo, nuanuai i vuru da ai palawa ita vaia ma palawa tagogi ava au waga i mamae. ¹⁵ Iesu, tau i parivainotai i pa, “Pharisi ma Herod ai giu ma ai viararamana morumoruna ona inana-kauei! Lamna me yist.*”

¹⁶ Ma tau i babani vivira i pa, “Tauta eġa ata palawa aubaina da e ririweta.”

¹⁷ Ma Iesu i aramane i ma tau i riwei, “Aiwai aubaina o bababani da taumi awarimi eġa palawa? Taumi amapo da eġa ota aramana ma o vivinuanaina? Orami i bado bo? ¹⁸ *Matami e mamae ma eġa ota inainana. Ma taniġami e mamae ma eġa ota nonora. Ma o vinuanotanota bo eġa? ¹⁹ Maranai palawa five a vogimagimai rava 5,000 aubai, lam am tereterenai o tami da poa biaġa o vioai?”

* **8:15:** Yist mai Jew awarii awanaine i lamna aiwai da apoapoe, mira bova e vivitua bo e vivimagai. Weka Iesu mai Pharisee ma mai Herod ai lawana ma ai giu morumorui e babanie, da eġa ina tua. ☆ **8:18:** Mrk 4:12

Tau i paribelei, “Twelve.”

²⁰ “Ma maranai palawa seven a vogimagimai rava 4,000 aubaii, lam am ġetererenai o tami da poa ġaeġaei biāġa o vioai?”

Tau i paribelei, “Seven.” ²¹ Ma tau i riwei i pa, “Ma amapo da o vivinuanaina!”

Iesu, oroto mata apoapoena i vilawani au Bethsaida

²² Tau i nei au Bethsaida ma rava ġelau, oroto matana apoapoena i neiai Iesu awarina ma i vibaġa-guratei da ita vodadani. ²³ Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

²⁴ Ma i taepai ma i riwa, “Rava a inainanai ma tau me ai ita bababara.”

²⁵ Iesu, urana i tere-melei oroto au matana. Ma matana i wanatawanei da aiwai anatapuna i ‘nana-kauwei. ²⁶ Iesu, tauna i paritawanei ana au numa ma i riwei, “Eġa ma nae au melagai! Wate jijimanina ma nae au numa.”

Peter i riwa da Iesu, tauna Keriso

(Matthew 16:13-16; Luke 9:18-20)

²⁷ Iesu, ana tauvotaġotaġo maiteni i nae melagaii Caesarea Philipai au ġereġerei. Maranai i nena e Iesu, tau i paridadanei, “Rava e ririwa; tau aiai?”

²⁸ *Ma tau i paribelei, “Ġelau e ririwa da tam, John Taubabataito. Ma ġelau Elijah. Ma ġelau e ririwa da peroveta wariaġana tagogi.”

²⁹ Ma Iesu, tau i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana *Messiah* - anona Keriso.”

³⁰ Iesu, tau i viġaei da eġa aiai ina riwei da tauna aiai.

Iesu ana iraġe ma ana vomairi me i babaniei

(Matthew 16:21-23; Luke 9:21)

³¹ Ma Iesu i raukarei da ana tauvotaġotaġo i ġiuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduaiei ma ina viraġeni. Ma au pom tonuġa au murina ina vomairi me.” ³² Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei. ³³ Wate Iesu i mae-tavirei ma ana tauvotaġotaġo i ‘nanai. Ma Peter i eni, i pa, “Satan ma nae au muriu! Tam am nota eġa Godei ita nenei, eġa da ravei.”

Iesu votaġotaġona anona

(Matthew 16:24-28; Luke 9:23-27)

³⁴ Ma Iesu, patara ma ana tauvotaġotaġo i raukwatuei ma i riwei, “Mepa da aiai ita votaġotaġoiu. Tauna ina boviaana-melei ma ana korosi ina avarai ma ina votaġotaġoiu.† ³⁵ Aiai ana lawana e tatajjini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelei. ³⁶ Ana aii bo anona aiwai, mepa da wei dobuna lawanana ma vigulauna ma vaipai ma am lawana maema-nonoana ma vine-boai. ³⁷ Wate aiwaiei am lawana ma gimara-melei. ³⁸ Mepa da aiai: tau ma au viararamana ina vinimalei; ma i mae-puputeu; ma ana ġoanei

* 8:28: Mrk 6:14-15 † 8:34: Wei lamna awanaina. Anona lamna Iesu ana tauvotaġotaġo anina vinimala ma apoapoei ina nelaġai aubaina tau, tauna i votaġotaġoi. Tauna eġa ita ririwa da ana tauvotaġotaġo au korosi ina iraġe me tauna.

kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni.”

9

¹ Ma Iesu, wenanare i riwei, “Taumi a ririwana-kauemi; rava ġelaumi weka o maimairi amapo eġa ona iraġe da God ana vigulau ona inanai ana rewapanana ina nei.”

*Iesu inanana i virai
(Matthew 17:1-13; Luke 9:28-36)*

² Au pom six muriai, Iesu, Peter, James ma John i taravaini. Ma tau i ava i ġae ola ġaeġaena au tepana. Ma kampa tau i matai, Iesu inanana i virai. ³ Ana gara i arapoiri ma gamrina i vimata-kamokamota; eġa me aiwai ġelauna au dobu nanare. ⁴ Ma kampa au matai, Elijah ma Moses i eġa. Ma Iesu maiteni i bababani. ⁵ Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!” ⁶ Ma tau i rovo kaua ma Peter eġa ita aramanei da aiwai i latolatoni.

⁷ ✠ Anina ma apau i eġa ma tau i purui. Ma pona apauei i opu ma i riwa i pa, “Wei Tau Natu au nuavainana, ona rautaniġanei!” ⁸ Maratagogi tau i nana viravira ma eġa aiai ġelauna ita inanai ma Iesu, tauna ava.

⁹ Ma maranai olei i ġaiġairai ma Iesu, tau i viġaei da aiwai i nananaia eġa ina vieġai da au naona Rava Natuna iraġelei ina vomairi me.

¹⁰ Ma tau i, wei riwana i voteletelei ma i babani vivira i pa, “Iraġelei vomairi me anona aiwai?” ¹¹ Ma tau i, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

¹² Iesu i paribelei, “Riwa kaua Elijah au naona ina nei da aiwai anat-apuna ina vokaukauei. Aubaina wariġa i girumi da Rava Natuna ina vinuapoapoe kaua ma ina inana-geduaiei. ¹³ Wate a ririwana-kauemi da Elijah anina i nei ma rava, ai ġoanei tauna i rau-iviapoapoelei me i girugirumia nanare.”†

*Iesu, arua-apoapoena tevera orotona awarina i viopuni
(Matthew 17:14-21; Luke 9:37-43a)*

¹⁴ Iesu ana tauvotaġotaġo tonuġa maiteni olei i ġaira memei ai rava awari ma patara ġaeġaena, tau i gariġuruvi. Ma Jew ai tarawatu babadai, tau i maiteni i vivitarapiri. ¹⁵ Maranai patara, Iesu i nanai. Tau i orai i auepai ma awarina i ruba ma i vieġalauei. ¹⁶ Iesu, tau i vitara-virevirei, “Aiwai o vitarapiriei?”

¹⁷ Oroti tagogi patara au pou i paribelana, “Tauviararamana, arua-apoapoena natu orotona au orana e mamae ma i kau i eġa ita bababani, lamna aubaina a neiai awarim. ¹⁸ Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ġiriġiriei; ma inina e badobado. Am tauvotaġotaġo a vibaġai da arua-apoapoena ita viopuni, wate eġa tagotagogina da ita kau i.”

¹⁹ Ma Iesu i paribelei, “Oo mara aiwai ona vitumaġana! Ta mae ġaġa ma ami vita ana ’vara ġaġalei? Tevera awariu ona neiai!”

✠ **9:7:** Mrk 1:11 * **9:11:** Mai Jew i vitumaġana da Elijah au naona ina nememei ma Keriso muriai ita nei. (Mal 3:1, 4:5-6). Ma tau i eġa ita notai da Elijah rau-iviapoapoe ina nelaġai ana au nememei. † **9:13:** Iesu lamna John Taubabataito i bababaniei da tauna Elijah (Mat 11:13-14, 17:10-13)

²⁰ Ma tevera i nei ai Iesu awarina. Ma maranai arua-apoapoena, Iesu i 'nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro. ²¹ Iesu, tevera amana i vitara-virevirei, "Wei teverana ana doria mara aiwai i vikarei?"

I paribelei i pa, "Maranai aburunai. ²² Arua-apoapoena mara au anat-apuna, tauna ai au araratana ma au waira e tawatawanei ma i goei da ita viraḡeni. Mepa da tam tagotagogina; ma raunu'apoapoelelai ma ma voaguiai!"

²³ Iesu, tauna i riwei, "Menanare da u riwa, 'Mepa da tam tagotagogina?' Aiai ravana e vivitumaḡana, God anapuna ina kau ei tauna aubaina."

²⁴ Maratagogi tevera amana i garara, "A vitumaḡana, wate au tumaḡana eḡa ita rata ma ma voaguui da ina rata!"

²⁵ Iesu i 'nana da patara i rierieiai awarii ma lamna aubaina arua-apoapoena i egari i pa, "Tam arua taniḡa-potapotana ma gumgum. Tau a egaegarim da tevera ma opu-tawanei. Ma eḡa melanai au orana ma rui me!"

²⁶ Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maḡamaḡau kampa i riwa, "Tauna i'raḡe!" ²⁷ Ma Iesu, tauna urana i vojijini ma i sinaepai da i mairi.

²⁸ Muriai Iesu, ana tauvotaḡotaḡo maiteni i rui au numa. Ma maranai tau i ava ma i paridadanei i pa, "Aiwai aubaina tauai eḡa tagotagogina da arua-apoapoena ata viopuni?"

²⁹ Iesu, i riwa, "Arua-apoapoei me wenanare, pari ainelana ina viopuni."

Iesu ana iraḡe i babaniana-melei

(Matthew 17:22-23; Luke 9:43b-45)

³⁰ Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita goei da rava ita aramanei da tau i mepa.

³¹ Aubaina tauna, ana tauvotaḡotaḡo i viararamani i pa, "Tau i Rava Natuna ina amverenei rava ḡelau i urai. Ma tau i ina viraḡeni. Wate au pom tonuḡa au murina ina vomairi me."

³² Wate tau i eḡa ita aramanei tauna aiwai i bababaniei. Ma pari-dadanana i rovoei.

Tauvotaḡotaḡo i vitarapiri vivira da aiai i ḡetelara

(Matthew 18:1-5; Luke 9:46-48)

³³ Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitara-virevirei, "Au etanai aiwai o vitarapiriei?"

³⁴ Wate tau i genuana, aubaina au etanai tau i vitarapiri vivira da aiai i ḡetelara. ³⁵ ✧ Iesu i kiala ma Apasol 12 i raukwatuei awarina ma i riwei i pa, "Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai."

³⁶ Ma Iesu, tevera i vaia ma au poui i vimairini. Ma urana au jiḡona i tere-taḡonei. Ma tau i riwei i pa, ³⁷ "Aiai ravana; tau wavauei, tevera wenanare i rauḡorei. Lamna tau maiteni e rarauḡorei. Ma aiai da tau e rarauḡorei. Lamna tauparitawaneu maiteni e rarauḡorei."

Aiai eḡa ata ḡavia, lamna turata

(Luke 9:49-50)

³⁸ Anina ma John, Iesu i riwei, "Tauviararamana! Tauai, oroto tagogi a inanai; tam wavamei arua-apoapoena i viviopuni ma tauna eḡa turata. Lamna aubaina a viḡaei da eḡa ina kauana-melei."

³⁹ Iesu i riwa, “Eġa ona viġaei! Eġa aiai au wavau kaua babai ina kauai ma muriai ina parivai-apoapoeniu. ⁴⁰ Aiai ravana eġa ata ġavia; lamna turata. ⁴¹ Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaġotaġo. Taui ai maia eġa ina vine-boai.”

Rauelara babanina

(Matthew 18:6-9; Luke 17:1-2)

⁴² Aiai ravana i kauai da wei teverana ana tumaġana Tau awariu i viapoapoeni da ġo’apoapoe i kauai. Lamna i ai da ġaima ġaeġaena ravana au uatabana ina duri ma au boga ina tawanei aubaina God, tauna ina kovoġa-guratei. ⁴³⁻⁴⁴ Mepa da nimam i kauem da ġo’apoapoe u kauai. Ma bori-tawanei! I aii da nimam tagogiava ma lawana mamae-nonoana ma vaia. Ma eġa ma kauai da nimam ruaġa aiaii ma ma nae ai au menamenana; mepa ai eġa melanai ita bobo.† ⁴⁵⁻⁴⁶ Mepa da aem i kauem da ġo’apoapoeni u kauai. Ma bori-tawanei! I aii da sigesigem au lawana mamae-nonoana ma rui. Eġa me aem ruaġa aiaii ma ai au menamenana ina tawanem.‡ ⁴⁷ Ma mepa da matam ina kauem da ġo’apoapoeni u kauai. Ma vaitawanei! I aii da matam tagogi ma God ana vigulau ma rui. Eġa me matam ruaġa ma ai au menamenana ina tawanem; ⁴⁸ dobuna motamotana eġa ita irairaġe ma ai eġa ita bobo.

⁴⁹ Au Tauvotaġotaġo anataputapui, ai araratanei ina bogai.

⁵⁰ “Nia i ai lam viaiainana aubaina. Ma mepa da i tomatoma, mena ma vidagianei. Nia au orami ina mae ma ona viturana vivira!”

10

Iesu, tavine vilamonana i babaniei

¹ Ma Iesu, dobuna i netawanei ma i nae Judea ana paratana. Ma Waira Jordan i damani da au baba ġelauna. Patara ġaeġaena i riana-melei. Ma Iesu i viararamana, me mara patapatana i kaukauei nanare.

² Ma Pharisi ġelau i ġoei da tauna ita waroi. Ma lamna aubaina i vitara-virevirei, “Tarawatu e mamae bo eġa da rava, awana maiteni ita vilamonei?”

³ Ma Iesu i paribelei, “Moses ana Tarawatu aiwai e ririwei?”

⁴ Ma taui i riwa, “Moses ana Tarawatu e ririwa da oroto *vilamona pepana ina girumi ma awana ina verei. Ma taui ina vilamonei.*”

⁵ Iesu i paribelei, “Taumi orami i bada. Au baina Moses wei Tarawatuna i terei. ⁶ ✱Wate ona notai da au karena, maranai God rava i kauai *ma tauna oroto ma wavine i kauai.* ⁷ ✱Ma lamna aubaina oroto amana ma alona ina netawanei ⁸ ma awana maiteni ina vitagogi da taui eġa ruaġa me au naona ma tupua tagogi. ⁹ God aiwai i vitagogiei, eġa aiai ina vilamonei.”

¹⁰ Maranai taui i naeme au numa, ma tauvotaġotaġo, Iesu i vitara-virevirei wei kauai aubaii. ¹¹ Iesu i paribelei, “Mepa da oroto, awana i voterei. Ma wavine ġelauna i ravaġi. Lamna tauna, awana awarina i rauviapoapoe. ¹² Ma nanarena mepa da wavine, awana i voterei ma oroto ġelauna i ravaġi. Lamna awana, awarina i rauviapoapoe.”

Iesu, roaroa i viaiaini

¹³ Rava ġelau, roaroa i neiai Iesu awarina da urana au tepai ita terei. Ma ana tauvotaġotaġo, ravai i viġaei. ¹⁴ Maranai Iesu wei kauai i ’nanai. Ma

† 9:43-44: Wariġa nimaiei i giruma damanei taui riwana tagogina me vs 48. § 9:45-46: Wariġa nimaiei i giruma damanei taui riwana tagogina me vs 48. ✱ 10:6: Gen 1:27 ✱ 10:7: Gen 2:24

ana tauvotaḡotaḡo i eni ma i riwa, “Roaroa ona voterei da awariu ina nei. Ma eḡa ona viḡaei. Au baina God ana vigulau, lamna rava wenanare aubai me wei roaroai. ¹⁵ A ririwana-kauemi. Aiai, God ana vigulau eḡa ina vaia me tevera aburuna nanare. Tauna, eḡa God ana au vigulau ina rui.” ¹⁶ Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

¹⁷ Ma maranai Iesu i vomairi da i nena. Orotō i ruba ḡeta ma au naona i raudune ma i riwa i pa, “Taugiu vinualaulaunam. Aiwai ana kauēi da lawana maemae-nonoana ana viḡbuderiei?”

¹⁸ Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana. ¹⁹ ✧ Tam, God ana Tarawatu u aramanei, *Eḡa ma virāḡena! Eḡa ma awadanene! Eḡa ma danene! Eḡa ma viwavu-moru! Eḡa ma amkwalakwala! Amam ma Alom ma vivirei!*”

²⁰ Ma tauna i riwei, “Taugiu! Maranai tau aburueu da amadodo, wei tarawatui anatapui a voteletei.”

²¹ Iesu, tauna i ’nanai ma i vinuavainei ma i riwei, “Kaua tagogi e mamae eḡa uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiei. Ma ma nei ma ma votaḡotaḡoiul!”

²² Ma maranai oroto wei riwana i nonori. Naona i peu ma ana nu-abolana i nae; aubaina tauna, purapura ravana.

²³ Iesu i ’nana viravira ma ana tauvotaḡotaḡo awari i riwa, “I piripiri kaua da purapura ravana, God ana au vigulau ina rui.”

²⁴ Tauvotaḡotaḡo riwana i baiei maranai Iesu wenanare i babani. Ma Iesu i riwa me, “Natunatu! I piripiri kaua da purapura ravana,* God ana au vigulau ina rui. ²⁵ I telatela kaua da ḡamoḡamo ḡaeḡaena wavana kamel, iḡoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

²⁶ Taui i vinuanaina ma ai nota i kwa. Ma taui ava i babani vivira i pa, “Mepa da nanare; amapo aiai lawana mamae-nonoana ina vaia?”†

²⁷ Iesu awarii i ’nana ma i riwei, “Rava awarii wei kauai i piripiri. Wate eḡa God awarina. God awarina aiwai anatapuna i telatela kaua.”

²⁸ Ma Peter i riwei, “Ma tauai menanare? Tauai ai purapura a voterei ma tam a votaḡoim.”‡

²⁹ Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaḡotaḡoiu; tau ma Riwana Aiaina aubaina. ³⁰ Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anatapui ina maḡa. Rava ina rau-iviapoapelem; aubaina tam, tau au Tauvotaḡotaḡo da mara au murina tauna lawana mamae-nonoana ina vaia. ³¹ Wate maḡamaḡau marina e vivinao; taui ina vimuri. Ma maḡamaḡau da e vivimuri; ina vinao.”

✧ **10:19:** Exo 20:13; Exo 20:14; Exo 20:15; Exo 20:16; Exo 20:12 * **10:24:** Wei riwana buka ḡelai awarii e mamae ma ḡelai eḡa purapura ravana. † **10:26:** Mai Jew i notai da rava vipurapurai lamna BADA ana verena ana nuavaina matairana, taui e notai da BADA, rava vipurapurai eḡa ina gagaloei, tauna ravai ḡelai maiteni eḡa ina gagaloei. ‡ **10:28:** Peter i ḡoei da ita aramanei da tauvotaḡotaḡo ai au iraḡe maiana aiwai, ina vaia.

Iesu ana iraḡe babanina i vitonui
(Matthew 20:17-19; Luke 18:31-33)

³² Iesu, ana tauvotaḡotaḡo maiteni i ḡeḡae au Jerusalem. Iesu, tau i au naoi i nena. Tauvotaḡotaḡo i baiei. Ma rava ḡelau i muri i nenei i rovo kaua. [§] Ma tau i 12 i rauḡorei au ririva ma i raukarei da kaua amapo da awarina ina tupua; tau i vieḡei ³³ I pa, “Ona inana, tauta ta ḡeḡae au Jerusalem. Ma Rava Natuna ina verenei pirisi babadai; ma tarawatu babadai awarii. Ma tau i ana iraḡe ina vianinei. Ma Mai Jentail ina verei. ³⁴ Ma tauna ina vijiboḡi ma ina ova i ma ina kwapi ma ina viraḡeni. Au pom vitonuina ina vomairi me.”

James ma John ai vibaḡa
(Matthew 20:20-28)

³⁵ - Zebedi natunatuna James ma John i nei Iesu awarina ma i vibaḡai i pa, “Tauviararamana! Tauai ai ḡoana a vivibaḡei uta kauai.”

³⁶ Iesu i riwa i pa, “Aiwai o ḡoeḡoei ana kauai aubaimi?”

³⁷ Tau i paribelana, “Ma verelai da ana kiala, tagogi au oiem ma ḡelauna au kelakelaum am au vigulau.”

³⁸ Iesu i paribelei, “Taumi eḡa ota aramanei aiwai o vivibaḡei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoi? ^{*}”

³⁹ I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraḡe me tau ana iraḡe. ⁴⁰ Wate tau au rewapana eḡa ita mamae da ana veremi da mepa ona kiala au oieu bo au kelakelau. God, rava i vinevinei; tau i ai gabu i vokaukauai.”

⁴¹ Maranai Tauvotaḡotaḡo 10 ḡelau, wei riwana i nonori. Tau i James ma John awarii i ḡaiawa. ⁴² Ma Iesu, tau i anatapai i ḡorei da awarina ma i riwei, “O aramanei da jentail ai babada, dobu ḡela rava i jentail awarii e mamae-ḡaeḡae ma e rarau-iviapoapoelei. Wate tau i ai babada ḡaeḡae, ai rewapana i ḡetelera da ai rava e vibadebadei da ai ḡoana e kaukauai. ⁴³ [☆]Wate au tauvotaḡotaḡo eḡa nanare. Eḡa da ai ai i ḡoei da ina ḡetelera taumi au poumi; tauna anina da ina vitaunola. ⁴⁴ Ai ai i ḡoei da ita vinoa. Tauna ina vitaunola rava anatapai aubai. ⁴⁵ Ma nanare Rava Natuna eḡa ita nei da tauna, tana nolei. Wate ita vitaunola rava aubai. Ma ana lawana ita verenei da rava maḡamaḡau ai lawana ita gimara-melei.” [†]

Iesu, rava mata-potapotana Batimeus i vilawani
(Luke 18:35-43)

⁴⁶ Ma tau i ḡeta au Jeriko. Iesu, ana tauvotaḡotaḡo, patara ḡaeḡaena maiteni dobu i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamigimana.

§ 10:32: Iesu i ḡeḡae au Jerusalem ma rava maḡamaḡau i viḡaviei ma lamna aubaina ana tauvotaḡotaḡo i baiei da tauna tepana i tora da weka i nena. Rava ḡelau i votaḡotaḡo, tau i rovo kaua da aiwai awarina ina tupua maranai i ḡeta au Jerusalem. ^{*} **10:38:** ...babataito me tau ina babataitoi tau i iniviara ma iraḡe e bababaniei, maranai Iesu au Gethsemani i raruapari muriai da ana iraḡe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaḡai. [☆] **10:43:** Mrk 9:35 [†] **10:45:** Iesu i vinuapoapoe ma iraḡe aubaita me Isaiah i girugirumia nanare au Isa 52:13-53:12.

47 Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapoeleu!”†

48 Rava maḡamaḡai, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

49 Iesu i tumairi ma i pa, “Ona ḡoreiai!”

Anina tau, mata-potapotana i ḡoreiai i pa, “Tepam ina tora ma ma vomairi! E ḡoreḡoremi!”

50 Tauna, ana puru i tawanei ma i vomairi laḡilaḡina ma i nei Iesu awa-rina.

51 Iesu i paridadana i pa, “Aiwai u ḡoei ana kauai aubaim?”

Mata-potapotana i paribelei, “Tauviararamana! A ḡoei da ana inana me.”

52 Iesu i riwa, “Ma nae! Am tumaḡana i vilawanim.” Maratagogi tauna i ’nana me ma Iesu au eta i votaḡotaḡoi.

11

Iesu i rui au Jerusalem

(Matthew 21:1-11; Luke 19:28-40; John 12:12-19)

1 Ma maranai Jerusalem i tuḡereḡerei ma i rui au Betphagi ma Bethani* au ola *Olives*. Ma ana tauvotaḡotaḡo ruaḡa i paritawanei, 2 ma i riwei i pa, “Ona nae au melagai au naomi. Maranai o rui, kampa *donki* natuna ḡaubo, raḡiraḡitana ona nelaḡai. Tauna eḡa aiai ita geru-dadanei. Ona rupeni ma ona neiai.† 3 Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ḡoeḡoei ma maratagogi ina paritawana-melei.”

4 Ma i nae ma *donki* ḡaubona au doa au metaeta raḡiraḡitana i rupeni. 5 Rava ḡelau kampa i maimairi i paridadana i pa, “Aiwai o kaukauei *donki* ḡaubona o ruperupeni?”

6 Ma i paribelei me Iesu i ririweia nanare ma tau i voterei da i nae. 7 Tau *donki* i neiai Iesu awarina ma ai puru au uporana i tawana-epai ma au tepana Iesu i kiala. 8 Ma rava maḡamaḡai, ai puru au eta i ebani ma ḡelau, ai rugurugu i taratarai i ebani. 9 Tau i vivinao ma tau i muri i nenei i garara:

“Hosanna!”†

“Viviaiainana tauna BADA au wavana e nenei!”

10 “Viviaiainana amata David ana vigulau e nenei!”

“Hosanna au aidamo telarana!”

11 Iesu i ḡeta au Jerusalem ma i rui au Tempol ma anapuna i tuvirevirei ma au i biga aubaina, i opu me au Bethani, tau 12 maiteni.

Iesu, damala aina i parivai-irairaiḡeni

(Matthew 21:18-19)

12 Ma marana i tom, tau Bethani i opu-tawanei ma Iesu am-iraḡe. 13 Au weia ma damala aina i ’nanai ana ruguruguna. Ma i nae da ita inanai

† 10:47: Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariḡa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24) * 11:1: Eng. Bethphage & Bethani. † 11:2: Mai Jew awari, donki lamna nola aubaina ma eḡa gulau ana anigeru. Donki i gerui lamna e ririweta da tauna gulau ana nuaubana ma vilamolamonana i nei. † 11:9: Lamna pona Aram anona ma vilawaniai ma muriai lamna vieḡulau ma vimae-ḡaeḡaena aubaina.

da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, aubaina eġa damala ana mara. ¹⁴ Iesu, damala aina i riwei i pa, “Eġa aiai amadodo ma amapo anom ina am-melei!” Ma ana tauvotaġotaġo i nonori aiwai i latoni.

Iesu, taugimara tempolei i viaġaġana-opunei
(Matthew 21:12-17; Luke 19:45-48; John 2:13-22)

¹⁵ Maranai tau i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina[§] ai kepacepa ma gabubu taugimareina ai anikiala i vitauvirai. ¹⁶ Ma i viġaei da eġa aiai ana gimara Tempol au orana ita avarai-naiei. ¹⁷ ✠ Ma rava i viararamani i pa, “I girugirumia nanare,
‘Au numa ina ġorei pari numana
dam anatapui au dobu aubai.’

Wate taumi o vovirai da kwalakwalai ai guba.”*

¹⁸ Pirisi Babadai ma tarawatu Babadai i nonori ma i ogei da ita viraġeni. Tau, Iesu i rovoui aubaina patara ana viararamana i baiei.

¹⁹ Ma au bigai Iesu ana rava, Jerusalem i opu-tawanei.

Damala aina i poi
(Matthew 21:20-22)

²⁰ Ma ubaubanai tau i nenaie ma damala aina i ‘nanai anatapuna i poi. ²¹ Peter i notai ma i riwa “Tauviararamana ma inana! Damala aina u parivai-irairagenia i poi.”

²² Iesu i paribelei, “God ona vitumaġanei! ²³ A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eġa ina raġaraġa ma ina vitumaġana da aiwai e ririweia, ina tupua. ²⁴ Lamna aubaina a ririwemi. Aiwei ami au pari o vibaġei, ona vitumaġana da taumi boiboġi o vaia ma ina viġarimiei. ²⁵ Ma maranai e raraupari, au naona rava anatapui ai ġo’apoapoe awarim ma nota-tawanei. Ma nanare amam au mara am ġo’apoapoe ina nota-tawanei.”†

Jew babadai, Iesu ana vibadana i vitarapiriei
(Matthew 21:23-27; Luke 20:1-8)

²⁷ Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina. ²⁸ Ma i paridadanei i pa, “Aiwei vibadanei wei kauai e kaukauei? Aiai vibadana i verem da wei kauai uta kauei?”

²⁹ Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwei vibadanei wei kauai a kaukauei. ³⁰ Aiai, John taubabataito vibadana i verei da rava ita babataitoi, God bo rava? Ona riweul!”

³¹ Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eġa ota vitumaġanei?’ ³² Wate eġa tana riwa da, ‘Ravei.’”

§ 11:15: Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13).

✠ 11:17: Isa 56:7 * 11:17: Iesu dobuġela manena tauviraina ma gimara ravai i viwavui da tau pari numana i vovirai da amkwakwalai ai guba, tau rava ai arua nolana e viviapoapoeni Jer 7:11-15. † 11:25: Riwa wadubo nonoana uraiei i girugirumia vs 26 weka eġa ita mamae, Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei.

Tau i rava i rovoei, aubaina rava anapui, ai nota da John anina peroveta.

³³ Ma i paribelei, “Tauai eġa ata aramanei.” Iesu i riwa, “Tau nanare eġa ana riwemi aiwai vibadanei wei kauai a kaukauei.”

12

Tauipi ai awanaina

(Matthew 21:33-46; Luke 20:9-19)

¹ *Iesu i vikarei ma awanainei awari i babani i pa, “Mara tagogi oroto, ana wapu i kauai ma grape i paewi* ma i gari ma grape anigudana ma violaġa numana i voai. Ma tauipi ġelau i verei da ita nolei tau i anapui aubai. Ma i vaġai au dobu ġela. ² Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia. ³ Wate tauipi, tauna i vojijini ma i kwapui ma kwakwavina i paritawanei. ⁴ Ma taniwaga, taunola ġelauna i paritawanei. Ma tau i, kolana i viaibauni ma i vitepaubaubai. ⁵ Ma taunola ġelauna i paritawanei ma tauna i viraġeni ma i maġa ġelau i paritawanei, ġelau i kwapui ma ġelau i viraġeni. ⁶ Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Tau i, natu ina vivirei.’ ⁷ Wate tau i, tauna i ‘nanai ma i riwa vivira i pa, ‘Wei taniwaga natuna. Ona nei, tana viraġeni ma ana buderi ina viġaritaiei!’ ⁸ Ma i vunui ma i viraġeni ma tupuana wapuei i tawanana-opunei.

⁹ —Wapu taniwagana marina aiwai ina kauai tau i awarii? Tauna ina nei ma tauipi ina viraġeni ma grape wapuna ina veredamanei tauipi ġelau awari. ¹⁰ Wei girumana o iavi bo eġa?

‘Wei ġaimana, tauvoa i geduaiei,

wate muriai i nelaġai da tauna ġaima kaua.

¹¹ *Wei lamna, BADA ana kaua*

ma inanana i vinualaulauna.”

(Psalm 118:22-23)

¹² Jew babadai i aramanei da awanaina lamna tau i bababanie i ma i ġoei da ita pani. Wate tau i patara i rovoei, lamna aubaina Iesu i voterei ma i nae.

Caesar awarina tax tana terei bo eġa?

(Matthew 22:15-22; Luke 20:20-26)

¹³ Ma Pharisi ġelau ma Herod ana rava ġelau i nae Iesu awarina da riwei ita waroi. ¹⁴ Tau i nei ma i riwa, “Tauviararamana, tauai aramanei da tam rava jijimanim. Ma rava wavai naenaei ma rava labalababa eġa uta vibainaenaei ma anapui e vaivaia da tagogi. Wate tam God ana babani riwa kauai e viararamani. Ma riwelai tax tana terei Rome gulauna wavana Caesar† awarina, i aii bo eġa?”

¹⁵ Wate Iesu, ai moru i ‘nana-bauni ma i riwei, “Aiwai aubaina o raudadaniu? Mani tagogi ona neiai da ana inanai!”

¹⁶ Denarius tagogi i neiai Iesu awarina ma tau i vitara-virevirei, “Wei aiai aruana ma wavana?”

I paribelei, “Caesar.”

¹⁷ Iesu i riwa, “Aiwai Caesar ġarinei, Caesar ona verei. Ma aiwai God ġarinei, God ona verei!” Ma tau i baiei.

Sadusi ġelau, Iesu i vitara-virevirei irairaġelei vomairina aubaina

(Matthew 22:23-33; Luke 20:27-40)

* **12:1:** Isa 5:1-2 * **12:1:** Parivainota wadubona, God au anapuna Israel e bababanie i tauna ana grape wapuna, me Isa 5:1-2. † **12:14:** Sisa.

18 ✧ Mai Sadusi ai vitumaḡana da rava eḡa ita vovomairi-me maranai e irairaḡe.† Anina ma ḡelau i nei Iesu awarina ma i paridadanei, 19 “Tauviararamana! God ana tarawatu, Moses wenanare i girumi: Mepa da oroto i’raḡe ma kaiababana i netawanei ma eḡa natunatui. Orotovareina kaiababana ina ravaḡi ma roaroa ina ḡuni vareina aubaina. 20 Mara tagogi varevarei seven i mae. Ma natuevou i tavine ma eḡa natunatuna ma oroto i’raḡe. 21 Vareina viruaina kaiababa i ravaḡi ma tauna maiteni eḡa natuna ma i’raḡe. Ma nanare vareina vitonuina. 22 Ma nanare anatapui seven, wavinena i ravaḡi ma eḡa natunatui. Au muriai wavine i’raḡe. 23 Anatapui seven, wavinena i ravaḡi. Vomairi me au marana, lamna aiai awana?”

24 Iesu, tau i riwei, “Aiwai Moses i girumi ma God ana rewapana eḡa ota aramanei. 25 Maranai tau i’raḡelei ina vomairi, tau eḡa ina tavine bo ina vitavinei. Wate ina mae me anela au mara. 26 ✧ Ma rava i’raḡelei ai vomairi babanina, Moses ana tarawatu eḡa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.* 27 Tauna eḡa rava irairaḡe ai God, wate rava lawalawai ai God. Taumi o moru kaua!§”

Tarawatu ḡeḡetelarana

(Matthew 22:34-40; Luke 10:25-28)

28 Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, “God ana tarawatu metauna i ḡetelara?”

29 ✧ Iesu i paribelei, “ḡeḡetelarana tagogi lamna wei: *Ona rautaniḡana Israel! BADA ata God, tauna ava BADA.* 30 *BADA ami God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei!* 31 ✧ Ma viruaina lamna wei: *Rava ḡelau nuanuam ina vaia me tam nuanuam e vaivai-melei!* Wei tarawatui ruaḡa i ḡetelara, eḡa me ḡelau nanare.”

32 Tarawatu badana i riwa, “Tauviararamana u babani kaua! Riwa kaua u babaniei, *BADA Tauna ava God ma eḡa mepa ḡelauna.* 33 *Ma nuanuami ina vaia orami anatapunei ma ami nota anatapunei ma ami rewapana anatapunei.* Ma, *Rava turam nuanuam ina vaia me tam nuanuam e vaivai-melei.* Wei tarawatui ruaḡa lamna i ḡetelara, eḡa me pulo apuapunana bo pulo ḡelau.”

34 Iesu i ’nanai da tauna i paribelana kaua ma i riwei, “Tam, God ana vigulau au ḡereḡerena e ḡeḡeta.” Ma eḡa aiai tepana ita tora da Iesu ita vitara-viravirana-melei.

Keriso tauna aiai?

(Matthew 22:41-46; Luke 20:41-44)

35 Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna? 36 ✧ Arua Vivivireina, David nota i verei ma tauna i riwa:

✧ **12:18:** Act 23:8 † **12:18:** Sadusi tau i gulagulau ma rava ḡaeḡaei mai Jew ai giu babadai tau i maiteni eḡa ita vitumaḡana da anela bo arua ḡelau e mamae ma buka 5 i vinao, Moses i girugirumia, tau i lamna ava e vitumaḡanei (Karena, Exodus, Leviticus, Numbers, Deuteronomy). Ma eḡa buka ḡelau. Wate Moses ma BADA riwaiei tau i viatataiei da lawana e mamae irage au murina. ✧ **12:26:**

Exo 3:6 § **12:27:** ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau i lawalawai maranai BADA, Moses awarina i babani. ✧ **12:29:** Deu 6:4-5 ✧ **12:31:** Lev 19:18 ✧ **12:36:** Psa 110:1

‘MAMAE-NONOANA au gulau i riwei,

Au oieu ma kiala
da am gavia

au ae karem da ma tuvaidoedoei.’

(Psalm 110:1)

³⁷—David, tauoina wei gulauna i ġorei bada. Ma menanare da badana lamna, David natuna?” Patara ġaeġaena riwana i nonori ma i vinuaiiai.

Iesu, Tarawatu Babadai ai kaua i babaniei

(Matthew 23:1-36; Luke 20:45-47)

³⁸ Ma Iesu, tau i viararamani i pa, “Tarawatu babadai ona rovoei. Ai gara manamanai ma e bababara nae au deba da rava tau i vivivirei. ³⁹ Tau i anikiala vinevinei pari au numana ma au torela, gabu aiaii e vaivaia. ⁴⁰ Tau i, kaikaiaababa e morumoru ma ai numa e kwalekwalei, e morumoru ma e raraupari-vai-manamanawa. Tau i ai kovoġa ina apoapoe guratana.”

Kaiababa ana pulo

(Luke 21:1-4)

⁴¹ Ma Iesu, pulo aniterenana au baba ġelauna i kiala ma rava i ‘nananai mane i tereterei. Rava maġamaġau i vivimanei, mane maġamaġau i terei. ⁴² Wate kaiababa molamolakana i nei ma mane muomuoi ruaġa i terei, ruvana i aburu kaua. ⁴³ Ana tauvotaġotaġo i ġorei ma i riwei, “Anina a ririwemi, wei kaiababa molamolakana i tere-guratei, eġa me tau i ġelau. ⁴⁴ Tau i ġelau ai maurei i verena, wate wei kaiababa molaka ma ġarinei anatapuna i terei, ana anilawana anatapuna.”

13

Iesu i riwa da rava God ana Tempol ina rikai

(Matthew 24:1-2; Luke 21:5-6)

¹ Iesu, Tempol i nene-tawanei ma ana tauvotaġotaġo tagogi i riwa, “Tau-viararamana! Numa i viġulau ġaġa ma numa ġaimai i rata ġaġa.”

² Iesu i paribelei, “Wei numai ġaeġaei u inanai, eġa ġaimai tagogi, turana au tepana ina mae. Ġaima anatapui ina rikai.”

Rava ina vinuapoapoe kaua. Iesu ana tauvotaġotaġo ina vipatutu

(Matthew 24:3-14; Luke 21:7-19)

³ Iesu i kiakiala au ola *Olives*, Tempol au navanavaġela ma Peter, James, John ma Andrew i nei ma i vitaraviravirana govaġei ⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, tau i riwei, “Ona inana kaua da eġa aiaii ina terevaideġaimi! ⁶ Rava maġamaġau i, wavauei ina nei ma ina riwa, “Tau Keriso tauvilawana!” Ma rava maġamaġau i terevaideġai. ⁷ Ma maranai viġavia ona nonori ma viġavia aueia riwana ona nonori; eġa ona rovo! Wei kauai anina da ina tupua, wate wei eġa damona. ⁸ Dam, damai ina viġavia vivira ma dobu, dobuai ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviera e vivikarei maranai e vivinatuna.

⁹ —Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaġotaġoiu. Ma tau i awarii, Riwa Aiaina ona raugugulei. ¹⁰ Riwana Aiaina ona raugugulei rava anatapui awari ma muriai damona ina nei. ¹¹ Ma maranai i panimi ma i etaremi. Eġa ona vinuabola da aiwai ona latoni. Aiwai riwana God i veremi, lamna ona latoni. Aiwai

o latoni lamna eġa taumi ota babani, wate Arua Vivivireina. ¹² Rava, vareina ina verenei da ina virageṇi. Ma ama, natunatuna ina verenei da ina virageṇi. Ma roaroa, amamai ma aloloi ina viġaviei da ina iraġe. ¹³ Rava anatapui ina geduaiemi tau aubaiu. Wate aiai da e maimairi-jijina da au damona, tauna ina lawana.”

Iniviarā ġaeġaena ana mara

(Matthew 24:15-28; Luke 21:20-24)

¹⁴ “Maranai ‘Kaua apoapoe kaukauana’* e maimairi mepa avena ita mairi. (Buka tauiaavana wei ina aramane i anona aiwai). Taii aiavoi au Judea ina ruba laġilaġina au ola. ¹⁵ Aiai numa au tepana eġa ina ġaira bo ina rui au numa da aiwai ina vaia. ¹⁶ Aiai au wapu eġa ina naeme au numa da ana gara ina vaia. ¹⁷ Ma iniviarā ġaeġaena, waivine duaduamā ma taii da e viviġuġu awari nai au marana! ¹⁸ God awarina ona raupari da wei kauai eġa au bodu ina tupua. ¹⁹ ✧Ma nai au marana amapo iniviarā ġaeġaena. Ma maranai God dobu i kauēi, iniviarā ġaeġaena eġa nanare ita tupua ma amapo eġa nanare ina tupua me. ²⁰ Wate BADA nai marana ina vitupoi. Mepa da eġa ina vitupoi, rava anatapui ina iraġe. Wate rava, tauna ana vinevine ina vilawani lamna aubaina mara ina vitupoi.

²¹⁻²² —Muriai keriso tauvilawana morumorui ma peroveta moru-morui ina nei ma mataira ma kaua babai ina kauēi ma ina kauana dadane i da God ana vinevine maiteni ita terevaideġai. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eġa ona vitumaġane i! ²³ Ona inana kaua; anatapuna a riwana-nonoemi!”

Rava Natuna ana nei

(Matthew 24:29-31; Luke 21:25-28)

²⁴ Iesu wenanare i riwa, “Ma iniviarā ġaeġaena au murina.

Madēġa eġa ina rarana

ma nawaravi eġa ina lalai.

(Isaiah 13:10)

²⁵ *Ma ubona mare i ina peu*

ma rewapana ġelau i au aidamo ina gui.

(Isaiah 34:4)

²⁶ ✧—Nai maranaina, *Rava Natuna ana rewapanana ma ana borumana apauēi ina nei.* ²⁷ Ma Tauna, ana anela ina paritawane i dobu au anatapuna da rava tauna ana vinevine ina tuarui dobu au damona da dobu ġela au damona.”

Damala ana awanaina

(Matthew 24:32-35; Luke 21:29-33)

²⁸ “Damala aina ana awanaina ona aramane i. Maranai ai e numonumoi, lamna ona aramane i da maura e tuturiai. ²⁹ Ma nanare, maranai wei kauai anatapui ina tuputupua, ona aramane i da Rava Natuna i turia i; au metaeta i ġetai. ³⁰ Anina a ririwemi da wei kauai au naona ina tupua ma muriai da rava marina lawalawai i ina iraġe. ³¹ Mara ma dobu ina amoa. Wate riwau eġa ina amoa.”

Bada ainelana ana nei i aramane i

(Matthew 24:36-44)

³² “Ma eġa aiai ita aramane i nai marana bo madēġa aiwai ina nei. Anela au mara eġa ita aramane i ma Natuna eġa ita aramane i. Amana, tauna ava

* **13:14:** Eng. *Abomination of Desolation* Dan 9:27 11:31 & 12:11 ✧ **13:19:** Da 12:1 ✧ **13:26:** Da 7:13

i aramanei. ³³ Ona vineneġana ma matami ina kala!† Eġa ota aramanei mara aiwai, wei kauai ina tupua. ³⁴ Wei me rava ana numa i netawanei ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kauai. Ma tauvineneġana i riwei da ita vineneġana. ³⁵ Ona vineneġana! Eġa ota aramanei mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai. ³⁶ Ma eġa matamatavemi ina nelaġaimi. ³⁷ Aiwai riwana a ririwemi, riwana tagogina rava anatapai a riwei, ona vineneġana!”

14

Jew ai babada, Iesu i oġei da ita viraġeni
(Matthew 26:1-5; Luke 22:1-2; John 11:45-53)

¹ *Au pom ruaġa muriai da Raġona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govogovaġanei Iesu ita vunui. ² Ma i riwa, “Au torela wei kauai eġa tana kauai, mepa da viġaiġaiawa ġaēġaena ina tupua.”

Wavine, daji ġabuġabuna Iesu au kolana i waġi
(Matthew 26:6-13; John 12:1-8)

³ Maranai Iesu au Bethani, Simon i ġoreġorei lepeleperana ana au numa i kiala ma i amam. Wavine, waġi wavana alabaster i voai ma i ġeta ma waġi uana i vogai ma daji ġabuġabuna, maiana ġaēġaena e ġoreġorei *nard*, Iesu au kolana i waġi. ⁴ Rava ġelau kampa i mamae i ġaiawa ma i riwa, “Aiwai aubaina daji u vikalokaloei? ⁵ Wei dajina ita gimarei 300 *denarii* † ruvana ma manena molamolakai ita verei.” Ma tau, wavine i vienenei.

⁶ Wate Iesu i riwa, “Ona voterei! Aiwai aubaina o vinuabolai? Tauna, kaua aiaina awariu i kauai. ⁷ Molamolakai awarimi e mamae-nonoa ma ona ġoei ma tau ona voagui. Wate tau awarimi eġa ata mamae-nonoa. ⁸ Wavine ana nola i kauai. Tauna, dajiei tupuau i vokaukauana-nonoei vikokoaga aubaina.† ⁹ A ririwana-kauemi, mepa Riwana Aiaina i raugugulei dobu au anatapai, wei wavinena aiwai i kaukaui ina babaniei, ma eġa nuanuai ina vuru.”

¹⁰ Judas Iskariotei tauna Apasol tagogi, Pirisi Babadai awari i ġeta da Iesu ita vibenabenamei. ¹¹ Tau i vinuaii kaua maranai wei i nonori ma Judas i parivainuaġani da mane ita verei. Ma Judas i nana da mepa gavogavo ita inanai da Iesu ita amverenei.

Iesu ma Apasol, Raġona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukaui aubaim?”

¹³ Iesu, tau ruaġa i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġoi. ¹⁴ Au numana e ruiuiiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona

† **13:33:** Wedau Evanelia i girumi, ma i raupari, wate buka wadubo nonoana wei eġa ita mamae, Luk 21:16 kampa ona inanai da e mamae. ✱ **14:1:** Exo 12:1-27 * **14:1:** Raġona (passover) Exo 12:1 Palawa eġa yist maiteni (Unleavened-Bread) Exo 12:17 & 23:15 † **14:5:** Wei lamna me taubagibagi ana maia madeġa tagogi aubaina. † **14:8:** Mai Jew ai kaua da taubeu dajiei e bulobuloi muriai au kokoaga e tereterei.

torelana ana ani?" 15 "Ma tauna, numa vatavatara ina viatataiemi i vokaukauana-nonoei ma kampa aubaita ona vokaukaua."

16 Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

17 Au i biga ma Iesu i nei Apasol maiteni. 18 Taui au kepacepa i amam ma Iesu i riwa, "Anina a ririwemi. Taumi tagogi ina vibenabenameu; tagogi weka maiteni amam."

19 Tauvotaġotaġo i vinuabola ma tagotagogi ava i pa, "Eġa tau tapa?"

20 Iesu i paribelei, "Taumi tagogi weka palawa e vivigalo i au aboma tau maiteni. 21 Wariaġa i girugirumia nanare, Rava Natuna ina iraġe. Wate aiai da Rava Natuna i vibenabenamei; tauna, kovoġa ġaeġaena ina vaia! I aii da alona avena ita vinatunei."

22 Maranai i amam ma Iesu palawa i vaia ma i viegualau, i vogimagimai ma Tauvotaġotaġo i verei ma i riwa, "Ona vaia; wei tupuau."

23 Anina ma *wine* kelakana i vaia ma i viegualau ma i verei da anatapui i umei, 24 ✱ "Wei tau tarau i toi rava maġamaġaui aubai ma au parivain-uagana bagibagina ina vovai-virewapani. 25 Anina a ririwemi, *wine* eġa ana uma-melei da maranai God ana rava aubai ana vigulau."

26 Ma tau i voepaepa welana i ravi ma i ġae au *Ola Olives*.

Peter, Iesu ina boviei

(*Matthew 26:31-35; Luke 22:31-34; John 13:36-38*)

27 Iesu, tau i riwei "I girumi nanare,

God i riwa, '*Tauviġamoġamo ana viraġeni ma sipu ina vilamonei.*' (*Zekariah 13:7*)

Ma nanare anatapumi ona ruba-tawaneu. 28 Wate au vomairi au murina ana aivinao au Galili."

29 Peter i riwa, "Mepa da anatapui ina rubatawanem, wate eġa tau!"

30 Iesu, Peter i riwei, "A ririwana-kauem da amadodo waguvarai muriai da kokorereko ina tou mara ruaġa; tam mara tonuġa ma bovieu."

31 Wate Peter, ponana i bagibagi ma i riwa, "Avena mepa da tau, tam maiteni ana iraġe. Eġa melanai ana boviemi!" Ma tau i ġelaui riwana tagogina i latoni.

Iesu au Gethsemani i raraupari

(*Matthew 26:36-46; Luke 22:39-46*)

32 Ma au Gethsemani i ġeta ma Iesu, ana tauvotaġotaġo i riwei, "Weka ona kiala ma ana raupari." 33 Ma Peter, James ma John i taravaini ma nuanuana i raġe ma nuanuana i bola-kauei. 34 Ma tau i riwei, "Au nuabola i rata kaua au orau da e vunuvunui. Weka ona mae ma ona vineneġana."

35 Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei. 36 I riwa i pa, "*Abba* Amau! Aiwai anatapuna tagotagogina tam awarim. Wei kovoġa kelakana ma vaitawanei. Wate eġa tau au ġoana, wate tam am ġoana."

37 Ma Iesu i nememei ma tau i tonuġa rarau-nuavurui i nelaġai. Ma Peter i riwei, "Simon! Š tam aiwai matavena? Mara aburuna uta vineneġana bo eġa?" 38 Ma Iesu, tau i riwei, "Ona vineneġana ma ona raupari da eġa au raelara ona peu! Arua e ġoeġoei, wate tupua i ġokokokara."

✱ 14:24: Exo 24:8; Jer 31:31-34 § 14:37: Au Mrk 3:16 Simon wavana i virai da Peter.

³⁹ Ma i naeme ma parina tagogina i raupariei. ⁴⁰ Maranai i nememei ma i nelaġai, i matamatave; tau, matai i vitai. Ma tau eġa ita aramanei aiwai ita riwei.

⁴¹ Mara vitonuina i nene-memei ma tau i riwei, “Taumi amapo ona matamatave ma laumi ina tautau? Anina! Mara i ġetai, ona inana. Rava Natuna ina vibenabenamei ġo’apoapoe ravai au urai. ⁴² Ona vomairi; tana nae; ona inana! Tauvibenabenameu e nenei!”

Iesu i pani

(Matthew 26:47-56; Luke 22:47-53; John 18:3-12)

⁴³ Iesu i bababani ma Judas, tauna ana Tauvotaġotaġo tagogi i ġetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai. ⁴⁴ Muriai da Iesu awarina ita ġeta; Judas, patara ai mataira i verei, “Orotona ana vigia laġolaġonei; nai tauna. Ona pani ma ona naiei ma ona inana-kauei!”

⁴⁵ Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laġolaġonei. ⁴⁶ Ma tau, Iesu i vojijini ma i pani. ⁴⁷ Ma tagogi kampa i maimairi, ana sword i taina-lavui ma Pirisi ġeġetelarana ana taunola taniġana i borituini. ⁴⁸ Ma Iesu, tau i riwei, “Taumi ana apiami o nei da ota panu bo, apamina tau amkwalakwalau? ⁴⁹ Marana patapatai taumi maiteni ta mamae au Tempol ma a viararamana ma eġa ota panu. Ma i girugirumia nanare, ina tupua.”

⁵⁰ Ma Tauvotaġotaġo anatapui, Iesu i voterei ma i ruba-tawanei.

⁵¹ Ma laraga tagogi, i vikareko ma Iesu i votaġotaġoi. Tau i ġoei da ita vojijini, ⁵² wate ana kareko i vojijini ma tauna ana kovakovana i ruba.

Tau, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

⁵³ Ma tau, Iesu i naiei Pirisi Ġeġetelarana. Pirisi Babadai, dogadogara ma Tarawatu Babadai mepa i vitagogieiana. ⁵⁴ Ma Peter i votaġotaġo da Pirisi Ġeġetelarana ana numa. Ma ana au debadeba, purusimani maiteni i kiala ma i viviairara. ⁵⁵ Pirisi Babadai ma mai Jew ai boru ġeġetelarana,* Iesu ana apoapoe i baiei da ita viraġeni; ma i baiana-avei. ⁵⁶ Matamata maġamaġau, Iesu i viwavu-morumoruei, wate ai viwavu taputapunei ava.

⁵⁷ Ma ġelaui i vomairi ma wei wavuna morumoruna i kauei Iesu awarina, ⁵⁸ “Tauai a nonori tauna i riwa, ‘Wei tempolna i voavoai. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai.” ⁵⁹ Wate nanare ai viwavu taputapunei ava.

⁶⁰ Pirisi ġeġetelarana i mairi tau au naoi ma Iesu i vitara-virevirei, “Wei ravai e viviwavuim ma eġa aiwai ma paribelei bo?”

⁶¹ Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaiaianana Natuna bo?”

⁶² ✠Iesu i paribelana, “Tau tauna! Ma Rava Natuna ona inana, Vivirewapanana au oiena ina kiala ma mara ladanei ina nei.

⁶³ Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina matamata ġelaui tana ġoei? ⁶⁴ Taumi, vijiboġa o nonori ma ami nota aiwai?”

* **14:55:** Mai Jew e ġoreġorei Sanhedrin. † **14:61:** Isaiah i parivereta da Keriso ana au iraġe eġa ina gagaloana-melei. (Isa 53:7). ✠ **14:62:** Da 7:13

Tau i anapui i riwa, “Tauna ana ʻgoʻapoapoe aubaina anina da ina iraʻe!”

⁶⁵ Ma ʻgelau i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

⁶⁶ Ma Peter au gabaura i mamae ma Pirisi ʻgegetelarana ana taunola guguini i ʻgetai. ⁶⁷ Maranai tauna, Peter i ʻnanai i viviairara; ma i ʻnana-tunutunui ma i riwa, “Tam maiteni Iesu Nasaretei, ana tauvotaʻgotaʻgo!”

⁶⁸ Wate tauna i bovi ma i riwa, “Eʻga ata aramanei aiwai e bababaniei, a vinuanainei!” Ma i tuopu au metaeta ma [kokorereko i tou†].

⁶⁹ Taunola guguini, Peter i ʻnanai ma i raukarena-melei ma rava au ʻgeregere i maimairi i riwei, “Wei ravana, tau tagogi!” ⁷⁰ Wate Peter i bovi me.

Mara aburuna muriai, tau au ʻgeregere i maimairi, Peter i riwana-melei, “Tam anina, tau tagogi; aubaina tam, Galiliei!” ⁷¹ Ma Peter i riwa, “God au matana, tau a ririwa kaua, ravana o ririweia a vivinuanainei!”

⁷² Maratagogi kokorereko i tou mara viruaina ma Peter, Iesu riwana i notai - *Muriei da kokorereko ina tou mara ruaʻga, tam mara tonuʻga ma bovieu*. Ma Peter i vinuabola kaua ma i tou.

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

¹ Ubaubani boiboʻgi, pirisi babadai ma dogadogara ma tarawatu babadai anapui i viboru* ma i vianina da Iesu i pani ma i veredamanei Pilate au urana. ² Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.” ³ Pirisi Babadai e viviwavuim kaua maʻgamaʻgauri aubai. ⁴ Ma nanare Pilate, Iesu i vitaraviravirana-melei i pa, “Tam ma paribelana bo eʻga? Ma nonori e viviwavuim kaua maʻgamaʻgauri aubai!” ⁵ Wate Iesu i genuana ma eʻga ita paribelei. Ma Pilate i ba kaua.†

Iesu ana iraʻe i vianinei

(Matthew 27:15-38; Luke 23:13-25; John 18:39-19:16)

⁶ Tau ai kaua maemaena da Raʻgona Torelana au marana, Pilate, panipani tagogi, rava ai ʻgoanei e ruperupeni ma e vovoterei da e nene. ⁷ Oroto tagogi wavana Barabas; tauna Rome gabemani i viʻgaviei ma i pani da panipani au numana i mamae. Ana rava maiteni tauviraʻgena. ⁸ Ma patara i ʻgeta da Pilate ita vibagai da panipani tagogi ita rupeni Raʻgona Torelana au marana. ⁹⁻¹⁰ Pilate i paribelei, “Taumi o ʻgoeʻgoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina. ¹¹ Wate Pirisi Babadai, patara i egari da Pilate, Barabas ita rupeni ma eʻga Iesu. ¹² Pilate, patara i paridadana-melei i pa, “Tauna o ʻgoreʻgoreia mai Jew ai gulau mena ana kauanei?” ¹³ Tau i garara, “Ma tuparatui!” ¹⁴ Pilate i riwa, “Aiwai apoapoenā i kauē?” Ma tau i garara gurātana, “Ma tuparatui!”

† **14:68:** Wei riwana buka au wadubo nonoana eʻga ita mamae. * **15:1:** Mrk 14:55 Sanhedrin

† **15:5:** Mai Rome ai tarawatu e mamae da maranai i viwavuim ma tauetara eʻga uta paribelei lamna tam anina wavu ma varai.

15 Pilate i ǵoei da patara ita vinuau bai ma Barabas i rupeni ma *sorodia* i egari da Iesu i kwapui da i vitaratarai ma i naei da ita tuparatui.

Sorodia, Iesu i vinamei

(*Matthew 27:27-31; John 19:2-3*)

16 *Sorodia*, Iesu i taravaina-ruiei Pilate ana au numa ma ai rava ǵelau i ǵoreiai. 17 Ma gara lebalebarina[†] [*me gulau ana gara*] Iesu i vioteni ma kunuteia ai donadonanei i viri da au kolana i terei. 18 Ma vinamana i raukarei ma i garara, “Egualau mai Jew ai gulau!” 19 Ma kolana gonuei i raviravi ma i ovaovai. Ma ae-tutuiei i mae-ǵaira au doa ma i raudunelei ma i vivinamei. 20 Ma i vijiboǵa vorovei ma gara lebalebarina i voǵiǵi-tawanei ma ana gara i vioteni. Ma i taravaina-opunei da ita tuparatui.

Iesu i tuparatui

(*Matthew 27:32-44; Luke 23:26-43; John 19:17-37*)

21 Tau i nenaē ma Simon i nelaǵai, rava Sairinie[§] (tauna Rufus ma Alexander amai). Simon wapuei i nenei. Ma *sorodia*, tauna i egari da Iesu ana *korosi* i avarai. 22 Taui, Iesu i naiei da gabu i ǵoreǵorei Golgotha, lamna anona unu gabuna. 23 *Sorodia, wine* bunama *myrrh* maiteni i virai ma Iesu i veredadani, wate tauna i geduaiei. 24 Ma Iesu i tuparatui ma ana gara, taui ava au orai i ǵutai.*

25 Ubaubana i 9 kilok nanare, Iesu i tuparatui. 26 Aniviwavuna i girumi ma i tutui, “Mai Jew ai gulau.” 27-28 ✧ Danedanenei ruaǵa, Iesu au ririvana i tuparatui; tagogi au oiena ma ǵelauna au kelakelauna.[†]

29 ✧ Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuǵa ma voa-melei. 30 Ma vilawana-melem ma *korosiei* ma ǵairai!”

31 Ma nanare Pirisi Babadai ma Tarawatu Babadai maiteni, Iesu i vivinamei, “Rava ǵelau i vilawani, wate ainelana ita vilawana-melana-avei. 32 Keriso Tauvilawana, Israel ana gulau; marina *korosiei* ma ǵairai ma tana inana i da tana vitumaǵanei!” Danedanenei i tupatuparatui maitenai, Iesu i vinamei.

Iesu ana iraǵe

(*Matthew 27:45-56; Luke 23:44-49; John 19:28-30*)

33 Ma au benai dobu anatapuna i waguwarei da 3 kilok au bi-gai. 34 Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*” 35 Ma rava ǵelau au ǵereǵere i maimairi i nonori ma i riwa, “Ona rautaniǵanei, Elijah e kwatukwatuei!” 36 Ma rava tagogi i ruba da gara ai au damona i pani ma au *wine* tomatomana i vigaloi ma i voepai Iesu au ipirina ma i riwa,[‡] “Ona vipaipai ma tana inana i mepa da Elijah ina nei da ina tereǵairei.” 37 Ma Iesu ponana i rata ma i kwatu ma i lavutu tawanana. 38 Ma Tempol au orana anitereǵaǵara au pouna i wanasikai au tepana da i ǵaira au doa. 39 Ma *sorodia* ai bada, Iesu au naona i maimairi; i ’nanai da i lavutu tawanana ma i riwa, “Wei anina God Natuna.” 40 Waivine ǵelau

[†] 15:17: Eng. purple. § 15:21: Eng. Cyrenian. * 15:24: Taui ǵaima i tawanei me dice da aiwai aiwai garana ita vaia. ✧ 15:27-28: Isa 53:12 † 15:27-28: Giruma ǵelau waduboi vs 28 e mamea Ma aiwai i kaukaueia lamna peroveta i ririweia i tupua, Taui i ’nanai me taui ǵo’apoapoe taukauei. Isa 53:12 ✧ 15:29: Mrk 14:58 ‡ 15:36: Psa 69:21 peroveta i girumi da Keriso ita verei.

aeuia i mae ma i raraubiga: Mary Magdalene ma Mary (James keikeina ma Joses aloi) ma Salome. ⁴¹ Taui, Iesu i votaḡotaḡoi ma i vovoagui maranai au Galili i mamae ma waivine ḡelau maḡamaḡau, tauna maiteni i ḡeḡae au Jerusalem, anataui kampa.

Iesu i vikokoagei

(Matthew 27:57-61; Luke 23:50-56; John 19:38-42)

⁴²⁻⁴³ Ma au biga i tuturiai Joseph Arimatheae^{*} tauna rava ḡaeḡaena tagogi boru ḡetelarana au orana. Tauna God ana vigulau ana nei i vipaipaiei. Ma vokaukaua marana (Lamna Sabat au naona)[†] ma Joseph ana tepatorana, Pilate awarina i rui ma Iesu taubeuna i vibaḡei. ⁴⁴ Pilate i baiei da Iesu boiboḡi i raḡe. Tauna, sorodia ai bada i kwatuei ma i vitara-virevirei da Iesu i raḡe bo eḡa? ⁴⁵ Maranai sorodia ai bada i parivere i da anina riwa kaua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana ḡaeḡaena i gimara i ma Iesu tupuana i tere-ḡairei. Gare i umai ma au guba tupuana i vimataveni ma ḡaima ḡaeḡaena i kaipeuri da kokoaga metaetana i vaiatomeni. ⁴⁷ Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ḡabuḡabui i gimara i da i naiei da Iesu tupuana ita buloi.* ² Ma Sunday ubaubanai boiboḡi maranai madeḡa i gogogo, tau i nae au kokoaga. ³ Ma i nenaie ma i bababani, “Ai ai aubaita ḡaima kokoaga au metaetana ina kaipeura-tawanei?” ⁴ Maranai tau i taepai, i 'nanai da boiboḡi ḡaima i kaipeura-tawanei - ḡaima ḡaeḡae kaukauana. ⁵ Maranai i rui au guba ma oroto laragana ana gara ararapoirina i 'nanai au oiena.[†] Ma tau i orai i aupai. ⁶ Orototo laragana i riwa, “Eḡa orami ina aupai, taumi, Iesu Nasaretei o baibaiei bo? I tupatuparatua; tauna i vomairi! Ona inana, tauna eḡa weka! Tau i weka taubeuna i vimataveni. ⁷ ☆Marina ona nae ma ana tauvotaḡotaḡo ona riwei, ma Peter eḡa nuanuami ina vuru da Iesu e vivinao au Galili. Kampa ona inanai i ririwemi nanare.” ⁸ Tau i opu ma kokoagei i viruberubei ana ini sisisi ma ana rovoi. Tau i rovo kaua, lamna aubaina eḡa rava ita riwei.

Mark 16:9-20

Mark Riwana Aiaina damona lamna wariḡa i vine-boai. Ma rava ḡelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i eḡa

§ **15:40:** Au Mat 27:56, Matthew i girumijoseph ma eḡa Joses. * **15:42-43:** Eng. Arimathea.

† **15:42-43:** Mai Jew ai Sabate, madeḡa e neneulai au Friday e vivikarei da madeḡa e neneulai au Saturday e kwakwa. Mai Jew ai Tarawatu e ririwa da rava i raḡe lamna marana tagogina ina doboi. Sabate amadodo madeḡa e neneulai ina vikarei lamna aubaina Joseph i volaḡilaḡina da Iesu taubeuna ita doboi. * **16:1:** Mai Jew ai kaua maemaena da taubeu monamonei ina buloi

ma muriai ina doboi ma waivine i ḡoei da wei kauai ita votaḡotaḡoi. † **16:5:** Tupua i vimataveni au oiena i kiakiala, ana gara ararapoirina. ☆ **16:7:** Mrk 14:28

⁹ Iesu iraḡelei i vomairi me au Sunday ubaubanai boiboḡi ma i ainae da Mary Magdalene awarina i eḡa. Maraotai Iesu, Mary awarina arua-apoapoei seven i viopuni. ¹⁰ Iesu, ana tauvotaḡotaḡo i vivinuabola ma i toutou ma Mary i ḡeta da i parivere. ¹¹ Ma Mary i parivere da Iesu i lawana me ma tauna matanei Iesu i 'nanai. Wate tau i eḡa ita vitumaḡanei.

Iesu, tauvotaḡotaḡo ruaḡa awari i eḡa

¹² Wei au murina Iesu inanana tapuna ma ana tauvotaḡotaḡo ruaḡa awari i eḡa; maranai tau i nena au melagai. ¹³ Tau i naeme ma tauvotaḡotaḡo ḡelau i vieḡei. Wate tau nanare eḡa ita vitumaḡanei.

Iesu, Tau i 11 awari i eḡa

¹⁴ Muriai tau i 11 i amam ma Iesu awarii i eḡa. Ma i eni aubaina tau orai i bado ma eḡa ita vitumaḡana maranai rava, i riwei da Tauna i vomairi me. ¹⁵ *Iesu ana Apasol i riwei, “Ona nae dobu au anatapuna. Ma God Riwana Aiaina ona jimei rava anatapui awarii. ¹⁶ Aiai da i vitumaḡana ma i babataito; tauna ina lawana. Ma aiai da eḡa ita vitumaḡana ina kovoḡi. ¹⁷ Ma tau aiavoi da i vitumaḡana, rewapana ina verei da kaua babai ina kau. Ma arua-apoapoei ina viopuni ma pona tapunei ina babani. ¹⁸ Tau, mota uraiei ina vaia ma waiawa ina umai ma eḡa ina rauputei. Ma urai doridoriai au kolai ina terei ma ina lawana.”

God, Iesu i ḡaiei au Mara

¹⁹ *BADA Iesu, awari i babani vorovei. Ma tauna i ḡaiei au mara ma God au oiena i kiala. ²⁰ Tauvotaḡotaḡo i opu ma dobu au anatapuna i raraugugula. Ma BADA, tau i voagui ma kaua babai i kaukauei da tauvotaḡotaḡo aiwai i bababaniei i vovai-virewapani.

Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano gaegeaena lamna i goei da rava ita viegei da menanare Arua Vivivireina Iesu ana tauvotaḡotaḡo i rau-etaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au gia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaḡana. Tauamgiruma ana nota gaegeaena da wei bukana tauiaavana ita pariveri da kerisiana avena Rome gabe-manina ita viviḡaviei. Kerisiana vitumaḡanana lamna mai Jew ai vitumaḡana e kaukauana-paiei. Wei bukana i ḡutai da raḡaraḡana tonuḡa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana gae au murina Ekalesia au Jerusalem ai nola i vikarei;

Palestine taun ḡelaui awari i tua-nae;

Ma i tua-nae au Mediteranean da i nae au Rome paratana. Wei bukana ana kaua gaegeaena lana Arua Vivivireina i nolanola, ma rewapana tauvitumaḡana au Jerusalem i verei au Pentecost. Ma wei au bukana i vieḡeta da Arua vivivireina mara nonoa agu ma rewapana ekalesia ma ai babada i verei ai au aninola au anatapuna. Wariaga kerisiana ai pariverena i tere-tagogiei raugugula au maḡamaḡau, ma kaua ma ai nola i kaukauei anatapui. Wei au bukana i girumi da wei parivai-nuaḡanana ana rewapana tauvitumaḡana ai au lawana ma kerisiana ai au voepaepa i viatataieta.

Buka rereḡana 1.

Vokaukaua tauvimatamata aubai (1:1-26)

Iesu ana tarawatu ma ana parivainuaḡana damona (1:1-11)

Judas Epaiana (1:12-26)

Tauvimatamata au Jerusalem (2:1—8:3)

Tauvimatamata au Judea ma Samaria (8:4—12:25)

Paul ana nola (13:1—28:31)

Paul ana vaḡai tagogi (13:1—14:28)

Boru au Jerusalem (15:1-35)

Paul ana vaḡai viruaina (15:36—18:23)

Paul ana vaḡai vitonuina (18:24—21:16)

Paul i vipanipani au Jerusalem, Caesarea, ma Rome (21:17—28:31)

Iesu ana Apasol i parivainuaḡani

¹ Eḡalau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i iviaramana a pariverem

² i nae da ana gae au marana. Muriai da Iesu i gaiei au mara, Tauna Arua Vivivireinei ana apasol vinevinei riwa bagibaginei i pariveri.

³ Iesu ana iraḡe au murina i vieḡana-melei ana apasol awarii. Ma kaua maḡamaḡau i kauei da apasol i vitumaḡana kaua da Tauna anina i lawana

* 1:1: Bukana au naona i girugirumi lamna Luke ana Gospel

me. Tau i awarii i eġa au pom 40 au orana ma God ana vigulau i babanie i. ⁴ Maranai ana apasol maiteni i vitagogiei ma i riwana-guratei i pa, “Eġa Jerusalem ona oputawanei, wate pulona amau i paripari-vainuaġanimi ona paini, maraotai a ririwemi nanare. ⁵ ✱John wairei i babataito, wate mara aburuna ava Amau, Arua Vivivireinei taumi ina babataitomi.”

God Iesu i ġaiei au Mara

⁶ Muriai maranai Iesu ma Apasol i vitagogiei ma tau i Iesu i vitara-vivirei i pa, “Bada! Marina, Israel ana† vigulau ma vere-melei bo?”

⁷ Ma Iesu i paribelei, “Amau ainelana ana rewapanei mara ma iri e vivibadei, aubaina da taumi eġa ona aramanei. ⁸ ✱Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anataputa.” ⁹ ✱I babani vorovei ma au matai God Iesu i ġaiei au mara. Ma apau i nei da i purui ma tau i eġa ita inana-melei.

¹⁰ Ma tau i ġoġouta au mara ma nelara ruaġa ai gara ararapoiri au ririvai i raumairiei. ¹¹ Ma i riwa, “Mai Galili, aiwai weka o maimairiei ma o ġoġoutatei? Wei ravana menanarena o inanai i ġaenei, amapo nanare ina nememei.”

Judas epaiana i vinei

¹² Anina ma Apasol Ola Olive, i voterei ma i ġaira me au Jerusalem lamna eġa uama ma au ġereġere. ¹³ ✱Ma au Jerusalem i ġeta ma i ġae numana i mamae lana au tepana au vatavatara. Tau i ai wava, Peter, John, James ma Andrew, Philip ma Thomas, Batolomeo ma Matthew, James - Apus natuna, ma Simon tauna au naona Zealot† ma Judas - James natuna. ¹⁴ Ma wei ravai mara patapatana i vivitagogiei ma i raraupari gogona, waivine ġelaui ma Iesu ana roaroa ma aloi Mary maiteni kampa.

¹⁵ Wei au marana, tauvitumaġana 120 i vitagogiei ma Peter i vomairi ma wenanare awari i babani, ¹⁶⁻¹⁷ “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariaġa gulau David i riwei da ina tupua; ma aiwai i ririwei anina nanare i tupua.” ¹⁸ Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu. ¹⁹ Ma rava anataputi au Jerusalem wei iraġena riwana i nonori, lamna aubaina tau i nai dobuna ai ponei i viwawai Hakeldama, wei anona *Tara Doana*.

²⁰ “Wariaġa Gulau David i girugirumia, nanare i tupua,

Ana animae ina kwakwava,

ma eġa aiai au orana ina mae.

(*Psalm 69:25*)

Ma

rava ġelauna ana nola ina vaia.

(*Psalm 109:8*)

²¹ ✱Lamna aubaina marina awarita, rava ġelauna tana vinei da ina raviepaiai. Tauna ravanana Iesu maiteni ta bababara-nae madeġa tonuġa au orana, ²² John rava i babataitoi au marana ma i nae da Iesu

✱ **1:5:** Mrk 1:8 † **1:6:** Rome gabemanina Juda i vibadei wei au marana, Mai Jew wei eġa ita ġoei, ma i ġoei da ita virai. ✱ **1:8:** Mrk 16:15 ✱ **1:9:** Mrk 16:19 ✱ **1:13:** Mrk 3:16-19

† **1:13:** Rava ununurana. Wei ravai mai Rome ai gabemani e vivigaviei. ✱ **1:21:** Mrk 1:9; Mrk 16:19

i ġaiei au mara. Ma maiteni tana nola ma rava tana riwei menanarena God Iesu iragelei i vovaimairini.”

²³ Ma tau i rava ruaġa i vinei, Joseph-Barsabas (ana wava ġelauna Justus) ma Matthias. ²⁴⁻²⁵ Anina ma tau i raupari, “BADA tam rava anatapui orai u aramanei. Ma vieġelai da wei ravai ruaġa, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu.” ²⁶ Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i ġairai

¹ Pentecost torelana i ġetai ma tauvitumaġana anatapui numa tagogi au orana i vitagogiei. *

² Maratagogi gugura ġaeġaena, nonorana me ive vivirewapanana marei i ġairai ma tauvitumaġana i mamae numana i vioai. ³ Tau i purapura inanana me ai menamenana i 'nanai, i ġairai ma rava tagotagogi ava au kolai i kiala. ⁴ Ma Arua Vivivireina anatapui i vioai ma pona taputapune i ava i bababani Arua ana aguei.

⁵ Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui. ⁶ Ma patarai kampa i viruberubei, ma i nonori da gugurana lamna tauvitumaġana tau i tagotagi-giava ai ponei i bababani ma tau i ai nota i kwa. ⁷ Tau i anatapui i baei ma tau i ava i babani vivira i pa, “Wei mai Galili bo? ⁸ Ma menanarena da anataputa awarita ata ponei e bababani! ⁹⁻¹⁰ Tauta ġelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au ġereġerena, ma ġelauta mai Rome, ¹¹ ġelau mai Jew ma ġelau i Jentail wate inibori i vaia da i vimai Jew. Ma ġelauta mai Crete ma mai Arabia. Wate God kua ġaeġaena i kaukaueia, ata ponei i bababanie i ma ta nononori!” ¹² Tau i anatapui i vinuanaina, nuanuai i raġaraġa ma i bababani vivira, “Wei aiwai kauana e tuputupua?”

¹³ Wate ġelau i tau i vinamei i pa, “Wei ravai i uma bua!”

Peter rava awarii i raugugula

¹⁴ Anina ma Peter i vomairi Apasol 11 maiteni, ma ponana ġaeġaenei patara awarii i babani,

Au rava mai Jew ma anatapumi au Jerusalem maemaemi, babani ana tere-kauei da ona aramanei. Ona rautaniġana kua. ¹⁵ Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

¹⁶ Wei lamna wariaġa peroveta Joel i ririweia e tuputupua:

¹⁷ *Mara au damona,*

Aruau rava anatapui awari ana iwaġi.

§ 1:26: Wei kalona wenanare: mai Jew wava ġaima muomuoi awari i girugirumi ma e tawatawanei, ma aia i ana namba i eġa lamna tauna ina vaia. Tau i vitumaġana da wei kauana awarinei God tau ina viatataiei da aia i ita vinei. (Pro 16:33) * 2:1: Mai Jew ai Raġona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei. † 2:15: Mai Jew tau i au bigai sia e aniani ma wain e umaumai.

*Ma natunatumi nelarai ma waivinei riwau ina jimei,
ma nelara voui mataiei kaua ina inanai,
ma babada magumaguri rauboniei kaua ina inanai.*

18 *Wate nanare, Aruau ana iwaği au taunola nelarai ma waivinei awarii,
ma ina vitaubabani.*

19 *Ma kaua babai au mara ana kauiei,
ma au dobu mataira ana vieğai
ai araratana, tara ma bau potopotona.*

20 *Ma madeğa ina waguwarei
ma nawaravi ina ravitaratarai,
muriai da BADA ana mara gaeğaena ma boruborumana ina nei.*

21 *Nai au marana aiavoi da BADA awarina e viviğore agu aubaina BADA
taui ina vilawani. (Joel 2:28-32)*

22 *Ma Peter i babani me:*

*Mai Israel ona rautaniğana: God Iesu Nasaretei i vovai-virewapani da
kaua babai, ma mataira gaeğaei i kauiei da ita viatataiemi da tauna anina
Godei i nei. 23 ✧Wate God wariaga i viogei ma ana goana nanare da
Iesu au urami i terei, ma taumi go'apoapoe ravai ai aguei, Tauna au
korosi o tuparatui da o virağeni. 24 ✧Wate God, Iesu irağelei i vovaimairini,
ma irağe iniviarana i vaitawanei ma irağe eğa tagotagogina da tauna
ita vojijini. 25 Wariaga David Iesu i bababaniei maranai i riwa:*

Tau a inanai BADA God au naou mara au anatapuna.

Tauna au oieu lamna aubaina eğa ana rovo.

26 *Lamna aubaina nuaiai orau i oai ma menau i morelana,
ana irağe ma a aramanei da tupuau ma paina-kauiei.*

27 *Ma aruau eğa rava irairagei ai au dobu ma voterei,
ma tam eğa am taunola vivivireina tupuana ma voterei da ina buda.*

28 *Tam lawana etanaina u viatataieu,
ma Tam maiteni a mamae ma a vinuaiai kaua. (Psalm 16:8-11)*

29 *Au rava, a riwana-kauemi da amata gulau David i'rağe da i doboi,
ma ana kokoaga weka e mamae. 30 ✧Wate David lamna peroveta, ma
i aramanei da God i parivainuagani da ana damei gulau ina opu, me tauna
nanare. 31 Ma David i 'nanai God muriai aiwai ina kauiei ma i riwa,
Keriso ina vomairi me,*

*ma tupuana eğa rava irairagei ai au dobu ina voterei da ina buda.
(Psalm 16:10)*

32 *Ma God Iesu-na tagogina irağelei i vovaimairini, ma tauai anatapuiai
a vimatamata. 33 Ma God i gaei ma au oiena i vikialai. Ma Arua vi-
vivireina i verei me i parivainuagana nanare, ma nai Aruana tagogina
Iesu awariai i waği, lamna marina o nononori ma o inainanai. 34 ✧David
eğa ita gae au mara, ma wate i riwa, BADA au Bada i riwei, "Au oieu
ma kiala 35 ma am gavia au ae karem ana terei. (Psalm 110:1)*

36 *Lamna aubaina mai Israel anatapumi ona aramana-kauiei da wei
ravana Iesu o tupatuparatuia, God i terei da BADA ma Tauvilawana.*

37 *Ma maranai rava wei riwana i nononori, tauai orai i rautonai da
Peter ma Apasol gelaui i riwei, "Varevareiai, tauai aiwai ana kauiei da
ana lawana?"*

38 *Ma Peter i paribelei, "Taumi tagotagogi ava Iesu Keriso wavanei
ona rupena ma ona babataito ma ami go'apoapoei ina nota-tawanei, ma God*

ana pulo Arua Vivivireina ona vaia. ³⁹ Wei parivai-nuaḡanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina.”

⁴⁰ Ma Peter riwa ḡelau maiteni rava i vinua-terenei, ma i egari, “God ona vianinei da ina vilawanimi, ma eḡa kovoḡa ona vaia.” ⁴¹ Ma rava maḡamaḡau Peter ana babani i vitumaḡanei ma i babataito ma nai au marana rava 3,000 ai au boru i rui.

Tauvitumaḡana i mae gogona

⁴² Ma tauvitumaḡana Apasol ai viararamana i nononori, ma i viboruboru, i amam ma i raraupari gogona. ⁴³ Apasol kaua babai ma mataira ḡaeḡae maḡamaḡau i kaukauei ma anatapui i rovo ma God i virirana-kauai. ⁴⁴ *Ma tauvitumaḡana anatapui gabu tagogi i vivitagogiei ma aiwai ḡariei ai rava maiteni i ḡutaḡutai. ⁴⁵ Taii ai doa, ai numa, ai wapu ma ai purapura i gimagimarei ma manena ai rava ḡelau maiteni i ḡutaḡutai. ⁴⁶ Taii mara patapatai au tempol i vivitagogiei, ma ai au numa ana nuaiaii ma ana morelanai i amam gogona. ⁴⁷ Ma taui God i vovoepapai ma rava anatapui i vivinuaiaini. Ma marana patapatai rava voui i neneiai Iesu awarina ma tauvitumaḡana ai boru i viriratai.

3

Peter, oroto aena gwaḡagwaḡana i vilawani

¹ Mara tagogi au bigai 3 oklok, Peter ma John pari aubaina i ḡeḡae au Tempol. ² Ma oroto tagogi aena gwaḡagwaḡana i tupuei, ma mara au anatapuna ana rava i avavara neiai da Tempol metaetana, e ḡoreḡorei, metaeta aiaina, kampa i vivikialai ma rava i ruii tempol au orana i vivigigimanei mane aubaina. ³ Maranai i 'nanai da Peter ma John aburuna ava da au metaeta ita rui, ma i vibaḡai mane aubaina. ⁴ Peter ma John orotona i 'nana-tunutunui ma Peter i riwa, “Ma inanaiai!” ⁵ Ma orotona tau i 'nanai ma i notanotai da aiwai awarii ita vaia. ⁶ Ma Peter, orotona i riwei, “Awariu silva ma gold eḡa wate aiwai awariu lamna ana verem. Iesu Keriso Nasaretei, wavanei ma vomairi, ma babara!”

⁷ Ma Peter oroto nimana au oieina i vojijini ma i voagui da i vomairi. Ma maratagogi oroto aena ma ae kwarukwaruna i ai ma i virewapana, ⁸ ma aenei i viauepa ma babara i vikarei. Anina ma taui maiteni i rui au tempol ma tauna tempol oraninei i bababara, i viviauepa ma God i vovoepapai. ⁹ Ma rava anatapui orotona i 'nanai i bababara ma God i vovoepapai, ¹⁰ ma i aramanei da tauna ravana tagogina tempol metaetana e ḡoreḡorei *inanana aiaina* au naona, i kiakiala ma i vivigigimana. Ma rava anatapui i 'nanai aiwai i tupua wei orotona awarina ma i ba-guratana.

Peter patara awarii i babani

¹¹ Ma orotona Peter ma John i vovojijini ma rava anatapui i bana-kauai, ma i viruberubei tau awari au lovelove e ḡoreḡorei, Solomon ana lovelove.

* ¹² Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunui, apamina tauai ai rewapanei bo ai vipatutuei, wei ravana a kauai da i babara? ¹³ *Wei lamna amamata Abraham,

* **2:44:** Act 4:32-35 * **3:11:** Solomon ana lovelove tagogi tempol au orana e mamae. Wei lamna gari au ririvana ma ana tuatua maḡamaḡauna. * **3:13:** Exo 3:15

Isaac ma Jacob ai God, ana taunola Iesu i viborumei, ma taumi Tauna o verenei da ita virāgeni, ma Pilate au matana o geduaiei. Pilate i ǵoei da ita rupeni wate taumi eǵa ota vianinei. ¹⁴ ✠Iesu lamna rava vivivireina ma jijimanina, wate o geduaiei. Ma Pilate i ǵoei da Iesu ita rupeni, wate taumi o ǵoei da tauvirāgena i rupeni aubaimi. ¹⁵ Ma taumi lawana maemae-nonoana tauvereina o virāgeni, wate God i vilawana-melei, tauai wei a vimatematei. ¹⁶ Wei ravana aena gwaǵagwaǵana Iesu au wavana i vitumaǵana ma lamna aubaina i lawana. Taumi o aramanei ana doria menanare, Wate ana tumaǵana Iesu awarina i vilawani.

¹⁷ Ma au rava marina a aramanei da taumi ami babada maiteni Iesu o virāgeni, aubaina taumi eǵa ota aramanei da tauna tauvilawana. ¹⁸ Wate wei lamna wariāǵa God ana peroveta anapapui i ririweia i tupua, God i riwa da ana tauvilawana ina vinuapoapoe. ¹⁹ Ami ǵoa apoapoe Ona voterei ma ona mae-taviremi God awarina da tauna ami ǵo'apoapoe ina nota-tawanei. ²⁰ Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneiai. ²¹ Iesu au Mara ina mae da God kaua anapapui ina ravivouni, me God ana peroveta vivivirei wariāǵa i ririweia nanare. ²² ✠Moses i riwa, “BADA ami God peroveta, me tau nanare, ina terei ma tauna ami dam oinei ina nei. Ma aiwai anapapuna e ririwemi ona rautaniǵanana-kauai. † ²³ ✠Ma aiai da wei perovetana eǵa ina rautaniǵanei lamna God ana rava awariei ina vilamonei.”

²⁴ Peroveta Samuel ma muriai Peroveta maǵamaǵau, kaua i ririweia marina e tuputupua. ²⁵ ✠Taumi nai perovetai natunatui ma taumi maiteni parivainuāǵana bagibagina au orana. Au baina God Abraham i riwei, “Am epaepaia awariei dam anapapui au dobu ana viaiaini.” ²⁶ Ma maranai God ana taunola i vinei, ma au naona i paritawaneiai awarimi da ita viaiainimi, ma lamnei taumi tagotagogi ava ami ǵo'apoapoe ota opu-tawanei ma ota nei Tauna awarina.

4

Jew babadai Peter ma John i etarei

¹ Peter ma John rava awari i bababani ma pirisi pulo tauapuina ma tempol taupainii* ai bada ma Sadusi ǵelau † i ǵetai. ² Tai amloi i ǵaiǵai kaua Peter ma John awari aubaina tau i viviararamana da God, Iesu iraǵelei i vovaimairini ma wei i viatataiana da God rava anapapui iraǵelei ina vovaimairini. ³ Tai Peter ma John i pani ma au i pom aubaina panipani au numana i terei da i mae mara. ⁴ Wate rava maǵamaǵau riwa i nonori ma i vitumaǵana, ma ai maǵa nelara 5,000 waivine eǵa ita iavi.

⁵ Ma mara i tom ma Jew babadai, dogadogara ma tarawatu babadai au Jerusalem i vitagogiei. ⁶ Ma pirisi ǵeǵetelarana Annas kampa ma Caiaphas, John, Alexander ma pirisi ǵeǵetelarana ana rava maiteni. ‡ ⁷ Ma tau Peter

✠ 3:14: Mrk 15:6-14 ✠ 3:22: Deu 18:15, 18 † 3:22: Mai Jew e ririwa da Moses lamna ai peroveta ǵaeǵaena. ✠ 3:23: Deu 18:19 ✠ 3:25: Gen 22:18 * 4:1: Tempol tau-painina lamna anapapuna au tempol e inainana-vaitetei (purusimani). Tai pirisi ǵeǵetelarana ana taunola. † 4:1: Sadusi tau iraǵelei vomairime eǵa ita vitumaǵanei ‡ 4:6: Mai Rome Caiaphas i vinei da Pirisi ǵeǵetelarana, poiana Annas epaiana. Wate mai Jew ai au ǵiu da aiai pirisi ǵeǵetelarana vaivaina i vaia, tauna anina ina mae da au iraǵe. Luke e ririwa da Annas tauna pirisi ǵeǵetelarana.

ma John i neiei da au naoi i vimairini ma i riwei, “Aiwai rewapananei, ma aiai wavanei wei o kauēi?”

⁸ Arua Vivivireina Peter orana i vioai ma tau i riwei, “Rava ai babada ma dogadogara; ⁹ tauai kaua aiaina a kauēi gwaḡagwaḡana awarina ma amadodo taumi o vitara-virevirelai, da menanare tauna i lawananei. ¹⁰ Ma wei ona aramana-kauēi, da taumi ma mai Israel anatapui, da Iesu Keriso Nasaretei o tuparatui, Wate God tauna iraḡelei i vovaimairini ma tauna wavanei wei orotona au naomi lawalawaina e maimairi. ¹¹ Taumi tauvoa nai ḡaimana o geduaiei, wate wei ḡaimana lamna numa ogona, numa ana tapuna e vovojijini. §

¹² —Lamna aubaina Iesu ainelana ina vilawanita. Ma God eḡa aiai ḡelauna au dobu rewapana ita verei da ina vilawana.”

¹³ Ma tau i Peter ma John ai tepatora inanai ma maranai i aramanei da tau i eḡa girugirumai, ma i baei. Ma i aramanei da tau i Iesu ana tau-votaḡotago. ¹⁴ Ma wate i ‘nanai oroto i vivilawania Peter ma John maiteni i maimairi, lamna maranai tau i gamoi i pota. ¹⁵ Anina ma Peter ma John i riwei da boru gabuna i opu-tawanei, ma tau i ava i vitarairavira vivira. ¹⁶ Tau i vitaraviravira-viravira i pa, “Aiwai tana kauēi wei nelarai awari? Rava anatapui au Jerusalem i aramanei da tau i kaua babai i kaukauēi, lamna eḡa tana boviei. ¹⁷ Wate tana viḡaei da wei kauai eḡa ina tua rava ḡelaui awari, ma riwa bagibaginei tana viḡaei da eḡa aiai awarina Iesu wavanei ina raugugula.”

¹⁸ Anina ma tau i ḡorei da i rui me, ma riwa bagibaginei i viḡaei da eḡa aiai awarina Iesu wavanei ina raugugula bo ina viararamana. ¹⁹ Wate Peter ma John tau i paribelei, “Taumi ami nota aiwai. Tauai God ana voteletelei bo taumi? ²⁰ Tauai aiwai a inainanaia ma a nononoria babanina eḡa ana voterei.”

²¹⁻²² Wei Orotona i vivilawani lamna gwaḡagwaḡana ma ana madeḡa 40. Lamna aubaina rava anatapui God i vovoepaepai, ma babada eḡa ita aramanei menanare Peter ma John ina kovoḡanei. Ma i parivairovorovo-melei ma i paritawanei da i nae.

Tauvitumaḡana God i vibaḡai agu aubaina.

²³ Peter ma John i nae me ai rava awari ma pirisi ḡaeḡaei ma dogadogara aiwai i ririweia tau i vieḡei. ²⁴ ✧ Maranai tauvitumaḡana wei riwana i nonori, tau i anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maemaei taukaueina. ²⁵ Tam Arua Vivivireinei am taunola, amai ai David gamonei u babani ma u riwa,

Aiwai aubaina rava awariai e mejimeji,

ma aiwai aubaina ai oga e taratara labalabai?

²⁶ *Ma dobu ai gulagulau i vokaukaua ma babada ḡaeḡaei ḡelaui maiteni i vitagogiei da*

BADA ma ana tauvilawana maiteni i viḡaviei. (Psalm 2:1)*

²⁷ ✧ Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am

§ 4:11: Mai Jew ai numa ḡaimēi i voavoai. Iesu tauna anina God ana Tempol vouna ogona. (Eph 2:19-21, Isa 28:16). ✧ 4:24: Exo 20:11 * 4:26: Wei lamna Keriso. ✧ 4:27: Mrk 15:1

taunola vivivireina Iesu u bulobuloia i viġaviei. ²⁸ Ma tam am rewapanai ma am ġoanei am oga menanare u tarataranei marina nanare i tupua. ²⁹ BADA, nai ravai ai parivai-rovorovo au uram ma am taunola ma vovai-virewapani da ana tepatorai riwam ina raugugulei. ³⁰ Uram ma viloloi da ma vilawana ma kaua babai ma mataira ġaēgaei ma kauai, am taunola Vivivireina Iesu wavanei.

³¹ Ma pari au murina, tau i mepa i vivitagogiei gabuna i vigo. Ma Arua Vivivireina anatapu i orai i vioai. Ma ana tepatorai God riwana i raugugulei.

Tauvitumaġana ġariei i ġutaġutai

³² *Tauvitumaġana anatapu i ai nota ma orai tagogi. Ma ai purapura tagogi ma eġa aiwai ita nuanei. ³³ Ma Apasol ana tepatorai ma rewapanai BADA Iesu ana i-raġe, ma ana vomairi me i raugugulei. Ma God ana viaiaina ġaēgaena tau i anatapu i awari i peu. ³⁴⁻³⁵ Ma tau i au orai eġa aiwai ita voladaġei aubaina, ai rava ġelaui ai doa bo ai numa i gimagimarei ma manena i neneiai Apasol awari i tereterei, ma aiwai da aiwai i vovoladaġei nanare i vovoagui.

³⁶ Me Joseph, tauna Levi ana damei, au Saipras i tupua, ma Apasol tauna i ġoreġorei Barnabas, wei wavana anona lamna tauduġu. ³⁷ Tauna ana doa i gimarei, ma manena i neiai da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i gimarei. ² Ma airuaġa i vianina tagogi da mane navanavana i nuanei, ma Ananias mane navanavana i naiei da Apasol awari i terei.

³ Anina ma Peter tauna i vitaravirevirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagimarei manena navanavana u nuanei? ⁴ Doa lamna tam ġarimei da uta gimarei bo eġa. Ma maranai u gimarei lamna manena tam ġarimei da uta verenei, aiwai aubaina nota apoapoeni au oram i rui? Tam eġa rava awarina uta moru, wate God awarina u moru.” ⁵⁻⁶ Maranaina Ananias wei riwana i nononori, tauna i peu da i-raġe. Anina ma nelara i rui da tupuana i umai ma i naiei da i doboi. Ma aiavoi da wei riwana i nonori i rovo kaua.

⁷ Tau i eġa ita mae guratana, ora tonuġa nanare ma awana i nei, aiwai i tupua eġa ita aramanei. ⁸ Ma Peter wavine i paridadanei, “Abe uta riweu, tam awam Ananias maiteni doa o gimagimarei maiana anina wei bo?” Ma tauna i paribelei, “Ee, doa maiana anina nai.”

⁹ Ma Peter i riwa, “Aiwai aubaina taumi o vianina da BADA Aruana ota raudadani? Nelarai awam i dobodobo ma inana i au metaeta da tam maiteni ina avara-opunem.”

¹⁰ Maratagogi wavine Peter au ae karena i peu da i-raġe. Maranai nelara i rui au numa ma i 'nanai da wavine i-raġe, anina ma i avara-opune i da awana au ririvana i doboi. ¹¹ Lamna maranaina ekalesia anatapu i, ma rava aiavoi da wei riwana i nonori i rovo kaua.

Apasol rava maġamaġau i vilawani

¹² Ma Apasol mataira ma aniba kauai maġamaġau i kaukaui rava awari. Ma tauvitumaġana Solomon ana au lovelove i vivitagogiei. ¹³ Wate

rava ġelau i ai au boru ruina i rovoei, wate rava tau i i vivirana-kauei. ¹⁴ Wate nelara ma waivine maġamaġau i Iesu awarina i vitumaġana ma tauvitu-maġana ai au boru i rui. ¹⁵ Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eġa da ġouna tau i ita ġouni da ita lawana. ¹⁶ Ma melagai ġelau Jerusalem au ririvana ravai maġamaġau ai rava doridoriai, ġelau arua-apoapoei i rui ruinia i neiai ma anatapui i vilawani.

¹⁷ Anina ma pirisi ġeġetelarana ma ana rava mai Sadusi anatapui orai unura i oai. ¹⁸ Ma Apasol i pani, ma panipani au numana i terei. ¹⁹ Wate waguvarai BADA ana anela i nei da panipani numana metaetana i votawanei, ma tau i taravaina-opunei ma i riwei, ²⁰ “Ona rui tempol au orana, ona mairi ma lawana vouna riwana anatapuna rava ona pariveri.” ²¹ Anela i ririwei nanare, tau au tempol i rui ma rava viararamanai i vikarei. Nai maranai pirisi ġeġetelarana ana rava maiteni i ġetai ma boru ġaeġaena e ġoreġorei Sanhedrin i terei. Ma rava i paritawanei au panipani numana da Apasol ita neiai awari. ²² Tau panipani au numana i ġeta ma i baina-avei, ma i naeme da i vieġa. ²³ I pa, “Panipani numana anina i gudu-kauei, ma tauvipaipai au metaeta i maimairi; wate maranai tauai metaeta a votawanei lamna eġa aiai kampa.” ²⁴ Maranai tempol taupainina ai bada ma pirisi babadai wei riwana i nonori, tau i vinuanaina da aiwai i tupua.

²⁵ Ma rava tagogi i nei ma i riwa, “Ona rautaniġana! Nelara panipani au numana o teretereia, tau au tempol e maimairi ma rava e viararamani.”

²⁶ Anina ma tempol taupainina ai bada, ma babada ġelau maiteni i nae ma Apasol i neiai. Tau i rovo ma eġa ita egari mepa da rava ġaime i ita ravi.

²⁷ Ma Apasol i neiai boru ġeġetelarana au naoi, ma pirisi ġeġetelarana tau i vitara-virevirei. ²⁸ I pa, “A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tauai o vereverelai.”

²⁹ Ma Peter Apasol ġelau aubai i vitauvibabani i pa, “Tauai God ana voteletelei ma eġa rava. ³⁰ Taumi Iesu au *korosi* o tuparatui ma o virageni, wate amamata ai God Tauna i vovaimairini. ³¹ Ma marina Tauna God au oiena e kiakiala, Tauna BADA ma Tauvilawana, Da mai Israel ai ġo’apoapoe ina rupeni, ma ai ġo’apoapoe ina nota-tawanei. ³² Ma tauai Arua Vivivireina maiteni wei kauai anatapui mataielai a inanai. Ma nanare God Arua Vivivireina i paritawanei rava votelatelai awari.”

³³ Tau i wei babanina i nonori ma amloi i ġaiġai kaua, ma i ġoei da Apasol ita virageni. ³⁴ Wate Pharisi ma tarawatu badana wavana Gamaliel, rava anatapui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava.

³⁵ Anina ma ana rava i riwei, “Mai Israel, ona inana kaua ma muriai da aiwai wei ravai awari ona kauei. ³⁶ Mara tagogi oroto wavana Theudas viġavia i vikarei ma i kauana-melei da tauna rava ġaeġaena, ma rava ai maġa 400 nanare tauna i votaġotaġoi. Ma maranaina tauna i virageni ana tauvotaġotaġo i vilamonei ma aiwai anatapuna kampa i kwa. ³⁷ Wate tauna au murina oroto Galiliei wavana Judas i ġeta, census

au marana ma rava maġamaġau tauna i votaġotaġoi, ma tauna maiteni i virageni, ma ana tauvotaġotaġo i vilamonei. ³⁸ Lamna aubaina a ririwemi da wei ravai ona voteretawanei! Mepa da tau i ai nola ravei, amapo ina peu.

³⁹ Wate mepa da Godei, taumi eḡa tagotagogina da wei ravai ona viḡaei, taumi mepa da God o viviḡaviei.”

⁴⁰ Tauī Gamaliel ana babani i voteletelei. Ma Apasol i riwei da i rui, ma i wipiei i kwapui ma i viḡaei da Iesu wavanei ina jima, ma i paritawanei da i nae.

⁴¹ Aubaina i aramanei da God tauī i vinei da Iesu wavana aubaina ina vinuapopoe. Anina ma Apasol ana nuaiāi Sanhedrin i opu-tawanei, ⁴² Tauī mara patapatana tempol au orana ma au numa God riwana aiaina i raraugugulei ma i viviararamana da Iesu tauna Keriso.

6

Stephen i vinei tauvoaḡu

¹ Tauvitumaḡana ai boru i rarata, ma au orai mai Jew Greek taubabanieina, mai Jew kampa maemaei i viamparipariei. Tauī i beubeura da ai kaikaiaababa ai ḡuta eḡa ita tereterei. ² Anina ma Apasol 12 tauvitumaḡana ai boru i raukwatuei. Ma i riwei, “Tauai Apasol ma ai nola lamna God riwana ata jimejime i ma avena mane nolana maiteni ata kaukauei. ³ Lamna aubaina au rava, awarimi rava 7 ona vinei, tauī orai Arua Vivivireina i oai ma nuaulaulai da wei nolana ina kauēi, ⁴ Ma tauai ai nola da pari ma God riwana ava ana jimeī.”

⁵ Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumaḡana God awarina i rata kaua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana. ⁶ Ma wei ravai i neiāi ma Apasol nimai tauī au tepai i terei ma i raupariei.

⁷ Anina ma God riwana i vituai ma au Jerusalem rava maḡamaḡau i Iesu i vitumaḡanei, ma nanare pirisi maḡamaḡau i vitumaḡana.

Stephen i pani

⁸ Anina ma God Stephen i viaiaini ma i vovai-virewapani da mataira ma kaua babai i kaukauei rava awari. ⁹ Wate mai Jew ḡelau provins nununai i nei mai au Sairini, mai Alexandria, ma Silisia ma Eisia ai parinumana e ḡoreḡorei panipani *waduboi, Stephen ana ḡavia i vomairi. ¹⁰ Wate Arua Vivivireina, Stephen nuaulaula ma riwa i verei ma i bababani da tauī i vigamopotai. ¹¹ Lamna aubaina tauī rava ḡelau i gwalai da moruei Stephen ita vibenabenamei, ma ita riwa, “Tauai a nonori Stephen, Moses ma God i vivijiboḡi.” ¹² Ma lamnei patara i viamlo-ḡaiḡaini, dogadogara ma tarawatu babada i maiteni. Anina ma tauī Stephen i vojijini ma i naiei mai Jew ai Boru Ḡegetelarana† awarina. ¹³ Ma tauī rava ḡelau i neiāi da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i vivijiboḡi. ¹⁴ Tauai a nonori i riwa da Iesu Nasaretei tempol ina rikai ma tarawatu Moses i verevereta anatapui maiteni ina virai.”

¹⁵ Ma rava anatapui nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

* **6:9:** Wei ravai lamna slave waduboi, marina i voterei da ana ḡoanei e mamae. Sanhedrin.

† **6:12:**

7

Stephen ana babani.

¹ Anina ma Pirisi ġeġetlarana Stephen i paridadanei, “Wei viwawuna, riwa kaua bo?” ² Stephen i paribelei:

Varevareiu ma amamau, au babani ona rautaniġanei. God boruborumanana noita Abraham awarina i eġa au Mesopotamia, muriai da ita nae au Haran. ³ Ma God tauna i riwei, *Am dobu ma am dam ma netawanei da ma nae dobu ana viatataiem lana.* ⁴ Anina ma Abraham Mesopotamia i netawanei ma i nae da au Haran i mae. Amana i’raġe ma au murina God Abraham i paritawanei da marina dobuna o mamae lana kampa ita mae, ⁵ Nai maranaina God eġa Abraham doa ita verei, eġa aburu dadadana! Wate i parivainuaġani, da ina verei tauna ma ana epaepaia aubaii. Nai au marana Abraham eġa natunatuna, ⁶ ma God wenanare Abraham i riwei, *Am epaepaia au dobu ġela ina mae ma ina vitaunola, nai dobuna ravai tui ina rau-iviapoapoelei da madeġa 400 ina kwa.* ⁷ Wate ravai, *awarii e vivitaunola ana kovoġi, ma muriai mai Israel ina opui ma wei au dobuna ina voepaepaiu.* ⁸ Anina ma God inibori parivai-nuaġanana bagibagina Abraham maiteni i kauai, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapai inii i bori. Wei babadai lamna tauta noinoita.

⁹ Jacob natunatuna varej Joseph i unurei ma i gimarei da ita vitaunola au Egypt, wate God tauna awarina i mae. ¹⁰ Ma ana au nuabola i gaġaloei. Ma God nuaulaula i verei ma i kauai da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei. ¹¹ Ma gomara ġaeġaena i ġeta au Egypt ma au Canaan, ma vinuapoapoe ġaeġaena i tupua. Ma noinoita eġa ai lam. ¹² Ma maranai Jacob i nonori da au Egypt lam, ma noinoita i paritawanei au Egypt, wei ai babara naona. ¹³ Ma muriai i nae me ma wei maranai Joseph i vieġana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei. ¹⁴ Anina ma Joseph riwa i paritawanei amana Jacob awarina ma i riwei da ana numa ravai anatapai, ai maġa 75, ita nei au Egypt. ¹⁵ Anina ma Jacob i nae au Egypt. Tauna kampa i’raġe ma nanare natunatuna anatapai. ¹⁶ Taubeui i naiana-melei au Shekem ma Abraham Hamor natunatuna awarii kokoaga i gimagimaraia, kampa i vimataveni.

¹⁷ Ma maranai mara i tuġereġerei da God Abraham i paripari-vainuaġania ita kauai, ata patara i maġa guratana au Egypt. ¹⁸ Ma Pharaoh vouna au Egypt i vibada ma tauna noita Joseph eġa ita aramanei. ¹⁹ Tauna amamata i morui ma i rau-iviapoapoelei, i eġari da natunatui melamelai numei i viopuni da ita iraġe. ²⁰ Wei au marana Moses i tupua, tevera inanana aiaina. Amana ma alona natui i ġamoi da nawaravi tonuġa

☆ **7:2:** Gen 12:1 ☆ **7:4:** Gen 12:4 ☆ **7:5:** Gen 12:7; 13:15; 17:8 ☆ **7:6:** Gen 15:13-14
 ☆ **7:7:** Exo 3:12 ☆ **7:8:** Gen 17:10-14; Gen 21:2-4; Gen 25:26; Gen 29:31-35:18 ☆ **7:9:** Gen 37:28; Gen 39:2-21 ☆ **7:10:** Gen 41:39-41 ☆ **7:11:** Gen 42:1-2 ☆ **7:14:** Gen 45:9-10, 17-18
 ☆ **7:15:** Gen 46:1-7; Gen 49:33 ☆ **7:17:** Exo 1:7-8 ☆ **7:19:** Exo 1:10-11; Exo 1:22 ☆ **7:20:** Exo 2:2

i kwa. ²¹ ✧ Ma maranai tevera numei i tere-opunei, gulau natuna guguin-ina tevera i vaia ma i ġamoi da natuna. ²² Ma mai Egypt ai nuaulaula Moses i viararamani ma i virewapana, babani ma nola awarina.

²³ ✧ Moses ana madeġa 40 ma i nota da ita nae ana dam ravai ita raugenari. ²⁴ Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i viragēni. ²⁵ Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tau i wei eġa ita aramanei. ²⁶ Ma maratamna Moses i nae me ma ana rava ruaga i viġaiġaiawa i 'nanai, ma i riwei, "Taumi ava ma aiwai aubaina o viġaiġaiawa?" ²⁷ Wate ġaiawa tauvikareina Moses i vokaririei ma i riwei, "Tam aiai i terem da ma vibadelai bo tauai ai taurauetara?" ²⁸ Tam ma viragēniu me pom Egyptei u viragēni nanare bo?" ²⁹ Maranai Moses wei i nonori tauna Egypt i ruba-tawanei ma i nae au Midian, wei eġa ana dobu wate kampa i mae. Muriai dobuna wavinena i ravaġi ma natunatuna nellarai ruaga i tupua.

³⁰ ✧ Ma kampa i mae madeġa 40 i kwa ma BADA ana anela au mutulua ola Sinai au ġereġerena tauna awarina i eġa, inanana me ai menamenana ai aburuna rugurugui au orana i ġeġae. ³¹ Wei i 'nanai ma i baei ma i nae au ġereġere da ai arata ita tuvirevirei ma i nonori BADA i riwa i pa, ³² "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaġi. ³³ Ma BADA i riwa, "Am ae uma ma votawanei! Wei gabuna au tepana e maimairi, lamna doa vivivireina ma Viaiainana. ³⁴ A inanai menanare mai Egypt, natunatu e rarau-iviapoapoelei. Ai ora-tou a nonori ma a ġairai da tau i ata vai-tawanei. Ma marina ma nei, Tau ana paritawanem au Egypt."

³⁵ ✧ Stephen i riwa:

Wei Moses na tagogina, mai Israel i parivirevirei i pa, "Aiai i terem da tauai ma vibadelai ma ma rauetarelai?" Moses i paritawaneiai da ita vibademi ma ita tereopunemi, anela i eġaeġa ai menamenana au poui, ana aguei. ³⁶ ✧ Ma Moses tau i Egyptei i ravena-opunenei ma mataira babai ma vivirewapanai i kaukauei au Egypt, Boga lebalebarina ma ai au vaġai madeġa 40 au mutulua. ³⁷ ✧ Wei Moses-na tagogina, mai Israel i riwei, "God muriai peroveta ami damei ina paritawaneiai me tau." ³⁸ ✧ Moses Israel patarana maiteni Egypt i opu-tawanei i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamanei tauta awarita. ³⁹ Wate noinoita Moses i parivirevirei ma au orai i ġoei da ita nae me au Egypt. ⁴⁰ ✧ Ma tau i Aaron i riwei, "Nai ravana Moses, Egyptei i taravai-opunelai, tauai eġa ata aramanei aiwai awarina i tupua. Ma tauai ai god kokoitau ma kau i da ina rauetaraveniai." ⁴¹ ✧ Anina ma bulumakau ġaubona kokoitauna i kau i, ma pulo i apui awarina ma i amei ma i umei, da aiwai uraiei i kaukauei i vimae-ġaeġaeni. ⁴² Wate God tau i mae-puputei ma i voterei da ubona ma nawaravi ma madeġa au mara i vimae-ġaeġaeni. Wei lamna peroveta nununai i ririweia i tupua:

✧ 7:21: Exo 2:3-10 ✧ 7:23: Exo 2:11-15 ✧ 7:30: Exo 3:1-10 ✧ 7:35: Exo 2:14 ✧ 7:36: Exo 14:21; Num 14:33 ✧ 7:37: Deu 18:15, 18 ✧ 7:38: Exo 19:1-20:17 ✧ 7:40: Exo 32:1 ✧ 7:41: Exo 32:2-6

Rava mai Israel! Maranai madeḡa 40 au mutulua.

Taumi eḡa Tau awariu ḡamoḡamo ota vunui ma ota apui tapa?

43 *Taumi ami god Molek ana numa gara ma ami ubona god kokoitauna Rephan o avarai.*

Kokoitau o kauēi da ota vimae-ḡaeḡaeni.

Lamna aubaina rava borui ami au dobu ina vainimi ma ina naiemi aueia,

Babilon ina netawanei da dobu au ḡelauna. (Amos 5:25-27)

44 ✧Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare. 45 Muriai Joshua noinoita i rau-etaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

46 ✧God, David nuanuana i vai-kauēi ma David i vibaḡa da tauna God ana numa ita voai. 47 ✧Wate David eḡa numa ita voai ma natuna Solomon numa i voai. 48 Wate God ḡeḡetelerana eḡa rava uranei numa ita voavoai au orana ita mamae, me peroveta wariḡa i riwa i pa:

49-50 *Aubaina Tau aiwai anatapuna au mara ma au dobu a kauēi. Tapa?*

BADA i riwa, “Mara au anikiala
ma dobu aeu kareu aniterenana.*

Wate numa aiwaina ona voai tau aubaiu? Eḡateni!

Tau au animae-kaua mepa? Eḡa mepa!

(Isaiah 66:1-2)

51 *Ma Stephen i riwa:*

Taumi orami badobadoi. Ma eḡa ota ḡoeḡoei da God ona voteletelei ma taniḡami o vopotai da ana riwa eḡa ota nononori. Taumi Arua Vivivireina o viviḡaviei me noinoimi i kaukauēi nanare. 52 Noinoimi metau perovetai eḡa ita rau-iviapoapoelei. Wariḡa perovetai, God ana tauvilawana, ana nei i vinolenolei; Wate noinoimi wei perovetai maiteni i viraḡeni. Ma marina Tauna i nei ma o vibenabenamei ma o viraḡeni. 53 God ana anela i paritawaneiai da ana tarawatu noinoita i verei, wate taumi tarawatuna eḡa ota voteletelei.

Stephen ḡaimei i viraḡeni

54 Maranai babada wei riwana i nonori ma i meji guratana ma ivoi i utagiḡirigiriei Stephen awarina. 55 Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oiena i maimairi. 56 Ma i riwa, “Ona inana! Mara metaetana i wanatawanei ma Rava Natuna a inainanai God au oiena e maimairi.” 57 Marina tau anatapui taniḡai i vopotai, i vigaragarei ma Stephen aubaina i ruba, 58 ma i taina-opunei au doa, taon i opu-tawanei da au ririva ma ḡaimei ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni. 59 Tau i viraurauei ma tauna i raupari i pa, “BADA Iesu, aruau ma vaia! 60 Ma ae-tutunei i peu ma i garara, “BADA ai ḡo'apoapoe ma nota-tawanei.” Wenanare i riwa ma i'raḡe.

✧ 7:44: Exo 25:9, 40 ✧ 7:46: 2Sa 7:1-16 ✧ 7:47: 1Ki 6:1-38 * 7:49-50: Wei anona lamna Bada wenanare natuna i riwei, “Tam au oieu ma kiala ma am ḡavia au ae kareu ana tuvaideoedoi”

8

¹⁻² Ma Saul kampa da Stephen ana iraḡe i 'nanai ma i vianinei. Rava patupatutui ḡelai ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoei

Nai maranaina rau-iviapoapoe ḡaeḡaena i vikarei ekalesia awarii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae. ³✱Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

Philip au Samaria

⁴ Wate tauvitumaḡana Jerusalem i rubaruba-tawanei taon ma dobu anat-apuna i naeni ma Riwana Aiaina i raugugulei. ⁵ Ma Philip i nae au taon tagogi au Samaria ma kampa BADA ana Vinevine Keriso i raugugulei. ⁶ Maranai patarana, Philip i raraugugula i nonori, ma i 'nanai kaua babai ma mataira ḡaeḡae i kaukauei tau i anatapui orai taputapunei i rautaniḡana. ⁷ Tauna arua-apoapoei rava maḡamaḡau i orai i egari da ana gara-gararai i viopuopuana, ma nanare rava maḡamaḡau gwaḡagwaḡai ma sige-sigei i vilawani. ⁸ Ma nuaiai ḡaeḡaena i mae nai au taona.

Simon tauna barabaravuna

⁹ Wenanare, nai au taona oroto tagogi i mae wavana Simon, ma tauna wariaga ava ana baravu i kaukauei ma mai Samaria i baibaiei. Ma i voepaepana-melei da tauna rava ḡaeḡaena. ¹⁰ Rava labalababa, ma wavai naenaei anatapui ana babani i rarautaniḡana-kauai ma i ririwa, "Tauna, God ana rewapana e ḡoreḡorei, Rewapana ḡaeḡaena." ¹¹ Tau i vineneḡanana-kauai aubaina mara nonoa tau i Simon ana baravu i baebaei. ¹² Wate tau i Philip i vitumaḡanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito. ¹³ Simon maiteni i vitumaḡana ma i babataito. Ma Philip mepa i nena tauna kampa aubaina kaua babai ma mataira vivirewapanai i kaukauei. Tauna wei pulona i bana-kauai.

¹⁴ Maranai Apasol au Jerusalem i nonori da mai Samaria, God Riwana i vitumaḡanei, tau i Peter ma John i paritawanei awari. ¹⁵⁻¹⁶ Ma au Samaria i ḡeta ma tau i raupariei da Arua Vivivireina ita rui au orai. Aubaina tau i Iesu wavanei ava i babataito. Ma arua vivivireina eḡa ita rui. ¹⁷ Peter ma John urai tau i tepai i terei ma i raupari da Arua Vivivireina au orai i rui. ¹⁸ Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi, ¹⁹ ma i vibaḡa i pa, "Tau maiteni nai rewapanana ma vereu da rava au kolai urau ana terei ma tau i Arua Vivivireina ina vaia." ²⁰ Wate Peter i paribelei i pa, "Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai! ²¹ Tam wei nolana au orana am gabu eḡa ita mamae, aubaina oram eḡa ita ai God au matana. ²² Am nota apoapoe ma votere-tawanei. Ma mae-tavirem BADA awarina ma ma vibaḡai da am nota apoapoe ina nota-tawanei. ²³ Aubaina a inanim da unura oram i oai tauai awariai ma wei notai apoapoei

e panipanim.” ²⁴ Simon marina Peter ma John i riwei, “Aubaiu BADA awarina ona raupari da aiwai o ririwei eḡa ina tupua awariu!”

²⁵ Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ḡeta au Jerusalem.

Philip ma Ethiopiei

²⁶ Mara tagogi BADA ana anela, Philip i riwei, “Ma vokaukaua ma ma nae au rauanaḡei, etanai au Jerusalem da e ḡaiḡaira au Gaza.” (Wei etanaina lamna au mutulua). ²⁷ Anina ma Philip i vokaukaua ma i nae. Ma wei au etanaina oroto Ethiopiei i 'nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina, ²⁸ ma i nena-me ana au dobu. Ma ana au chariot i kiala ma wariḡa peroveta Isaiah buka i girugirumia i 'aiavi. ²⁹ Ma Arua Vivivireina Philip i riwei, “Ma nae ma chariot au ririvana ma babara-nae.” ³⁰ Anina ma Philip i ruba chariot au ririvana ma i nonori badana peroveta Isaiah ana buka i 'aiavi. Ma Philip i paridadana, “Aiwai e iaia via e araramanei bo eḡa?” ³¹ Orotona i paribelei, “Menanare ana 'ramananei mepa da rava eḡa ita parivai-araramaniu!” Ma Philip i vibaḡai da i ḡeta da au ririvana i kiala. ³² Buka au orana, wei riwana i 'aiavi,

*Tauna i taravaina-naiei me sipu viragēnana aubaina
me sipu natuna e genugenuana maranai aparana e boribori,
tauna eḡa aiwai ita latoni.*

³³ Tauna i vijiboḡi ma i vinimalamalai ma eḡa ita kauana-kauei awarina. Aiai ana epaepaia ina babaniei.

Aubaina ana mara au dobu i vaitawanei.” (Isaiah 53:7-8)

³⁴ Ma orotona, Philip i paridadanei, “Isaiah e babaniana-melei bo rava ḡelauna e babaniei?” ³⁵ Ma Philip, wei riwana awarina i vikarei ma riwa ḡelai maiteni ma Iesu Riwana Aiaina i viararamani. ³⁶ Ma i nena da waira i 'nanai ma Ethiopiei i riwa, “Ma inana waira noi, aiwai aubaina da eḡa ana babataito?” ³⁷ * ³⁸ Badana, chariot taurubeina i riwei, “Chariot ma vojijini” Ma tauna ma Philip i ḡaira waira au orana ma Philip, badana i babataitoi. ³⁹ Maranai wairei i ḡeta, BADA Aruana maratagogi Philip i vaitawanei ma turana eḡa ita inana-melei, ma ana morelanana i nae ana au dobu. ⁴⁰ Wate Philip au Asotus i raueḡa ma dobuna i naeni ma Riwana Aiaina i raugugulei da au Caesarea taon i ḡeta.

9

Saul i vitumaḡana

¹ Wate Saul amapo da i mejimeji ma i ḡoeḡoei da BADA ana tauvitu-maḡana ita viragēni. Ma i nae Pirisi Ḣetelarana awarina, ² ma i vibaḡai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumaḡanai, nelara ma waivine ita pani ma ita neiai au Jerusalem. ³ Ma Saul, Damaskas i tuḡereḡerei, nanare ma lalalaina marei i ḡairai da tauna i ravilalai. ⁴ Tauna i peu au doa ma

* 8:37: Buka wadubo nonoana vs 37 eḡa ita mamae.

pona i nonori awarina i babani i pa, “Saul, Saul! Aiwai aubaina e rarau-iviapoapoeleu?”

⁵ Saul i paridadana, “Tam aiai bada?”

Ma pona i paribelei, “Tau Iesu, tauna e rarau-iviapoapoelei! ⁶ Marina ma vomairi ma ma rui au Damaskas, ma kampa aiwai ina riwem ma kauai.”

⁷ Nelara Saul maiteni i nenaie i mairi kwakwa, ana gamopotai, tau i pona i nonori wate ega aiai ita inanai. ⁸ Ma Saul au doa i matamatave i vomairi ma matana i kala, wate ega aiwai ita inanai. Ma ana rava i raunimavoai ma i taravaina-naiei au Damaskas. ⁹ Ma au pom tonuga ega ita inana, ega ita am bo ita uma.

¹⁰ Au Damaskas tauvitumaḡana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

¹¹ BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu. ¹² Ma ana au inana i ‘nanai oroto wavana Ananias i nei awarina ma urana au inana i terei da ita inana-me.”

¹³ Wate Ananias i paribelei, “Bada, rava maḡamaḡau i riweu da wei ravana ana kaua i apoapoe kaua tauvitumaḡana awarii au Jerusalem!

¹⁴ Ma weka i nei pirisi ḡaeḡaei ai rewapanei da aiai wavam e viviborumei ina pani.”

¹⁵ Wate BADA, Ananias i riwei, “Ma nae! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel awarii. ¹⁶ Tau ana viatataiei da aubaiu ina jima ma rau-iviapoapoe ḡaeḡaena ina nei awarina.”

¹⁷ Anina ma Ananias i ḡeta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i ega maranai weka u nenei, i paritawaneu awarim da ma inana me ma Arua Vivivireina oram ina vioai.” ¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babaito. ¹⁹ Ma i am ma ana rewapana i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i raraugugula da Iesu anina God natuna. ²¹ Tau aiavoi da Saul i nonori i ba kaua ma tau i ava i babani vivira i pa, “Wei ravana tagogina, rau-iviapoapoe ḡaeḡaena Iesu ana tauvitumaḡana i awarii i kaukauei au Jerusalem bo? Tauna i nei weka nolana tagogina aubaina da tauvitumaḡana ita pani ma ita naiei Pirisi babadai awarii bo.” ²² Wate Saul ana raugugula i viwapana kaua ma lamnei mai Jew au Damaskas i aramanei da Iesu anina Keriso, Vinevinena, ma lamna aubaina ana babani ega ita parivirevirei.

²³ Ma au pom biaḡa au murina Jew babadai i viogatara da Saul ita viraḡeni. ²⁴ Mai Jew marai ma waguvarai taon garina au metaetana i vipaipai da Saul ita viraḡeni. Wate Saul ai ogatara riwana i nonori. ²⁵ Ma waguvarai tauvitumaḡana i ḡelaui ai bada Saul i taravaini ma iriga ḡaeḡaena au orana i poi ma gavogavo aburuna taon au garina, kampa ḡuravei i tere-ḡairei au doa ma i ruba.

²⁶ Saul i ḡeta au Jerusalem ma maranai i ḡoei da tauvitumaḡana i ai au boru ita rui. Wate tau i rovoei ma ega ita vitumaḡanei da tauna Iesu ana

tauvotaḡotaḡo. ²⁷ Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavane. ²⁸ Anina ma tau Saul i taravaini ma maiteni i mae ma Jerusalem i naeni ma ana tepatorai i raugugula BADA wavane. ²⁹ Ma nanare Saul mai Jew pona Greek taubabanieina maiteni i babani ma i viparipariḡai, ma tau i viogatara da tauna ita viraḡeni. ³⁰ Maranai tauvitumaḡana ḡelau wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuaubaii i mae. Ma Arua Vivivireina ana aguei ekalesia ai tumaga ana i vovai-virewapani, Ma ai boru i rarata, ma tau BADA i virirana-kauei.

Aeneas ma Dorkas

³² Nai maranaina Peter dobu maḡamaḡau i naeni, ma God ana tauvitu-maḡana awarii i ḡeta au Lidda. ³³ Kampa oroto wavana Aeneas i nelaḡai, tauna gwaḡagwaḡana madeḡa 8 ana au aravi i matave. ³⁴ Peter i riwa, “Aeneas, Iesu Keriso i vilawanim! Ma vomairi ma am aravi ma noui!” Ma maratagogi i lawana. ³⁵ Anina ma rava maḡamaḡau au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaḡana tagogi wavana Tabitha (Greek ponanei lamna Dorkas) tauna marana patapatana kaua maḡamaḡau aiaii i kaukauei molamokai aubaii. ³⁷ Wei marana tauna i doria ma i'raḡe ma tupuana i oḡai ma numa vatavatara au aidamo, i vimataveni. ³⁸ Lidda, lamna Joppa au ḡereḡerena ma maranai tauvitumaḡana i nonori da Peter au Lidda, tau ai rava ruaḡa i paritawanei da Peter i egari i pa, “Laḡilaḡina ma nei!”

³⁹ Ma Peter tau i maiteni i nae da i ḡeta ma i taravaina-ruiei au numa vatavatara. Kaikaiaaba maḡamaḡau ana toutoui Peter i mairi kwaviviroi. Maranai Dorkas lawalawaina ma kwama da gara i popopoia Peter i viatataiei.

⁴⁰ Wate Peter anatapui i vibaḡai da i opu au doa, ma ae-tutunei i mae-ḡaira ma i raupari, ma taubeu i riwei, “Tabitha, ma vomairi!” Tabitha matana i kala ma maranai Peter i 'nanai, i vomairi da i kiala. ⁴¹ Peter urana i viloloi ma i voagui da i vomairi. Ma tauvitumaḡana anatapui ma kaikaiaaba maiteni i kwatueiai, ma wavine lawalawaina tau i verei. ⁴² Ma wei riwana dobu Joppa i naeni ma rava maḡamaḡau Iesu i vitumaḡanei. ⁴³ Peter au Joppa i mae au pom biaḡa nanare Simon ḡamoḡamo opina taurauḡaroḡaroeina ana au numa.

10

Peter ma Cornelius

¹ Au Caesarea oroto* wavana Cornelius, tauna mai Italy sorodia boruna ai bada. ² Tauna rava jijimanina ma patupatutuna, ma ana numa ravai maiteni God taurauduneleina. Ma lamamolakai i paipaina-kauei ma marana patapatai i raraupari God awarina. ³ Au bigai tagogi 3 oklok nanare i raraupari ma ana au inana, God ana anela au aiaina i 'nanai, i nei awarina ma i riwa, “Cornelius!”

⁴ Cornelius ana rovona anela i 'nana-tunutunui ma i riwa, “Au bada, menanare!”

* **10:1:** Wei ravana jentail.

Ma anela i paribelei, “Am pari ma am verena molamolakai awarii, i ġeta God awarina me pulo apuapunana ġabuna. ⁵ Ma marina nelara ġelau ma paritawanei au Joppa ma ravana wavana Simon wavana ġelauna Peter ina taravainiai. ⁶ Tauna rava wavana Simon, ġamoġamo opina taurauġaroġaroeina awarina e mamae gera au ririvana.”

⁷ Maranai anela i nae, Cornelius ana taunola ruaġa i ġoreiai, ma ġelauna lamna sorodia, tauna ana tauvipaipai, tauna God tauvitumaġaneiana. ⁸ Tauna aiwai anatapuna tau i riwei ma i paritawanei au Joppa.

Peter Cornelius i raugenari

⁹ Maratomna au benai nanare maranai nelarai Joppa i tuġereġerei, Peter i ġeta numa au tepana da ita raupari. ¹⁰ Ma am i 'raġe ma i ġoei da aiwai ita ani, maranai tau lam i vovokaukauei, ma Peter matanei rauboni i 'nanai. ¹¹ I 'nanai mara i wanatawanei ma purapura inanana me puru ġaeġaena au adana 4 i vojijini ma marei i tere-ġaireiai au dobu. ¹² Au orana lamna sia tapuna ma tapuna, tetetei me mota ma kiu au aidamo lavelavei. ¹³ Ma pona i riwa, “Peter ma vomairi, ma viraġena ma ma am!”

¹⁴ Wate Peter i paribelei, “Eġa! Lamna eġa melanai ana kauei. Eġa melanai lam viviġana ata am-dadani.”

¹⁵ Wate pona i babani me, “Aiwai God i viviaiainia, eġa ma riwa da i apoapoe.”

¹⁶ Mara tonuġa wenanare i tupua ma me marana puruna i ġaiana-melei au mara.

¹⁷ Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaġai ma i ġeta ana au metaeta. ¹⁸ Tau i paridadana, “Weka rava wavana Simon-Peter e mamae bo eġa?”

¹⁹ Peter amapo da wei i vivinua-notenotei maranai Arua vivivireina i riwa, “Simon, nelara tonuġa e baibaieim! ²⁰ Lamna aubaina ma vomairi ma ma ġaira au gabaura, eġa ma geduai, aubaina tau a paritawanei awarim.”

²¹ Peter i ġaira ma awarii i riwa, “Taumi tau o baibaieu bo, Ami ġoana aiwai?”

²² Ma nelarai i paribelei, “Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maġamaġau tauna e vivivirei. Anela vivivireina i riwei da uta nei ana au numa da aiwai u araramanei uta riwei.” ²³ Ma Peter nelarai i ġorei da i rui au numa ma kampa i matave.

Peter Cornelius ana au numa

Ma maratomna anatapui i nae, Tauvitumaġana ġelau au Joppa maiteni i vomairi. ²⁴ Ma au pom ġelauna tau au Caesarea i ġeta. Cornelius tau i paipaini, ma ana numa ravai ma ana rava i ġorei da i nei. ²⁵ Ma maranai Peter i ruirui au numa, Cornelius Peter i 'nanai ma i mae-ġaira au ae karena ma ana virirana i raudune. ²⁶ Wate Peter tauna i voepai ma i riwa, “Ma vomairi, Tau rava ota me tam.”

²⁷ Peter ma Cornelius i babani ma i ruirui au numa. Ma i 'nanai da patara tauna i paipaini. ²⁸ Peter tau i riwei, “Taumi o aramana-kauei da tauta mai Jew ata tarawatu e viviġaeta da Jentail maiteni tana mae-gogona bo tana raugenari. Wate God i viatataieu da eġa rava ana ġorei rava apoapoena bo miramirana. ²⁹ Lamna aubaina maranai u vibaġaiu da

ata nei, Tau au nota aiainei a nei. Tau ata pari-dadanem, Marina ma riweu aiwai aubaina au riwa u paritawanei?”

³⁰ Cornelius i paribelei, “Au benai wenanare au pom 4 marina i kwa, au numa a raraupari, nanare ma rava ana gara ararapoirina ma namanamaringa au naoiu i raumairiei. ³¹ Ma i riwa, ‘Cornelius! God am pari i nonori ma am verena molamolakai awarii i vinuaiaiei! ³² Ma nelara ma paritawanei au Joppa da Simon e ġoreġorei Peter awarina. Tauna Simon, ġamoġamo opina taurauġaroġaroena ana au numa e mamae.’ ³³ Lamna aubaina da am riwa laġilaġina ava a paritawanei, ma i ai da tam u nei. Tauai anatapuiai marina weka God au matana a vivipaipai da BADA aiwai i riwem ana nonori.”

Peter ana babani

³⁴ Ma Peter babani i raukarei, “Marina a inana-kauei da God rava anatapu i e vaivaia da tagogina. ³⁵ Wate dobu dobuai ravai God e vivivirei ma kaua aiiai e kaukauei, Tauna wei ravai e ġoeġoei, ³⁶ Taumi o aramanei God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaġanei ma tauna ai lawana ina vibadei. ³⁷ Taumi o aramanei Iesu aiwai i kauei Judea au anatapuna, au Galili i vikarei maranai John babataito ai kaua i raugugulei. ³⁸ God Arua Vivivireina ma rewapana Iesu Nasaretei i verei da dobu maġamaġau i naeni ma kaua aiiai i kaukauei, ma rava au orai arua apoapoe i rui ruini, i vilawani.

³⁹ —Aiwai anatapuna au Judah provins ma au Jerusalem i kaukauei tauai anatapuiai a vimatematei ma a bababaniei. Tauna au korosi i tutui da i’raġe. ⁴⁰ Wate God tauna i’raġelei i voepa-melei aupom au vitonuina ma i kauei da ġelauai awariai i eġa. ⁴¹ Eġa rava maġamaġau tauna ita inana, anina tauvimatamata i vinevinei awari ava i ġeta. Lamna tauai maiteni a uma ma am ana vomairi au murina. ⁴² Ma i egariai da dobu au anatapuna ana raugugula ma ana jima da God Iesu i vinei da rava anatapu i lawalawai ma i’rairraġei ina rauetarei. ⁴³ Peroveta anatapu i jime i da maranai rava Iesu i vitumaġanei, Tauna wavinei God tau i ai ġo’apoapoe ina vaitawanei.”

⁴⁴ Maranai Peter i bababani ma Arua Vivivireina i ġairai ma rava i raurautaniġana i vioai. ⁴⁵ Ma mai Jew Joppei i nenei Peter maiteni, i ba kaua maranai God Arua Vivivireina i paritawana ġairei Jentail awarii. ⁴⁶ Au baina mai Jew i nonori tau i pona tapunei i bababani ma God i vivimae-ġaeġaeni. Anina ma Peter i riwa, ⁴⁷ “Tau i Arua Vivivireina i vaia me tauta. Wei lamna aubaina eġa aiiai ina viġaeta da wei ravai tana babataitoi.” ⁴⁸ Ma tau i Cornelius ana numa ravai maiteni ma ana rava ġelau i Iesu Keriso wavanei i babataitoi, ma tau i Peter i vibaġai da maiteni ita mae mara aburuna.

11

Peter ana babani

¹ Apasol ma tauvitumaġana au Judea provins i nonori da Jentail maiteni God riwana i nonori ma i vitumaġana. ² Ma maranai Peter i ġeta me au Jerusalem tauvitumaġana mai Jew ġelau tauna i eni i pa, ³ “Tam Jentail ai au numa u rui, ma maiteni u am!”

⁴ Anina ma kaua menanare i tuputupuanei anataputa Peter tau i parivere: ⁵ I riwa i pa:

Maranai a raraupari au Joppa ma matauei kaua a inanai, ma purapura inanana me puru gaegeaena adana ⁴ i vojijini ma marei i tere-gaireiai awariu. ⁶ Au orana a inana lamna gamogamo maramaraḡamai ma moduei, tetetei me mota ma kiu au aidamo lavelavei. ⁷ Ma pona a nonori i pa, “Peter ma vomairi, ma viragena ma ma am!”

⁸ Tau a paribelei, “Ega! Lamna ega melanai ana kauai. Ega melanai lam viviḡana ata am-dadani.”

⁹ Wate pona marei mara viruaina i babani, “Aiwai purapurana God i riwa da i ai, tam ega ma riwa da i apoapoe.” ¹⁰ Mara tonuḡa wenanare i tupua, ma puruna i gaiana-melei au mara.

¹¹ Nai maranaina mai Caesarea ai rava tonuḡa i paripari-tawaneiai, au metaeta i raumairiei. ¹² Ma Arua Vivivireina i riweu da ega aiwai ana notai ma orau taputapune i ana nae. Mai Joppa tauvitumaḡana ⁶ maiteni a nae ma ravana ana au numa a rui. ¹³ Cornelius i riwelai da anela awarina i ega, ma i riwei, “Rava ma paritawanei au Joppa da rava wavana Simon Peter ina neiai.” ¹⁴ Tauna wei riwana ina neiai ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ḡairai da tau i vioai me au naona awarita i tupua nanare. ¹⁶ *Anina ma Iesu aiwai i ririwei a notai, “John wairei i babataito, wate taumi Arua Vivivireinei ina babataitoimi.” ¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaḡanei, ma tau ai ai da God ata viḡaei?

¹⁸ Tau i vigaopotai maranai wei i nonori, ma God i viborumei i pa, “Riwa kaua da God Jentail maiteni i vianinei da ina rupena ma ina lawana.”

Ekalesia au Antiok

¹⁹ *Ekalesia ḡelau i rau-iviapoapoe i rovoei maranai Stephen i virageni ma i vilamonei au uama. Ḗelau i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii. ²⁰ Wate ekalesia ḡelau mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei. ²¹ BADA ana rewapana tau i au orai i mae ma Jentail maḡamaḡau i vitumaḡana ma i mae-tavirei BADA awarina.

²² Wei riwana i ḡeta ekalesia awarii au Jerusalem, ma tau i Barnabas i paritawanei au Antiok. ²³⁻²⁴ Maranai i ḡeta ma i 'nanai da God ravai i viaiaina-kauai, tauna i vinuaiia ma i egari da BADA awarina ina vipatutu orai taputapune. Barnabas tauna rava aiaina, Arua Vivivireina orana i oai ma ana tumaḡana i rata, ma God ana aguiei, i rauguga ma rava maḡamaḡau i taini BADA awarina.

²⁵ Ma Barnabas i nae au Tarsus da Saul ita baiei. ²⁶ Ma i nelaḡai ma i neiai au Antiok, ma kampa tauvitumaḡana maiteni i mae madeḡa tagogi i kwa, ma patara gaegeaena awarii i viararamana. (Weka au Antiok lamna i vikarei da tauvitumaḡana i viḡorei Kerisiana)

²⁷ Wei au marana peroveta ḡelau Jerusalem ei i ḡairai. ²⁸ *Peroveta tagogi wavana Agabas i vomairi ma God ana rewapanei i vieḡa da gomara

e nenei au naoii dobu au anatapuna (Caesar Claudius ana vibada au marana gomarana i nei). ²⁹ Tauvotaḡotaḡo au Antiok i vianina da tau i ava ita kauana-guratei da mane vounaina ita kau i da ai rava ekalesia au Judea ita voagui. ³⁰ Tau i nanare i kau i ma manena Barnabas ma Saul au urai i terei ma tau i ekalesia ai babada au Jerusalem i verei.

12

James i viragēni ma Peter i pani

¹ Lamna maranai, gulau Herod Agrippa* i raukarei da ekalesia ḡelau i rau-iviapoapoelei. ² James, John tuana uana sodei i bori-tuini. ³ Ma maranai Herod i 'nanai da mai Jew wei kauana i vinuaiaiei, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua. ⁴ *Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i ḡoei da Peter ita vojijini da raḡona torelana au murina ma au deba ita rauetarei. ⁵ Ma lamna aubaina Peter au pani numana i vojijini mara aburuna. Wate ekalesia i raraupari guratana God awarina Peter aubaina.

Peter pani numanei i tere-opunei

⁶ Ma nai waguvaraina, ma maratamna da Peter ita rauetarei, Peter sorodia ruaḡa au poui i matamatave. Urana seinei i raḡini sorodia ruaḡa au urai, ma sorodia ḡelau au metaeta i vipaipai.

⁷ Maratagogi BADA ana anela i eḡa ma pani numana i ravilalai. Ma Peter i vogugui da matana i kala ma i riwei, “Laḡilaḡina ma vomairi!” Ma sein au urana i dabarara. ⁸ Ma Peter i riwei, “Ma vigara ma ae uma ma oteni.” Ma nanare i kau i. Ma i egari, “Am kwama potopotona ma oteni ma ma votaḡotaḡoiu.”

⁹ Peter anela i votaḡotaḡoi da pani numana i opu-tawanei, wate eḡa ita aramanei anela aiwai i kaukauei, tauna i notai i rarauboni. ¹⁰ Tau i, sorodia boruna ruaḡa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Tau i etanai tagogi i ḡairani ma maratagogi anela tauna i voterei.

¹¹ Peter ana nota i nememei ma i riwa, “Wei anina riwa kaua! BADA ana anela i paritawaneiai da Herod au urana i vaitawaneu, da mai Jew aiwai i notanotai da ita tupua lamna eḡa ita tupua.” ¹² Maranai ana nota i nememei tauna i nae Mary ana au numa. (Mary lamna John alona. John wavana ḡelauna Mark). Kampa rava maḡamaḡau i vitagogiei ma i raraupari. ¹³ Peter au metaeta i raupewapewa ma taunola wavana Rouda i nei da metaeta ita votawanei. ¹⁴ Ma Peter ponana i nonori ma i aramanei da tauna, ma i vinuaiai guratana da eḡa metaeta ita votawanei ma i ruba-rui da i vinolanola i pa, “Peter au metaeta e maimairi!”

¹⁵ Wate tau i eḡa ita vitumaḡanei ma i riwei, “Tam ma bubua!” Wate tauna i riwa bagibagi. Ma tau i riwa, “Nai Peter ana anela.”

¹⁶ Wate Peter i rarau-pewapewa ma maranai tau i metaeta i votawanei ma i 'nanai da tauna, tau i orai i auepai.

¹⁷ Peter urana i voepai da rava i genuana ma i riwei menanare BADA pani numanei i tere-opunei. Ma i riwei, “James† ma ekalesia ḡelau wei

* 12:1: Tauna gulau Herod 1 ḡoḡana. ☆ 12:4: Exo 12:1-27 † 12:17: Iesu ana tevera

ona pariverei.” Ma Peter i nae au dobuġela.

¹⁸ Maranai mara i tom kampa au pani numana nuabola ma vinuanaina ġaġaena i peu sorodia awarii da aiwai i tupua Peter awarina ¹⁹ Herod, ana sorodia i egari da Peter i baiei wate eġa ita nelaġai. Lamna aubaina sorodia 16 i etarei ma i viragēni. Muriai Herod Judea i netawanei ma i nae au Caesarea da ita mae mara aburuna.

Herod iraġe

²⁰ Marina Herod amlona i ġaiġai kaula Taia ma Sidon ravai awarii, lamna aubaina tau i ana borui i nei da Herod maiteni wei i babaniei. Tau i Herod ana taunola ġaġaena Blastus, i taravaini da ita voagui. Tau i rom i vibaġei Herod maiteni. Aubaina ai lam Herod ana dobie i nenei. ²¹ Ma marana i ġetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani. ²² Ma patara ana babani i nonori ma i logoi i pa, “Wei lamna god e bababani ma eġa rava!”

²³ Maratagogi BADA ana anela Herod i vipeuni au doa ma motamota orana i ani da i raġe, aubaina tauna rava ai voepaepa i vinuiaiei ma eġa rava ita riwei da BADA ita voepaepai.

²⁴ Ma ekalesia BADA riwana i raraugugulei ma rava maġamaġau i nenei BADA awarina ma ekalesia i rarata. ²⁵ Maranai Barnabas ma Saul ai nola au Jerusalem i vikwai, tau i John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

¹ Kerisiana au Antioch au orai peroveta ma taugiu wavai wenanare, Barnabas, Simeon (e ġoreġorei Gawara), Lusias Sairinie, Manaen (Tauna gulau Herod Antipas maiteni i rata tagogi), ma Saul. ² Mara tagogi maranai tau i ujuju ma BADA i vovoepepai ma Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.” ³ Anina ma uju ma pari au murina tau i urai Barnabas ma Saul au tepai i terei ma God ruaġai i viaiaini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i ġaira au Selusia ma kampa i amkuka damana au bonabona Saipras. ⁵ Ma au Salamis i ġota ma i nae mai Jew ai au boru numana ma God riwana i raugugulei. John-Mark tau i maiteni i nae da ai tauagu.

⁶⁻⁷ Tau i bonabonana i kwaviviroi da au Paphos taon i ġeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ġoei da God ana babani ita nonori ma lamna aubaina Barnabas ma Saul i rauġoreiai. ⁸ Wate barabaravuna Bariesu (Greek ponanei lamna Elimas) Saul ma Barnabas i viġaviei da gavena ana tumaġana ita viapoapoeni. ⁹ Saul wavana ġelauna Paul, Arua Vivivireina orana i oai ma barabaravuna matana i nana-tunutunui. ¹⁰ Ma i pa “Tam Satan natuna ma kaula aiaii ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kaula ma voviravirai da moru. ¹¹ Ma marina BADA urana ina kovoġim da matam ina apoapoe mara aburuna ma eġa madeġa lalalaina ma inanai.”

Maratagogi matana i vinawanawa ma i gimtona ma nare da were i voladağanae da rava au urana ita vojijina.

¹² Maranai gavena i 'nanai aiwai i tupua ma i vitumağana, aubaina tauna BADA ana viararamana i bana-kauei.

Paul God Riwana Aiaina i jimejime i Antiok taon au Pisidia

¹³ Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem. ¹⁴ Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala. ¹⁵ Ma rava ġelau, Moses ana tarawatu bukana ma peroveta ġelau ai buka i 'avi, ma babada riwa i paritawanei Paul ma Barnabas awari i pa, "Varevareiu! Mepa da awarimi nota aiwai da ota voagui lai lamna marina ona ġei da ona babaniei."

¹⁶ Paul i vomairi ma urana i voepai da rava i genuana ma babani i vikarei i pa:

Mai Israel ma taumi eğa mai Jew ai God tauviborumeina, ona rautaniğaneu! ¹⁷ *Mai Israel ai God noinoita i vinei, ma i vimaaurai ai au mae au Egypt, ma ana rewapana ġaeğane i dobunei i taravainapopunei. ¹⁸ *Madeğa 40 au mutulua ami kaua apoapoei ami beura ma ami gunura anatapai am-iauei. ¹⁹ *Dam ġaeğaei 7 i vipupui au Canaan ma dobuna mai Israel i verei da i viğariana-nonoei. ²⁰ *Wei anatapuna madeğa 450 au orana i tupua. Wei au murina God taurauetara† i terei da tau i vibadei da peroveta Samuel ana mara. ²¹ †Anina ma rava God i vibağai da gulau ita verei. Ma God Saul, Kish natuna Benjamin ana damei i terei; ai gulau da madeğa 40 i kwa. ²² §Ma God Saul i tere-opunei ma David i terei ai gulau. Ma wenanare i riwa i pa, "Tau a aramanei da David, Jesse natuna orau ana rauoğara, ma au ġoana anatapuna ina kauei."

²³ Muriai me God i parivainuağani nanare, Mai Israel ai Tauvilawana, Iesu David ana damei i nei. ²⁴ *Muriai da Iesu ita nei, John mai Israel anatapai awari i jima da ai ġo'apoapoe ina voterei ma ina mae-tavirei God awarina ma ina babataito. ²⁵ *Ma John ana nola au damona i riwa, "Taumi o notanotai da tau Tauvilawana bo? Eğa! Tau eğa tauna. Wate ona rautaniğana, rava au muriu e nenei tauna i ġetelara, tau eğa tagotagogina da ana ae uma ġuravana ana rupeini."

²⁶ Varevareu - Abraham natunatuna ma taumi Jentail God tauviborumeina, God tauta awarita, kwakokwakoi vilawanai riwana i paritawaneiai! ²⁷ Mai Jerusalem ai babada maiteni God ana Tauvilawana i vinua-nainei, ma lamnei Iesu i kovoği, Peroveta wei lamna i jimejime i Sabate marana patapatana. ²⁸ *Tauri eğa ana apoapoena aiwai ita nelağai da Iesu ita virağeni, wate Pilate i vibağai da ita virağeni.

²⁹ *Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-ğairei ma au guba i vimataveni. ³⁰ Wate God Iesu irağelei i vovaimairini.

* 13:17: Exo 1:7 * 13:18: Num 14:34 * 13:19: Deu 7:1 * 13:20: (a) Jdg 2:16; (b)

1Sa 3:20 † 13:20: Wei ravai lamna ai ġavia babada i tauravena ma taurauetara Judge.

† 13:21: (a) 1Sa 8:5; (b) 1Sa 10:21 § 13:22: (a) 1Sa 13:14; (b) 1Sa 16:12 * 13:24: Mrk 1:4

* 13:25: Mrk 1:7 * 13:28: Mrk 15:13-14 * 13:29: Mrk 15:42-47

31 ✱Ma au pom maḡamaḡau i Iesu tau i maiteni au Galili da i ḡeḡae au Jerusalem awari i eḡa. Wei ravai marina e vivimata mata rava awarii.

32 Marina tauai Riwana Aiaina a paripariveremi. Wei parivainuaḡanana wariaga noinoita awari i kauēi. 33 Ma God nanare i kauēi tauta eda muri aubaita, da Iesu iraḡelei i vovaimairini, au Psalm viruaina wenanare i girumi,

Tam natu.

Amadodo Tau a viamanem.

(Psalm 2:7)

34 God Iesu iraḡelei i vovaimairini da eḡa tupuana ina buda. Me i girugirumi nanare i pa,

Au viaiaina vivivireina David a parivainuaḡani tam ana verem. (Isaiah 55:3)

35 Psalm ḡelauna wenanare i girumi,

A 'ramanei da Tam am Messiah-Tauvilawana tupuana eḡa au kokoaḡa ma voterei da ina buda. (Psalm 16:10)

36 Maranai David i mamae ma God ana nola i kauēi ma i'raḡe, ma amamana maiteni i doboi ma tupuana i buda. 37 Wate God Iesu iraḡelei i vovaimairini ma tupuana eḡa ita buda.

38-39 Lamna aubaina au rava, ona aramanei da Iesu awarinei God ami ḡo'apoapoe ina nota-tawanei. Rava anatapui da Iesu e vivitumaḡanei, ai ḡo'apoapoe e notanota-tawanei ma ai viturana e viviaiai. Wei Moses ana tarawatu eḡa ita kaukauēi. 40 Ona paina-melemi da peroveta aiwai i ririwei eḡa awarimi ina tupua. Aubaina i riwa;

41 *Ona rautaniḡana vivijibogaḡami,*

kaua ḡaeḡaena ana kauēi da Ona baei ma ona iraḡe!

Aubaina ami au lawana kaua ḡaeḡaena ana kauēi da taumi ona vitumaḡana-avei.

42 Paul ma Barnabas i opuopu ma rava i nei ma i vibaḡa-guratei da ita nememei au Sabate ḡelauna da Tauvilawana ana kaua ita babanana-kauēi. 43 Boru i kwa da rava i vilamonei, mai Jew borui ma ḡelaui marina ina bori i vaia da i vimai-jew, tau Paul ma Barnabas i votaḡoi, ma i riwanga-guratei da Iesu ana aguei ina mae jijina.

44 Au Sabate ḡelauna taon ravai anatapui i ḡeta da Iesu riwana aiaina ita nonori. 45 Maranai mai Jew wei patarana i 'nanai ma orai unura i oai ma Paul i vikaua-morumoruei ma i vitepaubaubai.

46 Ma Paul ma Barnabas ana tepatorai i babani, "God riwana a jime i awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana eḡa ota ḡoeḡoei. Lamna aubaina ana voterei ma God riwana ana jime i Jentail awarii. 47 BADA wenanare riwa bagibaginei i riwelai,

Tau a vinemi da lalalaina Jentail awarii,

da rava anatapui au dobu ona riwei menanare ai ḡo'apoapoe a nota-tawanei ma a vilawani. (Isaiah 49:6)

48 Maranai Jentail wei riwana i nonori, tau i vinuai i kaua ma BADA Riwana Aiaina i voepaepai, ma tau da God i vinei lawana mamae-nonoana ita vaia, i vitumaḡana.

49 Ma BADA Riwana Aiaina i vituai nai au paratana. 50 Wate mai Jew Jentail waivinei manemanei ma mai Jew ḡelaui i egari da Paul

ma Barnabas ai ġavia i vomairi ma dobunei i viaġaġana-opunei. ⁵¹ ✧ Anina ma tau i aei pokauna i rauabuabui da ita viatataiei da BADA eġa ita vinuaiai awarii ma i nae au Ikoniam taon. ⁵² Wate Arua Vivivireina kerisiana voui au Antiok orai i oai ma i vinuaiai kaua.

14

Paul ma Barnabas i jima au Ikoniam.

¹ Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maġamaġau i vitumaġana. ² Wate mai Jew ġelau i eġa vivitumaġana i Jentail i kelari ma ai nota i barai da Paul ma Barnabas i geduaiei. ³ Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babaii ma vivirewapanai maġamaġau i kauiei. Wei i vimataira da ai jima lamna riwa kaua.

⁴ Taon i kai ġelau mai Jew aubaii i mairi ma ġelau Aposol aubaii i mairi. ⁵ Ma mai Jew ma Jentail ġelau i vioga da Paul ma Barnabas ġaime i ita virauraei. ⁶ Wate tau i riwana i vaia ma dobuna i ruba-tawanei ma i nae au taon ġaegaei Listara ma Derbi au Laikonia provins ma taon au ririvai. ⁷ Ma weka Riwana Aiaina i jimana-naiei.

Rava i notai da Paul ma Barnabas god

⁸ Au Listara oroto aena ġokokokarana, alona manawanei gwaġagwaġana i vinatunei ma eġa ita babara dadana. ⁹ Kampa i kiala ma Paul i bababani i rautaniġanei. Paul matana i tawanei ma i 'nanai da tauna i vitumaġana da ita lawana ¹⁰ ma i garara awarina, "Aemei ma mairi!" Ma orotona aenei i mairi ma babara i vikarei. ¹¹ Maranai patara i 'nanai Paul aiwai i kauiei tau i ava ai ponei i babani vivira, "god ruaġa i ġairai awarita me *rava." ¹² Tau i riwa da Barnabas lamna mai Greek ai god Zeus[†] ma Paul i vitauvibabani aubaina i riwa da tauna Hermes. ¹³ Zeus ana pulo gabuna, taon au giana, Zeus ana pirisi patara maiteni bull ma berana ulaulai i neiai taon au metaetana da Apasol ita puloi.

¹⁴ Wate maranai Paul ma Barnabas wei riwana i nonori, tau i ai gara i sikai ma i ruba-opu patara awarii ma i garara, ¹⁵ ✧ "Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga ma aiwai anatapuna au orai i kauiei. ¹⁶ Wariaġa tauna rava i voterei da ai ġoanei i mae. ¹⁷ Wate marana patapatai e viviatataiemi da tauna e mamae ma ana nuavaina e verevereta, garewa marei ma maura ma lam e vereveremi ma au orami nuaiai e oaoai." ¹⁸ Apasol i bababani ma i kauana-guratei da ravai ita viġaei da tau i avena ita puloi.

Mai Listara Paul ġaime i virauraei.

¹⁹ Mai Jew ġelau Antiok ei ma Ikoniam i nei ma patarana i egari da Paul ġaime i virauraei ma taonei i taina-opunei, i notai da tauna iraġe.

✧ **13:51:** Mrk 6:11 * **14:11:** Paul ma Barnabas Greek ponanei i bababani † **14:12:** Zeus lamna mai Greek ai god ġaegaei. Rava ai vitumaġana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god ġelau aubaii. Rava i notai da Hermes lana e kauwei da rava e babana-kauwa ma ai babara e aiaii. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. ✧ **14:15:** Exo 20:11

²⁰ Wate maranai vivitumaḡana i ḡeta da i mae-kwaviviroi, tauna i vomairi ma i naeme au taon.

Aupom ḡelauna tauna ma Barnabas i nae au Derbi.

²¹ Paul ma Barnabas Riwana Aiaina i jimei au Derbi ma ekalesia voui maḡamaḡau i rui. Ma i nae me au Listara, Ikoniam ma Antiok. ²² Metauna au dobuna i jimajima kampa tauvitumaḡana i ririwana-guratei ma i vovai-virewapani da ina mairi-jijina ai au tumaḡana i pa, “Piripiri maḡamaḡau au orana ona rui wate au murina God ana au vabadana ona rui.” ²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini. ²⁴ Anina ma au Pisidia provins i verautua da i nae me au Pamphilia provins. ²⁵ Au Perga BADA riwana i jimei ma i ḡaira au Atalia. ²⁶ Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaḡai da tau i ita viaiaini ai au nola ma i paritawanei ma marina ai nola e vivikwai.

²⁷ Ma kampa i ḡeta ma ekalesia i vitagogiei, ma aiwai anatapuna God ana aguei i kaukauei rava i vieḡei, ma menanare Iesu metaeta i votawanei da Jentail maiteni Tauna i vitumaḡanei. ²⁸ Ma kampa tauvitumaḡana maiteni i mae guratana.

15

Boru au Jerusalem

¹ Wate nelara ḡelaui Judeaei i ḡairai au Antiok ma ekalesia i viararamani i pa, “Mepa da eḡa inibori ona vaia Moses ana tarawatu e ririwei nanare, God taumi eḡa ina vilawanimi.” ² Ma karuwaḡawaḡa ḡaeḡaena i bauni Paul ma Barnabas maiteni. Ma tau i Paul, Barnabas ma rava ḡelaui i vinei da i ḡae au Jerusalem da Apasol ma babada ita inana i wei babanina aubaina. ³ Ma i paritawanei au Jerusalem, Ma ai au vaḡai ekalesia au Phonisia ma Samaria provins i parivere i menanare Jentail i mae-tavirei God awarina. Ma tau i vinuiai i kaua maraina wei i nonori. ⁴ Maranai i ḡeta au Jerusalem, ekalesia ma Apasol i nei da i nebelei. Tau i parivere i menanare kaua anatapui God ana aguei i tupua. ⁵ Wate ekalesia ḡelaui mai Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

⁶ Apasol ma babada i viboru da wei babanina i okei. ⁷ ✧ Ma i vitarapiri guratana ma Peter i vomairi ma tau i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da tau i ina nonori ma ina vitumaḡana. ⁸ ✧ God rava anatapui ai nota e araramanei, ma Jentail Aruana Vivivireina i verei me tauta nanare. Wei matairana i viatataieta da God i vianina. ⁹ Tauna Jentail ma tauta e vaivainita da tagogina, ma ata vitumaḡanei orata i viaiaiani. ¹⁰ Marina aiwai aubaina God o viviamlo-ḡaiḡaini? Tauta amamata maiteni eḡa tata virewapana da tarawatu tata vojijina-kauei. Wate marina wei vitana Jentail ta vereveredamanei. ¹¹ Eḡateni! Tauta anataputa ta vivitumaḡana da BADA Iesu ana aguei tana lawana, ma nanare Jentail maiteni.”

12 Rava anapui i genuana ma Barnabas ma Paul i rautaniġanei, tui i bababani menanare ana au vaġai God ana aguei kaua aniba ma vivire-wapanai i kauai Jentail awarii.

13 Maranai i babani vorovei, James* babani i vikarei, “Au rava ona rautaniġaneu.

14 —Peter †au naona i pariveremi menanare God Jentail i raugenari ma ġelaui i vinei da tauna ġarinei. 15 Ma Peroveta nununai wei kauai i bababaniei marina nanare e tuputupua:

16 *Wei au murina ana nememei,
ma David ana numa gara ana voa-melei.*

*Ana vituramairini
ma ana kauai da ina virewapana me.†*

17 *Da rava mamae-terenai*

BADA ina baiei,

Wate Jentail a raugorei da ġariuei, BADAi riwa.

(Amos 9:11-12)

18 *Wariaġa da marina wei ta aramanei.*

19-21 —✠Lamna au baina eġa tana kauai da ina piripiri Jentail aubaii, tui e mamae-tavirei God awarina. Wate pepa tana girumi ma tana egari da lam e pulopuloei god morumorui awarii eġa ina ani, eġa ina viawawana labalababa, ġamoġamo uai e kikiki eġa ina ani ma sia ana tarana eġa ina ani. Aubaina wariaġa da marina Moses ana tarawatu e raugugulei boru au numai Sabatena patapatana.”

Pepa i girumi Jentail awarii

22 Ma Apasol, babada ma ekalesia anapui rava ġelaui i vinei ma i paritawanei au Antiok au Syria provinsPaul ma Barnabas maiteni. Tui ai babada ruaġa i vinei wavaġi Judas wavana ġelauna Barsabas ma Sailas.

23 Ma wei pepana au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

24 Tauai riwana a vaia da rava ġelaui ai au boru i ġairai ma ai viararamani i vinuabolaimi ma i visina-viraviraimi, wate tauai nai ravai eġa ata paritawanei. 25 Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni, 26 tauai i verena-melei ma ai lawana eġa ita vinuabolei BADA Iesu Keriso wavana aubaina. 27 Judas ma Sailas a pariparitawanei da tauai gamoiei ina riwemi aiwai tauai a girumi.

28 Arua Vivivireina ma tauai ai ġoana da eġa vita ġaeġaena ana veremi, anina wei tarawatuna ava.

29 Lam god morumorui i puloi eġa ona ani,

Eġa tara ona umai, Eġa ġamoġamo uana kikikina vioana ana tarana ona ani.

Eġa ona viawawana labalababa,§

* 15:13: Iesu ana tevera † 15:14: Peter wavana ġelauna Simon. ‡ 15:16: Maranai God David ana numagara e bababaniei lamna David ana vihadana vouna e ririwei ma eġa ana epaepaia.

✠ 15:19-21: Lev 18:6-23; Lev 17:10-16 § 15:29: Viawawana labalababa ġelaui wei: Rava ġelaui awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviawawanei (Lev 18:22, Rom 1:26-27) Ġamoġamo e viviawawanei (Lev 18:23) Rava eġa uta ravaġi ma e viviawawanei (Eph 5:3) Rava u egari da u viawawanei. (Gen 34:7, Deu 22:25-28)

Mepa da wei tarawatui ona vojijina-kauei, taumi kaua aiaina o kaukauei.

Egualau kaua.*

³⁰ Ma nelaarai i paritawanei da i ġaira au Antioke, ma ekalesia i rieiai da pepa i verei. ³¹ Ma tau i 'avi ma i vinuaiai kaua pariverena aiaina aubaina.

³² Judas ma Sailas tau i God ana peroveta ma i babani guratana awarii ma wei tau i vinuaiaiei ma ai tumaġana i vovai-virewapani. ³³ Ma kampa i mae mara aburuna ma ekalesia ana nuaubai i paritawana-melei au Jerusalem.

³⁴ † ³⁵ Wate Paul ma Barnabas au Antioke i mae, ma tau i maiteni BADA Riwana Aiaina i viaramani ma i raugugulei.

Paul ma Barnabas i vilamonei

³⁶ Ma muriai Paul, Barnabas i riwei, “Tana nae dobu au anapapuna mepa BADA Riwana Aiaina ta raugugulei ma ekalesia tana raugenari, ma tana inanai tau i anina bo eġa.” ³⁷ Barnabas i ġoei da John-Mark ita taravaini. ³⁸ ✱ Wate Paul wei notana eġa ita ġoei aubaina au naona John tau i au Pamphilia i ruba-tawanei ma eġa ita mae da maiteni ita nola. ³⁹ Ai viparipariniġai i apoapoe guratana da tau i vilamonei. Barnabas, Mark i taravaini ma kukei i damana au au Saipras. ⁴⁰ Paul, Sailas i vinei. Ma ekalesia, BADA i vibaġai da ana aguei tau i ai au nola ina paini. ⁴¹ Tau i Syria da Silisia i naeni ma ekalesia i raugenari ma i vinua-terenei.

16

Timothy Paul ma Barnabas maiteni i nae

¹ Paul i nae au Derbi da au Listara, kampa tauvotaġotaġo i mae wavana Timothy. Tauna alona Jew ei ma kerisiana, Wate amana Jentail.

² Ekalesia au Listara ma Ikoniam Timothy i voepaepana-kauei. ³ Paul i ġoei da tauna ita taravaini ana au vaġai, lamna aubaina ini bori i verei aubaina mai Jew kampa i aramane i da tauna amana Jentail. ⁴ Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votaġotaġoi. ⁵ Ma ekalesia ai vitumaġana i vovai-virewapanai ma tauvitumaġana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i viġaei da eġa BADA riwana ita jimei au Eisia provins, ma Pirijia ma Galatia paratana i naeni.

⁷ Maranai i nei Maisia ana au provins ma i ġoei da ita damana au Bithinia provins. Wate Iesu Aruana eġa ita vianinei. ⁸ Ma Maisia i verautuini da i nae au Troas. ⁹ Waguvaraina Paul ana au inana i 'nanai oroto Macedoniei i maimairi ma i vivibaġai i pa, “Ma damanai au Masedonia da ma voaguiai!”

¹⁰ Paul ana rauboni au murina tauai a vioga da laġilaġina ana vomairi Masedonia provins aubaina. Tauai a vitumaġana da God i ġorelai da Riwana Aiaina kampa ana jimei.

Paul i nae au Philipai.

* **15:29:** Kaua ġaġaena lamna eġa ini bori ma Iesu ana aguei, u korosi i take aubaita. Buka waduwaduboi au orai vs 34 eġa ita mamae “Wate Sailas i ġoei da kampa ita mae.” Act 13:13

† **15:34:** ✱ **15:38:**

¹¹ Au Troas tauai amkuka, a viaruana damana au Samotreis bonabonana a ġeta ma au pom ġela a kuka-nae au Neapolis. ¹² Ma kampa da a babara nae au Philipai taon au Masedonia provins, weka mai Rome ai sorodia ai bareki ġaēgaena i mae, kampa a veraumae. ¹³ Ma au Sabate taon a opu-tawanei ma a nae au waira, a notanotai da kampa boru gabuna wate eġa. A kiala ma waivine ruaġa ota kampa i rauriei awari a babani. ¹⁴ Taurautaniġana tagogi lamna Jentail wavinena wavana Lidia ma ana dobu Thaiataira. Tauna gara lebalebarina maiana ġaēgaena taugimareina ma God i vitumaġanei, ma God orana i votawanei da aiwai Paul i bababaniei i rautaniġana kauiei. ¹⁵ Maranai wavine ana numa ravai i babataito ma i raugorelai i pa, “Ona nei au numa mepa da o notanotai da tau kerisiana ririwa kauana.” Ma i egariai da ana au numa a mae.

Paul ma Sailas au panipani numana au Philipai

¹⁶ Mara tagogi a nena boru au gabuna ma taunola guguini a nebelei, Tauna au orana arua apoapoena i mae ma lamnei aiwai amapo da ina tupua i vivieġai. Ma mane ġaēgaena i kaukauei ana taniwaga aubaina. ¹⁷ Tauna Paul ma tauai i votaġotaġoiai ma i garagarara “Wei nelaarai God ġeġetelarana ana taunola! E vivinolanola menanare God e vivilawananei.” ¹⁸ Wei kauana i kauiei au pom biaġa da Paul i viamlo-ġaiġaini da i mae-tavirei ma arua apoapoena i riwei, “Iesu Keriso wavanei a egaegarim da wavine ma opu-tawanei!” Maratagogi arua apoapoena wavine i opu-tawanei.

¹⁹ Maranai taunola guguini ana taniwaga i aramanei da ai mane etanaina i vine-boai, tau Paul ma Sailas i vojijini ma i taina naiei au deba Gabemani awarii. ²⁰ Tau i nei ai taurauetara awarina ma i riwa, “Wei nelaarai mai Jew wei dobuna ravai e vivinuaraġaraġai. ²¹ Tau i ata rava kaua ġelau i viviararamani ma wei ata giu e teretereġairei.”

²² Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipiei i kwapui. ²³ I vunu-kauiei ma i tawana-ruiei au panipani numana. Ma numana badana i egari da ita paina-kauiei da eġa ita ruba. ²⁴ Anina ma Panipani badana tau i tawana-ruiei, panipani numana au orana ma aei, ai vivitainiei au orana i raġita-jijini.

²⁵ Nubautuvai Paul ma Sailas i raraupari ma i welawela God awarina ma panipani ġelau i rarautaniġana. ²⁶ Nanare ma lolo ġaēgaeotana dobuna i gui. Ma maratagogi pani numana metaetana i wana-tawatawanei ma panipani anatapui ai sein i dabarara. ²⁷ Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavui da ita viraġena-melei. ²⁸ Wate Paul i garara, “Eġa ma vunu-melem! Tauai anatapuui weka!”

²⁹ Pani numana badana ana taunola i ġorei da lalalaina ita neiai ma i ruba-rui ma ana sisisina i mae-peu Paul ma Sailas au naoi. ³⁰ Ma i opunei au doa ma i paridadanei, “Babada aiwai ana kauiei da ana lawana?”

³¹ Tau i paribelei, “BADA Iesu Keriso ma vitumaġanei ma ma lawana, am numa ravai maiteni.” ³² Ma God riwana i raugugulei tauna ma ana numa ravai awari. ³³ Nai maranaina avena da waguvarai, pani numana badana Paul ma Sailas i naiei ma keroi i oġai, Ma maratagogi tauna, ana numa ravai maiteni i babataito. ³⁴ Paul ma Sailas i ġaiei ana au numa da i viambagibagi. Tauna ana numa ravai maiteni i vinuiai kaua da marina God i vitumaġanei.

³⁵ Ma marana i tom ma tauetara ana taunola* i paritawanei pani numana badana awarina ma i egari i pa, “Nelara ma voterei da ina nae.”

³⁶ Pani numana badana Paul i riwei, “Taurauetara i egariu da ana voteremi da ona nae. Marina ana nuaubami ona nae.”

³⁷ Wate Paul, taurauetara i riwei, “Tauai ega ita rauetarelai ma i vunukauei patara au matai. Ma avena da tauai mai †Rome, wate marina i goei da govagovaḡanei ina paritawanelai bo? Egateni kaua! Ona voterei da taurauetara ina nei weka da ina naielai.”

³⁸ Taui wei babanina i naiana-melei da babada i riwei ma taui i rovo kaukaua maranai riwana i nonori da Paul ma Sailas lamna mai Rome. ³⁹ Ma i nei au pani numana ma i riwa, “Tauai a kauana-boai, ai go’apoapoe ona nota-tawanei.” Ma i tere-opunei ma i vibaḡa-guratei da dobuna ita oputawanei. ⁴⁰ Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma taui dobuna i netawanei.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae. ² Ma i rui au boru numana au Sabate me mara patapatai i kaukauei nanare, kampa Sabate tonuḡa rava awari God riwana i viararamani. ³ Ma God riwanei i viararamana da Keriso ina vinuapoapoe ma iragelei ina vomairi me, “Wei ravana a bababaniei awarimi, tauna Iesu Keriso.” ⁴ Mai Jew ḡelau orai i taini ma taui i votaḡotaḡoi. Ma nanare Jentail nelara maḡamaḡagau God taurauduneleina ma waivine wavai naenaei maḡamaḡagau.

⁵ Wate mai Jew i unura ma rava ora-potapotai maḡamaḡagau au etanai i tami ma au taon vikaruwaḡawaḡa i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari. ⁶ Wate maranai ega ita nelaḡai taui Jason ma kerisiana ḡelau i taina-naiei taon babadai awari, ma i garara, “Wei ravai dobu au anatapuna apoapoe maḡamaḡagau i kauai, marina i ḡetai ata au dobu.” ⁷ Ma Jason, Paul ma Sailas i taravaini ana au numa. Taui Caesar ana tarawatu e viviaigai ma e ririwa da gulau ḡelauna e mamae wavana Iesu.

⁸ Maranai patara ma taon babadai wei babanina i nonori taui amloi i ḡaiḡai kaua, ⁹ ma Jason i egari da mane ḡaeḡaena i vimaiei da ega mae boaboa ḡelauna ina vitupui. Ma taui Jason i voterei da i nae.

Au Berea

¹⁰ Ma waguvarai tauvitumaḡana Paul ma Sailas i paritawanei au Berea. Maranai kampa i ḡeta, ma i rui au boru numana. ¹¹ Mai Berea i viaiaii, ega me mai Thesalonika. Taui i rautaniḡana ma i votelatela ma marana patapatana God ana buka i ‘aiavi da ita aramanei da Paul aiwai i bababaniei lamna riwa kaua. ¹² Ma lamnei mai Jew maḡamaḡagau i vitumaḡana, ma nanare mai Greek waivinei wavai naenaei ma nelara.

¹³ Maranai mai Jew au Thesalonika paratana i nonori da Paul God riwana i raraugugulei au Berea, taui maiteni i nae kampa, ma rava i rauegari da ḡavia ita vikarei. ¹⁴ Maratagogi kerisiana Paul i paritawanei au gera

* **16:35:** vs. 20 ma inana. † **16:37:** Mai Rome ai tarawatu lamna, “Ega rava Romei ma kwapu labalababai bo ma pani da au naona ma rauetarei.” Rome Israel i vibadei Iesu ana au mara.

wate Sailas ma Timothy au Berea provins i mae. ¹⁵ Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laḡilaḡina ita nei awarina.

Paul au Athens i raugugula

¹⁶ Ma Paul au Athens ana rava i paipaini, ma i 'nanai da kampa kokoitau i maḡa kaua ma i vinuabola kaua. ¹⁷ Mai Jew ma mai Greek God tauviborumeina awari i jima guratana au pari numana ma nanare au deba, aiai da i ḡeta ma i rautaniḡana. ¹⁸ Ma rava ḡelau i nuaulaulai i ḡetai ma maiteni i vitarapiri, tau i e ḡoreḡorei mai Epicure ma mai Stoic*, tau i lawana ai kaua tauviararamanai. Ma ai rava ḡelau i paridadana, “Wei ravana aiwai e voḡavogane?” Ḗelau i riwa, “Mepa da tauna dobu ḡelau ai god e bababaniei.” Tau i wenanare i babani aubaina Paul Iesu Riwana Aiaina ma ana iraḡe ma ana vomairi me, i raugugulei.

¹⁹ Ma i taravaini ma i naiei ai au boru e ḡoreḡorei Areopagus ma i riwei, “Ma nei ma a ḡoei da am viararamanana vouna e bababaniei, ata aramanei. ²⁰ Kaua ḡelau i babaniei tauai a vivinuanainiei, ma a ḡoei da ana aramanei anona aiwai?” ²¹ (Taumana ma mai Athens marana patapatai ai nola eḡa aiwai, da kaua voui ina virarautuei ma ina nononori.)

²² Ma Paul babadai au naoi i mairi ma i riwa:

Dogadogara mai Athens! A inana da taumi vipatupatutumi ami god awarii, ²³ A bababara ma ami pulo aniapunana a inainanai, ma tagogi a inana i tepana i giruma, “Wei God eḡa ata araramaneia aubaina.” Wei Godna o viviborumei wate eḡa ota aramanei. Tau ana riwemi nai Godna aiai. ²⁴ *Tauna God mara ma dobu ma aiwai anatapuna au orana i kauai. Ma tauna mara ma dobu badana, ma numa rava uranei e voavoi au orana eḡa ita mamae. ²⁵ Ma eḡa rava ai agu ita paipaini, tauna agu eḡa ita ḡoeḡoei. Aubaina tauna rava lawana ma lavutu ma anatapuna e vereverei. ²⁶ Au karena rava tagogi i kauai ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraḡe ma animae paratana i aiterei. ²⁷ God wenanare i kauai da rava tauna ina baiei da mepa ina nelaḡai. Wate tauna au ḡereḡereta, eḡa au uama. ²⁸ Taugiruma ḡelauna Greekei i riwai pa, “Taunei ta mamae ma ta bababara ma anatapuna ta kaukauai.”† Ma wate ami taugiruma ḡelauna i girumi i pa, “Tauai nanare tauna natunatuna.”‡

²⁹ Ma tauta God natunatuna, eḡa tana notai da God lamna me kokoitau, goldei bo silvei i kauai. Rava uraiei ma ana nuaulaulauei i kauai. ³⁰ Wariāḡa rava God eḡa ita aramanei wate God tau i 'nana-tawanei, wate marina anataputa egaegarita da tana rupena ma tana mae-tavireta awarina. ³¹ Aubaina mara i vinei maranai rava anatapai aiainiei ma jijimaninei ina kovoḡi. Rava i vinei da taunei ina kovoḡa.

* **17:18:** Mai Epicure rava wavana Epicurus ana viararamana i votaḡotaḡoi. I viararamana da lawana ana ano lamna nuaiiai. Da tau i aiwai da tupuai ma matai ana rauoḡara, e vivinuaiaiei. Ma aiwai da e virovorovi bo inivira e vereverei. Tau i wei lamna e ḡeduḡeduaiiei. Tau i ririwa da God rava eḡa ita vinuavainiei Stoic rava wavana Zeno ana viararamana e votaḡotaḡoi. I viararamana da rava ma ai maiteni au rivivata ta mamae (nature) ita vivirei, Tau i ai goana ma ai erawa ita retawanei ma ita vinuanotanota kaua ma avena rava ḡelau ai agu ita raunenelei. Tau i ririwa, “Nuaiiai lamna kaua e vovoterei da mena ina tupua nei nanare ina tupua.” ☆ **17:24:** 1Ki 8:27;

Act 7:48 † **17:28:** Epimenides Ciritei au 6 century BC. ‡ **17:28:** Aratus Silisiei 3 century BC.

God wei ravana iraḡelei i vovaimairini lamna ina vimataira rava awari da ravana anina tauna.

³² Maranai Paul iraḡelei vomairina i babaniei, rava i nonori ma ḡelau tauna i vinamei wate ḡelau i riwa, “Tauai a ḡoei da muriai wei babanina ma babaniana-melei.” ³³ Ma Paul ai boru i opu-tawanei ma boru i gudu. ³⁴ Wate ḡelau i vitumaḡana ma Paul i votaḡotaḡoi. Tagogi lamna Dionisius, Areopagus boruna au orana, ma wavine wavana Damaris, ma rava ḡelau.

18

Paul i nae au Corinth da rava awari Iesu ita jimei

¹ Paul Athens i netawanei ma i nae au Corinth. ² Kampa Akwila tauna Jew au Pontus i tupua, marinaota au Italy* da i nei awana Prisila maiteni. Aubaina Rome ai gulau Claudius mai Jew anatapui i viaḡaḡei da Rome i opu-tawanei. Paul i nae da tau i ita inanai. ³ Paul tau i maiteni i mae, tau i tauampopo, (ḡamoḡamo opina ma gara i popopoi numa aubaina ma i gimagimarei) me Paul ai nola tagogina. ⁴ Sabate patapatana au pari numana tauna mai Jew ma Jentail awari i jima guratana da orai ita sinavirai.

⁵ Maranai Sailas ma Timothy au Masedonia da i ḡetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso. ⁶ Wate mai Jew Paul i viḡaviei ma riwa apoapoenei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eḡa tau ona viwavuii! Marina da e nena, ana nae Jentail awari.”

⁷ Ma tau i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ḡereḡerena. ⁸ Crispus, pari numana ai bada, BADA i vitumaḡanei ana numa ravai maiteni, ma mai Corinth maḡamaḡau Paul i rautaniḡanei, i vitumaḡana ma i babataito.

⁹ Waguvara tagogi BADA Paul ana au inana i babani i pa, “Eḡa ma rovo, ma babani ma eḡa ma genuana.” ¹⁰ Aubaina Tau tam maiteni. Ma rava eḡa ina rau-iviapoapoelem aubaina au tauvotaḡotaḡo i maḡa wei au dobuna. ¹¹ Ma Paul kampa i mae madeḡa tagogi ma nawaravi six, ma God riwana i jimei.

¹² Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i nae Gavena awarina da ita rautarei. ¹³ Ma tau i viwavui pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

¹⁴ Ma Paul gamona i laḡi da ita babani ma Galio i babani mai Jew awari i pa, “Mepa da taumi wei ravana o viviwavui da kaua ḡaeḡaei bo kaua apoapoe aubaina, lamna tau au nola da ata rau-taniḡanemi. ¹⁵ Wate wei taumi ami babani ami wava ma ami tarawatu, ana voterei au urami.

* **18:2:** Rome taon lamna taon ḡaeḡaena au Italy ma ai kapital AD. 49 au orana kampa viḡaiḡaiawa ḡaeḡaena da wavalatona Claudius mai Jew i riwei da dobuna i netawanei. † **18:13:** Mai Jew e ririwa da Paul eḡa tau i vitumaḡana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i ḡoei da Rome ai bada Paul ina kovoḡi. Ma inanai Act 16:20-21 ma 17:7.

Tau eġa wei kauai ana rauetarei.” ¹⁶ Ma etara numanei i viaġaġana-opunei. ¹⁷ Tau i anapui pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

Paul i nae me au Antiok au Syria

¹⁸ Paul i mae mara aburuna tauvitumaġana maiteni au Corinth ma wagei i nae au ġereġere au Cenkirei waga ai au animae. Prisila ma Akwila maiteni. Ma kampa Paul ana parivainuagana aubaina aparana i ġari, ma anapui i nae au Syria ¹⁹ Tau i Ephesus i ġeta ma Paul, Prisila ma Akwila i voterei. Ma i nae au boru numana Mai Jew awari i jima. ²⁰ Rava i vibaġai da ita mae mara aburuna wate tauna eġa ita vianina. ²¹ Wate maranai i opu da ita nae ma tau i riwei, “Ana nememei mepa da God ana ġoana, ma Ephesus i netawanei ma wagei i damana.” ²² Maranai i ġeta au Caesarea ma i nae au Jerusalem da kerisiana i raugenari ma i nae au Antiok. ²³ Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina. ²⁵ Rava ġelaui, Apolos BADA ana etanai babanina, i viararamani, ma ana tepatorana i jima ma Iesu ana kaua ma ana lawana i viararamana-kauei. Wate tauna John Taubabaito ana babaito babani ava i aramane. ²⁶ Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ġorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nenae au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita pariverei da tauna ita nebelei. Maranai au Akaia i ġeta ma tau i God ana aguei i vititumaġana, agu ġaeġaena i verei. ²⁸ Tauna ana babanie i deba mai Jew i vovaiuibai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

¹ Apolos au Corinth taon Akaia provins i mae, ma Paul ola i taġoni da au Ephesus i ġeta. Kerisiana ġelaui kampa ² ma i paridadanei i pa, “Arua vivivireina o vaia bo eġa maranai o babaito?”

Tau i paribelei i pa, “Eġa, Tauai eġa ata aramane i da Arua vivivireina e mamae.”

³ Ma Paul i paridadana, “Aiwai babaitona o vaia?”

Tau i paribelana, “John ana babaito a vaia.”

⁴ ✱Paul i riwa, “John ana babaito lamna mataira da tau i ai ġo'apoapoelei i mae-tavirei; ma mai Israel i riwei da Tauna au muriu e nenei ona vitumaġane i lamna Iesu.” ⁵ Maranai wei i nonori ma i aramane i tau i babaito BADA Iesu wavane. ⁶ Ma Paul urana au kolai i terei ma Arua vivivireina au orai i rui. Ma i vikarei da pona tapunei i babani ma God riwana i raugugulei. ⁷ Tau i nelara iavana twelve.

⁸ Paul i nae au boru-numana ma kampa nawaravi tonuğa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumağane. ⁹ Wate ġelau i kampa orai i bagigabi ma eğa ita ġoei da ita vitumağana, ma patara au matai Iesu ana etanai i vijiboġi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i ġiugiu pompom. ¹⁰ Ma nanare i mae madeğa ruağa i kwa, da mai Jew ma Jentail ravai mağamağau i Eisia provins maemaei BADA riwana i nonori.

Sceva natunatuna

¹¹ Ma God ana rewapanei Paul kaua ġaeğaei ma aniba i kaukauei, ¹² lamna avena wate rava ai agesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

¹³ Mai Jew ġelau i dobuna i naeni ma arua apoapoei i viviağana-opunei ma i raudadana Iesu wavanei da arua apoapoei i viviağaei. Tau i arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.” ¹⁴ Skeva, pirisi ai bada natunatuna nelarai seven wei kauana i kaukauei. ¹⁵ Wate mara tagogi arua apoapoena i paribelei, “Iesu a aramanei ma Paul a aramanei ma taumi aiavoi?” ¹⁶ Ma rava au orana arua apoapoena maemaena i auepai ma tau i vunui da eğa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

¹⁷ Mai Jew ma Jentail ravai au Ephesus maemaei wei riwana i nonori ma rovo orai i ġaeni ma Iesu wavana i vivirana-kauei.

¹⁸ Mağamağau i vitumağana ma i nae kerisiana awarii ma ai ġo’apoapoe i rupeni. ¹⁹ Tauvitumağana voui mağamağau paraparaumai,* ai buka i vidamni au deba ma i apui. Maranai bukai ai maia i ‘avi da silver 50,000†. ²⁰ Kaua babai me wei, Iesu riwana i vibabarai nai au dobuna ma rava mağamağau i vitumağana.

²¹ Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inanai.” ²² Ma Paul ana tauagu ruağa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Viğaiğaiawa au Ephesus

²³ Iesu ana babani ma ana kaua vouna aubaina, ma viğaiğaiawa ġaeğaena i tupua au Ephesus. ²⁴ Silver taunoleina wavana Demetrius, mai Greek ai god wavinena ana numa taparoro kokoitau i rarau-ğaroğaro i da i gimagimarei, ma wei nolana mane ġaeğaena e neinei i silver taunoleina nai au dobuna aubaii. ²⁵ Ma tau i anatapui ai rava nolana tagogina e kaukauei maiteni i rauğoreiai ma i riwa, “Au rava, o aramanei da ata maura wei nolanei ta vaivaia. ²⁶ Ma o inanai ma o nonori menanare wei ravana Paul e kaukauei, Rava ai nota i sinavirai da mağamağau god Artemis raudunena i voterei au Ephesus ma dobu Eisia paratana anatapuna. Ma e ririwa da ‘rava god i rauğaroğaro i, lamna eğa god.’ ²⁷ Tauta tana inana kaua da wavata ma ata mane ani kauana eğa ina apoapoe. Ma ata god

* **19:19:** Au Deu 18:10-14 God ana rava e viviğaei da eğa ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biaga.

ġetelarana Artemis ana numa taparoro ma wavana eġa ina vijiboġi, eġa au Eisia provins ava ma dobu au anatapuna.”

²⁸ Maranai patara wei babanina i nonori tau i meji kaua ma i vigaragarei, “Artemis mai Ephesus ai god i ġetelera!” ²⁹ Ma tau i garagarara rava nai au dobuna i nonori ma tau maiteni i garara labalababa. Anina ma patara Gaius ma Aristakas i vojijini tau ruaġai mai Masedonia Paul ana tauvigwanigwaniana, ma i rubana-naiei nai dobuna ana boru gabuna.† ³⁰ Paul i ġoei da patara au naoi ita rui da ita babani wate kerisiana eġa ita vianinei. ³¹ Wate nanare Paul ana rava ġelau i gabemani tauna i viġaei da eġa ina nae au boru.

³² Patara i vinuanaina, i logologoi ma i garagarara labalababa ma eġa ita aramanei aiwai aubaina weka i nei. ³³ Mai Jew oroto tagogi i dudu-opunei au naoi wavana Alexander ma patara ġelau i garara awarina da ita babani. Alexander urana i voepai da tau i genuana ma tauna ana rava aubai ita babani. ³⁴ Wate maranai i aramanei da tauna Jew. Tau i anatapui pona tagoginei wenanare i garagarara, “Tauta mai Ephesus ata god Artemis i ġetelera!” da *hour* ruaġa i kwa.

³⁵ Ma taon badana patara i riwei da i genuana ma i riwa, “Au rava mai Ephesus, rava anatapui au dobu i aramanei da tauta tauvipaipai mai Ephesus ai god ġeġetelarana Artemis ana numa taparoro ma ana ġaima vivireina marei i peuai aubaina. ³⁶ Eġa aiai wei ina vikaua-moruei. Lamna aubaina orami ina rauai ma eġa aiwai apoapoena ona kauai. ³⁷ Wei ravai o neiai weka wate tau eġa au numa taparoro aiwai ita danenei bo ata god ita riwana-boei. ³⁸ Mepa da Demetrius ana rava maiteni e viviwavui tau i ina nae ina rauetara ma ami viwavu ona naei kampa taurauetara awarina. ³⁹ Ma mepa da ami nuabola ġelau i mamae lamna taon babadai ai au boru ona babanie i ma ona tere-jijimani. ⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaġawaġana anona eġa, ma mepa da Rome ina paridadana ma tauta menanare tana paribelananei. ⁴¹ Anina ma boru i gudui ma rava i vilamonei.”

20

Paul i nae au Masedonia ma Greece

¹ Vikaruwaġawaġa au Ephesus taon i kwa ma au murina Paul kerisiana i raukwatueiai da i vinua-terenei, i viegualauei ma i netawanei da i nae au Masedonia provins. ² Ma dobuna ġaeġaenana i naeni ma kaua maġamaġau i kerisiana i vinua-terenei. Anina ma au Akaia* i ġeta. ³ Kampa nawaravi tonuġa i mae. Tauna i vokaukaua da ita nae au Syria ma wate i nelaġai da mai Jew ġelau i viraġenana i viviogatarei lamna aubaina da i nae me au Masedonia. ⁴ Nelara ġelau i votaġotaġo tau i lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy. ⁵ Tau i wagei i ainae au Troas ma kampa i painiai. ⁶ Ma palawa bagibagina torelana au murina, wagei Philipai taon au

† **19:29:** Dobuna ana boru gabuna lamna numa ġaeġaena. Eġa poewana, ma inanana me nawaravi gebona. Rava maġamaġau i 26,000, nanare ina kiala **meeting place**. Rava e nena kampa da kalo tapuna ma e raraubiġa. * **20:2:** Marina e ġoreġorei Greek.

Masedonia provins a netawanei. Ma aupom 5 au murina au Troas a ġeta ai rava awari, kampa aupom 7 a mae.

Au Troas, Paul Eutikus iraġelei i vovaimairini

⁷ Wiki au karena - Sunday tauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratonna da ita nae. ⁸ Numa vatavatara au tepana a vitagogielai, ma kampa rampa maġamaġaui i ararata. ⁹ Orotu laragana wavana Eutikus au windo i kiakiala ma Paul i raraugugula, ma tauna matana i pota kaua da i raunuavuru, ma kampa au tepa dewadewana i peu-ġaira da au doa i rauei. Maranai tau i ġaira da ita voepai, tauna irairiġena. ¹⁰ Paul i ġaira, i matave-tepani ma i rapai ma rava i riwei i pa, “Eġa ona vinuabola, tauna lawalawaina!” ¹¹ Anina ma Paul i ġae me au numma ma kerisiana maiteni BADA ana amgogona amna i ani ma awari i babani maratoma. Ma Paul nai dobuna i netawanei. ¹² Tau i laragana lawalawaina i naiei au numma ma rava orai i rauei.

Paul i amkuka au Miletus

¹³ Paul aenei i nae au Assos ma tauai i riwelai da wagei ana nae au Assos da tauna kampa ana vigerui. ¹⁴ Ma au Assos a vigerui ma a nae au Miletus ¹⁵ Maratonna bonabona Kios au ġereġerena a nae. Ma marana i tom au Samos a ġeta, ma maratoma ġela au Miletus a ġota. ¹⁶ Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

¹⁷ Au Miletus Paul riwa i paritawanei au Ephesus taon kerisiana babadai awari da ita nebele. ¹⁸ Maranai au Ephesus taon i ġetai ma tau i riwei i pa:

O aramanei au lawana menanare maranai vovounai weka au Eisia provins a ġetai. ¹⁹ Mai Jew i ġoei da ita rau-iviapoapoeleu wate tau a vilamolamona ma ana toutou BADA awarina a vivitaunola. ²⁰ O aramanei da maranai God Riwana Aiaina awarimi a raugugulei, riwa aiaina aniaguimi eġa ata tajjini. Au deba a raraugugula rava maġamaġaui au naoi, ma ami au numma a viararamanimi ²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

²² Ma marina Arua Vivivireina i riweu da ana nae au Jerusalem. Eġa ata aramanei kampa aiwai awariu ina tupua. ²³ Wate taon nununai awari a nena ma Arua Vivivireina e vivieġeu da amapo ina panu ma au deri ina tereu ma ina rau-iviapoapoeleu. ²⁴ Ma mepa da ina viraġeniu, wei lamna eġa kaua ġaeġaena tau awariu. Wate kaua ġaeġaena lamna BADA Iesu nola i verevereu da ana vikwai. Wei nolana lamna, God ana iviaiai maemaena, riwana ana raugugulei.

²⁵ Maġamaġaumi awarimi a nei ma God ana vigulau a raugugulei wate marina a aramanei da amadodo da i nena, naou eġa ona inana-melei. ²⁶⁻²⁷ God ana vilawana ogatarana rava aubai eġa ata govaġi awarimi lamna aubaina riwa bagibaginei a ririwemi da mepa da rava au babani eġa ina vitumaġanei ma ana lawana maema-nonoana ina vine-boai, lamna eġa tau au wavu. ²⁸ Taumi babada ma ona paina-melemi, nanare tauvitumaġana tau i aiavoi da Arua vivivireina au urami i teretereia.

Ona inana-vaitetei me sipu taupainana ana sipu e paipaini. Tau i lamna God ana vinevine taranei i gimarai. ²⁹ A aramanei da ana nae ma au muriu tauraugugula morumorui ina nei awarimi ma rava ai tumagana ina viapoapoeni, me auou moduei sipu au boruna viragena aubaina. ³⁰ Ma rava gelaui ami au dam oina ina vomairi ma ina viaramana ma moruei rava orai ina taini da tau i ina votaḡotaḡoi. ³¹ Lamna aubaina matami ina kala ma ona aramanei da madeḡa tonuḡa marai ma wagu-varai a notanotaimi ma ana toutou a viwararamanimi.

³² Ma marina God au urana a tereteremi. Ana agu e verevereioimi ona vivitumaganei. Wei aguina e vovaivirewapanimi, ma ami pulo ina veremi, aubaina taumi God natunatuna viaiainai. ³³ Ma tau eḡa rava ana mane bo ana purapura ata rauḡarei ³⁴ Taumi o aramana-kauei da tau nimauei a nola da mane a vaia da tau au taubagibagi turau aubaiai. ³⁵ Nanare, a viatataiemi da ona nola guratana da mane ona vaia ma molaka ona voagui. Iesu ana babani eḡa nuanuami ina vuru, Tauna i riwa i pa, “Verena i ai kaua eḡa me vainana.”

³⁶ Paul i babani vorovei ma anatapui i mae-ḡaira au doa ma i raupari. ³⁷⁻³⁸ I vinolanola i pa, “Amapo eḡa naou ona inana-melei.” Wei riwana i vinuabolai da i vitouana, Paul i taragwabai ma i vigia-laḡolaḡonei. Ma i naiei da au waga i vigeruei.

21

Paul ana vaḡai au Jerusalem

¹ Ephesus kerisiana babadai a viegualauei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon. ² Weka waga ḡelauna i nenae au Phonisia a gerui, ³ da au Saipras bonabonana a rubatawanei, au kelakelauai da a nae au Taia au Syria provins a ḡota, da purapura ita viopuni. ⁴ Kampa tauvitumagana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viḡaei da eḡa ina nae au Jerusalem. ⁵ Ma mara i ḡetai da ata vomairi, kerisiana awawai maiteni da natunatui taon i voterei ma anatapui ai a ḡaira au gera, a raupari gogona. ⁶ A viegualau da tauai au waga a geru ma tau i nae-me ai au numa.

⁷ Au Taia ma a nae au Tolemas taon a ḡeta. Tauvitumagana kampa a nebelei ma aupom tagogi maiteni a mae. ⁸ ✱ Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina. ⁹ Tauna natunatuna waivinei 4 eḡa tavitavinei, tau i God ana riwa i vivieḡai rava awari.

¹⁰ ✱ Aupom vomaḡai i kwa, kerisiana wavana Agabas, tauna nanare God riwana i vivieḡai, Judeaei i ḡairai au Caesarea. ¹¹ Ma i nei awariai da Paul ana tairoro i vaia ma tauna urana ma aena i raḡina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina raḡini, ma Jentail au urai ina terei.”

¹² Maranai wei riwana a nonori, tauai kerisiana ḡelaui maiteni Paul a vibaḡana-guratei, da avena ita nae au Jerusalem. ¹³ Wate i pa, “Aiwai

aubaina o vivitouana ma orau o viviapoapoeni! Tau a vokaukaua nonoa da ina raġiniu, wate eġa lamna ava ma ina viragēniū au Jerusalem, BADA Iesu a vovotaġotaġoi aubaina.” ¹⁴ Tauai a viviġaei ma eġa tagotagōgina da nuanuana ata sinavirai lamna aubaina riwanana a voterei ma a riwa a pa, “BADA ana ġoanei nanare ina tupua.”

¹⁵ Wei au murina a vokaukaua ma a vomairi au Jerusalem. ¹⁶ Kerisiana ġelau mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaġona i vikareni maranaina rava vouvounai i vikarei da Iesu Riwana Aiaina i rarau-gugulei.

Paul, James i raugenari

¹⁷ Maranai au Jerusalem a ġeta kerisiana ana nuaiaii i nebelelai.

¹⁸ Maratom ġela Paul maiteni a nae da* James a raugenari,† dogadogara anatapui kampa. ¹⁹ Paul tau i viegualaei ma ana au vaġai God aiwai i kaukaui Jentail awari anatapuna tau i parivere.

²⁰ Maranaina wei riwai i nonori, tau God i voepaepai ma Paul i riwa i pa, “Turaiai u aramanei mai Jew ai maġa tausand nanare weka Iesu e vivitumaġanei, ma God ana tarawatu e vovotaġo-kauē. ²¹ Wate rava Jew kerisiana weka au Jerusalem am kaua i vibenabenei, da tam Jew Jentail maiteni e mamae e viararamani da Moses ana tarawatu ina gedugeduaiei. Ma u riwei da natunatui ini eġa ina bori ma ai kaua ġelau eġa ina votaġotaġoi. ²² Tau i aramanei da tam u ġetai, Marina aiwai tana kauē? ²³ Aiwai a ririwemi ona kauē. Au nelara 4, tau parivainuagana bagibagina God awarina i kauē. ²⁴ Ma taravaini ma ona nae au Tempol ma ona viaiaina-melemi ma ma vimaia da tau ai viaiaina pulona ina kauē. Anina ma tau kolai ina ġari ma rava anatapui ina aramanei da tam Moses ana tarawatu anina e vovotaġotaġoi, ma babani au naona lamna anatapuna moru kaua. ²⁵ *Ma Jentail marina i vivitumaġana aubaii pepa a girumi ma wenana a riwei, sia e pulopuloei kokoitau awarii eġa ina ani, Tara eġa ina umai, Rava ġamoġamo uai e kikiki tarai eġa ita toi-tawanana, eġa ona ani. Eġa ona viawawana labalababa.”‡

²⁶ Anina ma marana i tom Paul nai nelarai 4 maiteni i viaina-melei God au matana. Muriai Paul i rui Tempol au orana ma i vinolanola pirisi awarii da mara aiwai tau ai viaiaina ina voterei. Ma maranaina pulo ita terei tau tagotagogi ava aubai.

Paul i pani.

²⁷⁻²⁹ *Ma aupom 7 aburuna ava da ita kwa ma Jew ġelau au Eisia provins maemae tau Paul i 'nanai Tempol au orana. Au naonei tau Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Tau Paul i vojijini

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vaġai i tami bo rava i puloi i verei damanai mane taupainina i verei ☆ **21:25:** Act 15:29

‡ **21:25:** Viawawana labalababa wei anatapuna e vaivaipai: Rava ġela awana oroto bo wavine maiteni e viawawana (Exo 20:14; Deu 5:18); Rava ġela maiteni e viawawana mane bo purapura aubaina (Lev 19:29; 1 Cor 6:15); Natuoin maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotu ma oroto bo wavine ma wavine e viawawana (Lev 18:22; Rom 1:26-27); Rava ma ġamoġamo e viviawawana (Lev 18:23); Rava ġela, eġa awaoim maiteni e viawawana (Eph 5:3); Rava ġelau i gaegari da maiteni ma viawawana. (Gen 34:7; Deu 22:25-28). ☆ **21:27-29:** Act 20:4

ma i garara i pa, “Nelara mai Israel ona nei, ona voaguiai! Wei orotona dobu anatapuna e nenaeni ma rava anatapui e viviararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaideoedoei God au matana!”

³⁰ Ma rava anatapui i nonori da au Tempol viḡaiḡaiawa i tupua ma anatapui kampa i ruba. Ma Paul i vojijini ma i taina-opunei au doa ma Tempol metaetana i gudui. ³¹ Maranai tau Paul virāḡenana i kaukauei, Mai Rome sorodia ai bada ḡaeḡaena i nonori da viḡaiḡaiawa ḡaeḡaena i tupua au Tempol. ³² Tauna laḡilaḡina ana sorodia ma ai babada i vaini ma i ruba kampa, maranai rava tau i 'nanai, Tau Paul vunuaana i voterei.

³³ Sorodia ai bada i nei Paul awarina da i vojijini ma ana sorodia ruaḡa i riwei da seinei Paul urana au urai i pani jijini. Anina ma tauna patara i vitara-virevirei i pa, “Wei aiai orotona? Aiwai i kauēi?” ³⁴ Patara au orana rava ḡelau babani tagogi i gararei, ma rava ḡelau babani tapuna i gararei. Rava were da nare i garagarara da sorodia ai bada menanare ita nelaḡai ḡaiawa karena aiwai, lamna aubaina ana sorodia i egari da Paul ita naiei, ai au bareki. ³⁵ Maranai Paul bareki tetena i tutuḡereḡerei, patara i ḡaiawa guratana aubaina sorodia Paul i voepai da i avarai da ita ḡaloei. ³⁶ Patara amapo da tau i vovotaḡotaḡoi ma i garagarara i pa, “Ona virāḡeni, ona virāḡeni!”

Paul patara awarii i babani.

³⁷ Maranai tau aburuna ava da au bareki ita rui, Paul Greekei sorodia ai bada i riwei i pa, “Anina bo eḡa da awarim ata babani?”

Ma tauna i aupai ma i riwai pa, “Tam Greek u aramanei bo? ³⁸ Tau a notai da tam Egyptei, rorova ai babada u viḡaviei, Ma rava 4,000 orai potapotai u opunei au mutulua, Tam nai ravana bo?”

³⁹ Paul i paribelana i pa, “Eḡa! Tau Jew ei, au taon Tarsus a tupua, au Silisia provins, a vivibaḡaim da rava awari ana babani.”

⁴⁰ Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau awarii ai ponanei i babani i pa.

22

¹ “Amamau ma varevareiu, ona rautaniḡaneu ma ana viatataiemi da tau eḡa aiwai ata kauana-boai.”

² Maranai patarana Paul i nonori da tau ai ponei i bababani, tau i genuana ma i rautaniḡana.

³ ✧ I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.^{*} A ḡoana-guratei da God ata voepaepa-kauēi me taumi anatapumi nanare. ⁴ ✧ Tau Iesu ana etanai tauvotaḡotaḡoina a rau-iviapoapoelei da ḡelau i'raḡe. Nelara ma waivine a pani ma au numa panipani a tawana-ruiei. ⁵ Pirisi ḡeḡetelarana ana boru ḡeḡetelarana[†] maiteni i aramanei da tau a ririwa kaua. Tau ai vianina pepana i vereu

✧ 22:3: Act 5:34-39 * 22:3: Gamaliel tauna tauviararamana ma rava aiaina Paul ana au mara. Tauna Pharisi ma boru ḡetelarana (Sanhedrin) au orana. ✧ 22:4: Act 8:3; 26:9-11

† 22:5: Sanhedrin

da ai rava au Damaskas ata verei ma a nae au Damaskas da kerisiana ata pani ma a neiai da kovoğa ita vaia weka au Jerusalem.

⁶ Aubenai Damaskas a tuğereğerei ma maratagogi lalaina gamrina gaeğæna marei i gairai da i tunui. ⁷ A peu au doa ma pona a nonori i pa, “Saul! Saul! Aiwai aubaina e rarau-iviapoapoeleu?”

⁸ Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapoelei.”

⁹ Rava maiteni a nena lalalaina i 'nanai wate babani eğa ita nonori.

¹⁰ A paridadana a pa, “Bada Aiwai ana kauai?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

¹¹ Lalalaina gamrina i rata guratana ma matau i kamoi da eğa ata inainana. Ma tauvlgwanigwaniana au urai i voa ma i naieu au Damaskas.

¹² Oroto wavana Ananias kampa i mae tauna God i voepaepai ma ana tarawatu i vovojijina-nonoei. Mai Jew tauna i vivirana-kauai. ¹³ I nei da au ririvau i mairi ma i riwa, “Vareiu Saul ma inana me!” Nai marana a inana me.

¹⁴ Anina ma i riwa, “Amamata ai God i rautanim, da ana goana ma aramanei, ana Taunola Jijimanina† - matamei ma inana, ma riwana taniğamei ma nonori. ¹⁵ Aiwai u inainana ma u nononori ma vimatematei rava anatapai awarii. ¹⁶ Marina aiwai e paipaini! Tauai ana babataitoim ma BADA awarina ma raupari da am go'apoapoei ina oğa-tawanei.”

¹⁷ Anina ma a nae au Jerusalem. Au Tempol a raupari ma matauei kaua a inana. ¹⁸ A inana BADA awariu i bababani i pa, “Rava weka am jima tau aubai eğa nonorana ita goeğoei. Lagilağina Jerusalem ma opu-tawanei.”

¹⁹ Wate tau a paribelei, “BADA wei ravai i aramanei da pari numai a nepai da kerisiana a vunui ma a pani-naiei. ²⁰ *Ma maranai am peroveta Stephen tarana i toi, tau kampa a maimairi ma ana irağæ a vianinei ma gaima tautawanai ai gara a paipaini.”

²¹ Ma BADA i riweu, “Ma nae a paripari-tawanem aueia Jentail awarii.”

Paul e ririwa da tauna Romei

²² Patarana Paul i rarautaniğanei ma maranai wei babanina i kauai tau i meji guratana ma i vigaragararei i pa, “Ona virağæna-tawanei, eğa ina mae!”

²³ Tai i vigaragararei, ai kwama i kwajikwajiei ma pokau i tawatawanei awarina. ²⁴ Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieğa aiwai aubaina ana rava amloi i gaiğai ma awarina i garagarara. ²⁵ Ma urana ruağa i terepai au aidamo ma i rağirağini da ita wipi ma Paul sorodia ai bada i riwei i pa, “Tau Rome-ei, Eğa ota etareu ma o vunuvunu-labalababaiu. Lamna menanare?”

²⁶ Maranai sorodia ai bada wei i nonori ma i nae da ai bada gaeğæna i pariveri. Ma tauna i vitara-virevirei i pa, “Aiwai e kaukauai? Wei ravana Rome-ei!”

²⁷ Sorodia ai bada i nae Paul awarina ma i paridadanei, “Ma riweu! Riwa kaua da tam Rome-ei bo?”

Ma Paul i paribelei, “Ee, lamna riwa kaua!”

† **22:14:** Rava Jijimanina bo bulobulona, lamna Iesu wavana. Paul eğa Iesu wavana ita latoni mepa da taurautaniğana mai Jew ita viamlogaiğaini. * **22:20:** Act 7:58

28 Sorodia ai bada Paul i riwei, “Tau mane gaegeaena Rome gabemanina a verei da a vimai Rome.”

Paul tauna i riwei, “Tau a tupua da Rome-ei.”

29 Sorodia i goei da Paul ita etarei wate maratagogi ita gori-melei. Ai bada ita gori ma i rovo-kaukaua maranai i aramanei da i kauana-boai da Paul, Rome-ei seinei i pani.

Paul Jew ai boru getelarana\$ au naoi i mairi.

30 Au maratamna sorodia ai bada i goei da ita aramana-kauai mai Jew ai viwavu aiwai Paul awarina. Ma lamna aubaina Paul ana seini i votawatawanei ma i opunei boru getelarana au naona i vimairini.

23

1 Paul boru gegetelarana i 'nana-jijini ma i riwa, “Varevareiu tau au nola God awarina i jijimana ma orau aiaina da wei paratana.” 2 Ma Pirisi gegetelarana Ananias rava gelauna Paul au ririvana i maimairi i egari da Paul i raunavanavai. 3 Ma Paul Ananias i riwei, “God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai.”

4 Tau Paul au geregerena i maimairi Paul i riwei, “Aiwai aubaina God ana Pirisi Getelarana e vivijibogi?”

5 Paul i paribelei, “Varevareiu ega ata aramanei da tauna God ana Pirisi gegetelarana. Au buka i terei da *Ega God ana taunola ma parivai-apoapoeni.*” (*Exodus 22:27*)

6 *Anina ma Paul i 'nanai da Sadusi ma Pharisi gelai kampa ma ponana i rata ma i riwa, “Varevareiu tau Pharisi, amau maiteni Pharisi. A vitutumašana da God rava iragelei ina vovaimairini wei lamna aubaina taumi o etaetareu!” 7 Maranai wei i latoni Pharisi ma Sadusi vipari-parinišai i raukarei ma boru i kai da ruaša. 8 *Aubaina Sadusi e ririwa da rava e irairage lamna ega ita vovomairi me, ma anela da aruarua ega ita vitutumašanei, wate Pharisi wei anatapui e vitutumašanei.

9 Gaiawa gaegeaena i tupua ma tarawatu babadai gelai tau Pharisi, i vomairi ma i babani guratana i pa, “Tauai ega aiwai apoapoena ata inanai wei ravana awarina! Mepa da anela bo Bada Aruana tauna awarina i babani?” 10 Vigaišaiawa gaegeaena i tupua ma sorodia ai bada i rovo mepa da rava Paul ina viasikasikai ma sorodia i egari da i rui ma Paul i taravaina-opunei ma ina naieiau bareki.

11 Ma waguvarai gelauna, BADA Paul au ririvana i mairi ma i riwei, “Tepam ina tora! Me aubaiu u jima au Jerusalem nanare aubaiu au Rome ma jima.”

Mai Jew i vioga da Paul ina virašeni

12 Ubaubana mai Jew gelai i vitagogiei ma i viogatara ma i parivainuašana da ega ina am bo ina uma da Paul ina virašeni. 13 Nelara 40 nanare i vianina da Paul ina virašeni. 14 Tau i nae pirisi babadai ma dogadogara awarii ma i riwei, “Tauai parivainuašana bagibagina a kauai da ega ana am da Paul ana virašeni.” 15 Taumi Boru gegetelarana maiteni ona moru ma riwa ona pari-tawanei sorodia badana awarina da Paul

ina neiai ma ona vitara-virevirei da riwa kaua ona vaia. Tauai ana vipaipai da ana virāgeni muriai da weka ina ġetai.

¹⁶ Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

¹⁷ Ma Paul sorodia badana i ġoreiai ma i riwei, “Wei laragana laġilaġina ma naiei ami bada awarina da ana riwa ina riwei.” ¹⁸ Ma i naiei ai bada ġaeġaena awarina ma i riwei, “Panipani wavana Paul riwa i paritawanei awariu ma i riweu da wei laragana ata neiai awarim aubaina am riwa awarina.”

¹⁹ Sorodia ai bada ġaeġaena laraga i vinimavoai ma imaeria ma i paridadanei, “Am riwa aiwai ma riweu?”

²⁰ I riwa, “Mai Jew i riwa da ita vibaġaim da au maratoma Paul uta naiei ai au Boru ġeġetelarana, Wei anatapuna moru. ²¹ Wate eġa ma rautaniġanei aubaina rava 40 nanare pota e paipaini da ina virāgeni. Tauai i vioga da eġa ina am da Paul ina virāgeni. Tauai i vokaukaua ma am vianina ava e paipaini.”

²² Ma bada laraga i riwei da eġa aiai ina riwei ma i paritawanei.

Tauai Paul i paritawanei Gavena Felix awarina.

²³ Anina ma sorodia ai bada ġaeġaena babada ruaġa i ġoreiai ma i riwei, i pa, “Sorodia sod ravai 200, aiera ravai 200 ma hos ravai 70 ma vaia ma ona vokaukaua da waguvarai 9 oklok ona vomairi. ²⁴ Hos biaġa ona vaia Paul aubaina da aiaina ona naiei gavena Felix awarina au Caesarea.”

²⁵ Ma sorodia ai bada pepa wenanare i girumi:

²⁶ Tau Claudius Lisias, a girugiruma awarim au bada vinualaulaunam, Gavena Felix.
Egualau.

²⁷ Mai Jew wei orotona i vojijini ma ita virāgeni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei. ²⁸ A ġoei da ata aramanei ana apoapoe aiwai, da ata naiei ai Boru ġeġetelerana awarina. ²⁹ Ma a nelaġai da viwavuna lamna tauia ai tumaġana kauai ma Rome ana tarawatuei lamna tauna eġa aiwai apoapoen a ita kauai da ata virāgeni bo ata pani. ³⁰ Maranai riwana a vaia da mai Jew i ġoei da govagovaġanei tauna ita vunui. Lamna maratagogi a paritawanei awarim, ma nanare tauviwavu a riwana-guratei da kampa ina ġetai da ai viwavu ina kauai.

³¹ Ma sorodia ai babada i ririweia nanare i kauai ma waguvarai Paul i taravaini ma i naiei da au taon Antipatris i ġeta. ³² Au maratoma aiera ma sod sorodiai i naeme au Jerusalem ma hosi sorodia Paul i naei au Caesarea. ³³ Maranai hosi sorodiai au Caesarea i ġeta pepana ma Paul gavena i veredamanei au urana. ³⁴ Gavena pepa i ‘avi ma Paul i paridadanei metauna provins-na u tupua ma i riwa, “Silisia.” ³⁵ Gavena i riwa i pa, “Am etara ana nonori maranai am tauviwavu ina ġetai.” Ma sorodia i naiei Herod numa i voavoaiana da ita inana-vaitetei.

24

Paul Gavena Felix au naona i mairi

¹ Aupom 5 au murina Pirisi ġeġetelarana Ananias ma dogadogara i ġaira au Caesarea ai taurauetara wavana Tertelus maiteni. ² Ma Paul i ġoreiai gabemani au naona. Ma Tertelus i vomairi ma viwavuna i vikarei:

Au bada Felix *vinualaulaunam, Am vibadanei ta mae ubauba ma ata nota ega aiwai. Ma kaua vouii ma aiaii u kaukauei ata dobu voana aubaina i voagu-kaueta. ³ Anatapuiai mepamepa a mamae a vinuaiai kaua tam awarim. ⁴ Wate ega ata goei da ana visina-viraviraim. Ma lamna aubaina a goegoei da uta rautaniganau mara aburuna ava.

⁵ Tauai a nelaġai da wei ravana lamna orana potapotana ma viġaiġaiawa tauvikareina mai Jew awarii dobu au anatapuna. Tauna boru vouna e ġoreġorei mai Nasaret† ai bada. ⁶ Tau i goei da Tempol maiteni ita tuvaedoei ma lamna aubaina a pani. ⁷ ‡ ⁸ Ma rauetarei ma ma nelaġai da ai viwavu lamna anatapui riwa kaua.

⁹ Ma mai Jew Tertelus au murina i mairi ma i riwa, “Wei babani anata-pui riwa kaua!”

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madeġa biaġa wei dobuna ai taurauetara lamna aubaina tau ana nuaubau ana babani aubai. ¹¹ Am rava ina riwem da tau pom ota aupom ¹² nanare a ġeta memei au Jerusalem da BADA ata voepaepai. ¹² Au tauviwavu ega ita nelaġaiu ata viġaiġaiawa au Tempol bo au boru-numana bo mepa nanare au Jerusalem. ¹³ Ma ai viwavu tau awariu menanare tana aramanei da lamna riwa kaua? ¹⁴ Wate riwa kaua da tau amamata ai God a voepaepai ma BADA Iesu ana etanai, a votaġotaġoi ma tau i ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anapuna a vivitumaġanei. ¹⁵ Tau God awarina a vitumaġana guratana me ravai nanare, da tauna muriai rava anatapui iraġelei ina vilawana-melei, ravai aiaii ma rava apoapoei. ¹⁶ Lamna aubaina a kaukauana guratei da orau ina ai rava ma BADA awarii.

¹⁷ ✧ Jerusalem a netawanei madeġa biaġa i kwa ma pom ota a nememei da molamolakai ata puloi ma pulo ata kau i God awarina. § ¹⁸ Tau aiaiu, maranaina i nelaġaiu au Tempol viaina pulona a kaukauei. Ega patara maiteni ma ega visinaviravira. ¹⁹ Wate mai Jew ġelaui Eisia provinsei i nei kampa. Tau i mepa marina! Ita nei au naom da ai viwavu ita terei. ²⁰ Bo babada weka ita riweta au apoapoe aiwai maranai boru ġeġetelarana au naona a mairi. ²¹ ✧ Wate mepa da marat-agogi awarii a garara a pa, “A vitumaġana da God rava anatapui iraġelei ina vovaimairini! Lamna aubaina tau weka a maimairi.”

²² Felix tauna BADA Iesu ana Etanai riwana i aramana-kau i boru i gudui ma i riwa, “Maranai sorodia ai bada Claudius Lisias ina nei, ma

* **24:2:** Felix ana au vibadana lamna ega ita ai. Tertelus lamna Felix i gwalagwalamerui da Paul ita viwavui ma ita pani. Felix rava vita ġaeġaei i verei da madeġa ruaġa i kwa Sisaei Nero wei ravana i viopuni. Gavia ġaeġaena i tupua ma Jew Rome i viġaviei ma tau i Jerusalem i rikai da ega aiwaina ita mae. † **24:5:** Wava Nazarene lamna Iesu ana tauvotaġotaġoi e babanie aubaina tauna Nasaretei. Maranai Tertelus tau i ġorei Nazarene Lamna Kerisiana e vivijiboġi. Jew Jerusalem ei ma Judea Provins anatapuna mai Galili provins ravai e inainana ġairei, (John 1:46 ma iavi).

Tauna wate e ririwa da menanare Paul e tapataparoro nei lamna mai Rome ai tarawatu e viviaġai. ‡ **24:7:** Verse 7 lamna buka waduwaduboi biaġava au orana e mamae, wate buka Greek ponanei i girugirumi maġamaġau i wei ves-na au orana ega. ✧ **24:17:** Act 21:17-28 § **24:17:** Madeġa 5 i kwa ma Paul i nememei au Jerusalem da ita mae mara aburuna da tauvitumaġana ita vovaiwewapani ma ana babara ma nolana aiaina ita virarautuei. (Act 18:22) ✧ **24:21:** Act

23:6

ina paribelem.” ²³ Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viararamani

²⁴ Aupom biaga au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i neiai, ma rava ai tumašana Iesu Keriso awarina i babaniei ma Felix i rautanišana. *

²⁵ Wate maranai Paul babani i vikarei da God ana goana, da rava lawana aiaina ma jijimanina ina maeni, ma erawa kauai ma go'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, “Ma nae! Ma maranai ana goem lamna ana kwatuem.” ²⁶ Ma Felix i goegoei da Paul tauna manelei ita gwalai ma lamna aubaina mara i maga i raukwatuei ma awarina i babani.

²⁷ Madega ruağa au murina Felix i rautom ma ana gabu Posias Festus i vaia. Felix i goei da wavana ita ai mai Jew awarii lamna aubaina Paul au numa panipani i votere-tawanei.

25

Paul i vibağa da Sisa au naona ita mairi

¹ Festus i gëta au Caesarea da ana nola ita vikarei ma aupom vitonuina i gae au Jerusalem. ² Weka pirisi gëgetelarana ma dogadogara Festus i nebele i ma ai viwavu Paul awarina tauna i verei. ³ Ma Festus i vibağai da ita voagui da Paul ita paritawanei au Jerusalem. Tau i ava i vioga da Paul au etanai ita virağeni. ⁴ Wate Festus i paribelei i pa, “Paul au deri au Caesarea ma tau a gaiğaira me kampa aupom ruağa au murina. ⁵ Mepa da Paul aiwai i kauana-boai lamna ami Babada maiteni ana gaira da kampa ami viwavu ina terei.”

⁶ Aupom 8 da 10 nanare au murina Festus i gaira me au Caesarea ma maratamna au numaetara i kiala ma ana sorodia i eğara da Paul ita ruieiai au naona. ⁷ Maranai Paul i ruieiai, ma Jew babadai Jerusalem ei i gairai i nei awari ma ina viwavui, kaua magamağau apoapoei aubaii. Wate tau i viwavu anatapui anona eğa.

⁸ Paul wei *viwavui i vinua-nainei ma i pa, “Tau eğa aiwai apoapoena ata kauai mai Jew ai tarawatu awarina bo ai Tempol awarina bo Caesar awarina.”

⁹ Wate Festus i goei da mai Jew ita vinuaiaini lamna aubaina Paul i paridadanei i pa, “E goegoei bo eğa da tana gae au Jerusalem ma etara?”

¹⁰ Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kauai da tau eğa aiwai apoapoena ata kauai mai Jew awarii. ¹¹ Wate mepa da aiwai apoapoena a kauai lamna ma virağeniu. Tau eğa irağe ata rovoei. Wate mepa da wei lamna viwavu moru lamna eğa ai ai ana rewapana ita mamae da ina veredamaneu. Tau a vivibağa Caesar awarina!”

* **24:24:** Mepa da Drusila Jew wavinena awarinei Felix wei ravai e goegorei tauvitumašana i aramanei. Drusila lamna Herod Agrippa natuna guguinina umauna ana madeğa 20. Tauna wavalatona Siriei i ravaği wate i voterei maranai ana madeğa 16 da Felix i ravaği. Wei lamna ana tavine viruiaina ma Felix ana tavine vitonuina. * **25:8:** Paul au Tarsus i tupua wate tauna wavana Rome gabemanina awarina. Lamna aubaina tauna ana rewapana e mamae da ana nuabola ina naiei au Rome da Caesar ina rautare.

¹² Festus Caesar ana dogadogara ai nota i vaia ma i paribelana i pa, “Tam u vibağa Caesar awarina, Anina Caesar awarina ma nae.”

Festus Paul ana babani gulau Agrippa i parivere

¹³ Aupom biğa au murina gulau Agrippa[†] novuna Benisi maiteni i nei au Caesarea da gavena vouna Festus i raugenari da ita viegualaei. ¹⁴ Ma i mae aupom vomağauna ma Festus Paul i rarauetara gulau i parivere i pa, “Felix panipani tagogi weka i voterei. ¹⁵ Ma maranai a nae au Jerusalem mai Jew ai pirisi babadai ma dogadogara ai viwavu i neiai awariu ma i vibağaiu da Paul ata virağeni.

¹⁶ —Ma a riwei da tauai mai Rome ai tarawatu e ririwa da eğa rava ana kovoğa labalababai da au naona ana rauetarei. Tau i na ġetai da ai viwavu taurauetara au naona ina mairi da ina gagaloana-melei. ¹⁷ Maranai tauviwavu maiteni weka a ġetai. Tau eğa ata vipaipai ma maratonna a egara da ravana i neiai da ita etara. ¹⁸ Tauviwavu i vomairi ma a notai da aiwai apoapoena aubaina ita viwavui wate eğa. ¹⁹ Anina kaua biğa ava ai taparoro kauai, ma rava tagogi irairaga wavana Iesu i vitarapiriei. Wate Paul e ririwa da Iesu lawalawaina. ²⁰ Tau nuanuau i rağarağa menanare riwa kaua ana vainei ma Paul a paridadanei da i vianina da maiteni ata ġae au Jerusalem da kampa ata etarei. ²¹ Wate Paul i vibağa da Caesar ana viwavu ina rautaniğanei. Ma sorodia a egari da au numa panipani ina paini da ana paritawanei Caesar awarina.”

²² Ma Agrippa Festus i riwei, “A ġoei da ravana ana babani ana rautaniğanei.”

Ma Festus i paribelei, “Anina, au maratoma rautaniğanei.”

Gulau Agrippa Paul i rautaniğanei

²³ Au maratonna gulau Agrippa ma Benisi gulau garai i oteni ma ana gabemani babadai ġaeğae maiteni, i arana-ruiei au boru numana. Festus ana sorodia i egari da Paul i ruieiai. ²⁴ Festus i riwa, “Gulau Agrippa ma anatapumi o rieiai weka, wei ravana o inainanai! Tauna mai Jew au Jerusalem ma weka au Caesarea e ġoeğoei da ina irağe. ²⁵ Wate tau a nelağai da tauna eğa aiwai ita kauana-boai da ina irağe. Wate i vibağa da Caesar tauna ina rauetarei. Lamna aubaina a pariparitawanei Caesar awarina. ²⁶ Wate Caesar aiwai ana riwei, eğa ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi. ²⁷ Aubaina eğa ita ai da panipani ana paritawanei Caesar awarina ma ana viwavuna eğa!”

26

Paul ana gudu i tarai

¹ Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei ² i pa:

I ai kaua gulau Agrippa da amadodo tam au etara e rarautaniğanei da Jew babadai ai viwavu awariu ana tere-vaijijimani. ³ Tau aramanei da tam mai Jew ai giu ma ai paripariğai u aramanana-kauei. Lamna aubaina a vivibağaim da au paribelana ma rautaniğanana-kauei.

[†] 25:13: Wei lamna Herod Agrippa 11, Herod Agrippa 1 natuna.

⁴ Mai Jew anatapui au lawana i aramanei, aburu da marina, au dobu oina da au Jerusalem. ⁵ ✧Taurorova ava i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anatapuna a vojijina-kauei. ⁶ Ma marina a vivitumaḡana da God aiwai noinoita i parivainuaḡani ina kauei. Ma lamna aubaina tau weka a maimairi. ⁷ Wei parivai-nuaḡanana ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e viviborumei. Au gulau wei vitumaḡanana aubaina mai Jew e viviwavuii. ⁸ Aiwai aubaina o notanotai da God eḡa tagotagogina da rava iraḡelei ina vovaimairini?

⁹ ✧Tau au naona a notai da aiwai anatapuna ata kauei da Iesu Nasaretei ata viḡaviei. ¹⁰ Ma anina lamna a kauei au Jerusalem. Pirisi ḡeḡetelerana babadai pepa i verei ma lamna i vovai-virewapaniu ma kerisiana vivivirei maḡamaḡau au numa panipani a terei, ma nanare ai iraḡe a vianinei. ¹¹ Mara maḡamaḡau boru numai a naeni da kerisiana a vununaiei da ai tumaḡana ita boviei. Amlou i ḡaiḡai kaua da dobu ḡelaui a naeni kerisiana a baibaiei.

¹² Mara tagogi pirisi babadai au Jerusalem pepa i vereu da rewapana i vereu ma a nae au Damaskas. ¹³ Ma aubenai nanare, tau au etanai a nenaie ma a inanai, lalalaina marei i ḡairai ma i lalaiai, gamrina madeḡa i ḡetawanei! Au rava maiteni a bababara i lalaiai. ¹⁴ Anatapuiai a vipeuana au doa ma pona Hebrewi awariu i bababani. I riwa, "Saul, Saul aiwai aubaina e viḡavieu? Tam e ḡoeḡoei da Tau ma viapoapoeniu wate eḡa da tam e viapoapoena-melem!"

¹⁵ Ma a paridadana, "Bada tam aiai?"

Ma BADA i paribelei, "Tau Iesu, ravana tauna e viḡaviei. ¹⁶ Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inanai ma aiwai ana viatataiem, ma vimatamatei rava awarii. ¹⁷ Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii, ¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai ḡo'apoapoe ina nota-tawanei, ma ina taravaini natunatuna rarautanii, ai tumaḡana awariu aubaina."

¹⁹ Lamna aubaina Gulau Agrippa, tau riwa marei au inana a inanai a voteletelei. ²⁰ ✧Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai ḡo'apoapoe ina votere-tawanei ma ina mae-tavirei God awarina, ma ai lawana ina vimataira da ai kaua apoapoe i voterei-tawanei.

²¹ Wei babanii aubaina mai Jew au Tempol i vojijiniu ma i ḡoei da ita virageniu. ²² Wate God i vilawaniu da marina, ma weka a maimairi da a vimatamata rava muomuoi ma nanare rava ḡaeḡae awarii. Aiwai a bababaniei lamna peroveta nununai ma Moses i ririweta ina tupua. ²³ ✧Tauri i riwa da tauvilawana Keriso ina vinuapoapoe. Ma tauna ina iraḡe ma ina vinoa da ina vomairi me ma wei matairana ina vinolanola da tauna God lalalaina mai Jew ma Jentail aubaii.

²⁴ Weka Festus i vionaği ma i garara Paul awarina, “Tam u bua! Am aramana i vibuaim!”

²⁵ Wate Paul i paribelei, “Au bada Festus tau eğa ata bua. Tau aiwai a bababaniei lamna riwa kaua ma babani anona. ²⁶ Wei kaua eğa go-vagovağana ma aramanei da Gulau Agrippa anatapuna i aramanei, ma lamna aubaina ana tepatorau wei kauai ana babaniei awarina.” ²⁷ Paul Gulau Agrippa i riwei i pa, “Peroveta e vivitumağanei bo eğa? A aramanei da nanare!”

²⁸ Ma Agrippa i paribelei, “U notai da tau lağilağina ma sinaviraiu da ana vikerişiana!”

²⁹ Paul i paribelei, “Lağilağina bo amapo, a raraupari God awarina da tam ma rava anatapui wei au boruna ina tupua-vira me tau nanare wate eğa sein maiteni.”

³⁰ Anina ma gulau ma gavena ma Benisi i vomairi ma i nae. ³¹ Ma anatapui i nena ma i babani vivira ma i vianina i pa, “Wei ravana eğa aiwai apoapoea ita kauai da tana virağeni bo tana pani.”

³² Ma Agrippa Festus i riwei, “Mepa da eğa ita vibağa gae Caesar awarina, lamna marina tata rupeni.”

27

Paul wagei i vağai nae au Rome

¹ Festus mara i tereterei i ġetai da tauai ata nae au Rome. Paul ma tau ma panipani ġelau maiteni au waga a geru ma a vağai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena. ² Waga Adaramitei i nei da a geru ma wagana i ġota-nae au Eisia provins gerana. Orotu wavana Aristakas ana dobu Thesalonika au Masedonia provins tauna maiteni i geru.

³ Au maratamna au Sidon taon a ġota, Julius ivina i ai Paul awarina ma i voterei da i opu au gera da ana rava ita raugenari ma ana ġoana aiwai ita vibağei. ⁴ Muriai wagei a opu da a nena ma ive i verau-matamataniai ma lamna aubaina bonabona au Saipras ma dobu ġaeğæaena au pouna au mulağina ambori. ⁵ Ma boga ġaeğæaena a bori da Silisia provins da Pamphilia provins gerai a voterei da au Maira taon a rui au Lisia provins ⁶ Au Maira taon kampa sorodia badana mai Egypt ai waga Alexandriei i nena au Italy kampa i vigeruiai. ⁷ Ma aupom mağamağau nuatauai a ruba ma a voia guratana da Cinidus taon a tuğereğerei wate ive i verau-matamataniai da kampa waga a virai da Crete bonabonana ma mutu Samone au poui au mulağina a nae. ⁸ Ma kampa nuatauai bonabona Crete gerana a naeni aubaina mara i apoapoe ma a ġeta dobu e ġoreğerei U Aiaina, Lasea taon au ġereğerena.

⁹ Mara ġaeğæaena a vine-boai au vağai* ma Rupena Ujina marana boi-boği i kwa,† marina lamna ive ma rabama ai mara ma boga babarana i vinirovorovo. ¹⁰ Ma Paul i riwa, “Nelara, malana a vaivaia da ata vağai ina apoapoe kaua ma waga ma purapura tana vine-boa-pai. Ata lawana maiteni tana vineboai.” ¹¹ Wate sorodia ai bada, kapena ana babani i rautaniğanei ma eğa Paul da kampa ata mae ma eğa ata nae. ¹² Wei gabuna

* **27:9:** Iri i parei da kojikojira ana mara ma i vağai. † **27:9:** Eng. Atonement bo *Yom Kippur* marana wei lamna September bo October rabama ma ive ai mara

eġa ita ai wei ivena au marana ma rava maġamaġau i goei da wagane i ata nae da Phinix una, Crete au bonabonana da kampa ata mae da bodu ita kwa. Wei u ġaeġaena ma mutu i lavarata ma rauanaġa e vinao-vereverei, da au mulaġina e mamae.

Kojikojira Ġaeġaena

¹³ Maranai rauanaġa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae. ¹⁴ Ma eġa barana ita uama ma kojikojira[†] olei iveiai. ¹⁵ Ive wagana i verau-matamatani ma waga eġa tagotagogina da ita vobelei ma i voterei da ive waga i avara-opunei. ¹⁶ Bonabona aburuna Kauda gerana au mulaġina a ruba ma kampa a voia guratana da dingy a terepai au waga da a ragita-jijini. ¹⁷ Wei i kauana vorovei ma ġuravei waga au gabaurina da waga adana i raġita-kwaviviroi. Tai i rovo mepa da au maratete ina amġaena au Syrtis,[§] Libya au gerana. Lamna aubaina ġuravei ai da kuka, i raġita-tagogiei ma au boga i viorereni da waga ita bibi. Ma i voterei da kojikojira waga i avara-naiei. ¹⁸ Maratomna kojikojirana i rarau-guratanelei da purapura ġelau i boga a viorereni. ¹⁹ Aupom vitonuina tai waga purapurai i viorereni au boga. ²⁰ Kojikojira i ruba da aupom biaġa da madeġa ma ubona i purui. Ravai ai nota i kwa.

²¹ Wei au marana rava au waga am i kauana-avei, anina ma Paul i vomairi ma tai i riwei, “Nelara ota rautaniġaneu ma Crete eġa tata oputawanei, amapo waga eġa tata viapoapoeni ma ata purapura eġa tata vineboai. ²² Wate a ririwana-guratemi da eġa orami ina peu! Aubaina avena da waga ina monu wate eġa ina iraġe. ²³ God lamna tau au BADA ma ana taunola tau. Waguvarai God ana anela i paritawaneiai awariu. ²⁴ Ma i riwa, ‘Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vaġavaġai ina lawana.’ ²⁵ Lamna aubaina tepami ina tora! Aubaina tau God a vivitumaġanei ma menanare i ririweia nanarena ina tupua. ²⁶ Wate tauta au maratete tana amġaena.”

²⁷ Kojikojira i avara-naielai au Mediterranean Bogana da aupom 14 i kwa ma nubautuva waga ravai malana i vaia da tai gera i tuġereġerei. ²⁸ Ma barawa au giana ġaima i raġini ma au boga i tawanana-ġairei da topa ana gabinou ita aramane i. Ma i aramane da 40 meter ma i mae aburuna ma i raudadana-me i lamna marina 30 meter. ²⁹ Ma tai i rovo mepa da rabama waga au kira ina viairikarikai lamna aubaina waga au ipuna anika 4 i tawana ġairei ma i vipaipai da mara ina tom tawanana. ³⁰ Ma waga ravai ai kaua i kaukaei da ita ruba-govaġa. Ma i vioga da dingiei ita opu waga au naona da anika ita dubara-naiei, ma lamna aubaina dingy i teretere-ġairei au boga, ³¹ Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraġe.” ³² Ma sorodia dingy ġuravana i borituini ma dingy kwakwavina i peu au boga ma i avara-naiei.

³³ Ma maratomtomi Paul rava anatapui i egari da ita am, i pa, “Taumi marina aupom 14 rovo i kauemi ma eġa ota am.” ³⁴ “Tau a vivibaġa-guratemi da ona am da ona virewapana, eġa aiai tagogi ina iraġe.” ³⁵ Paul i babani vorovei ma au matai palawa i vaia, BADA i viegualaei ma i vogimai ma i ani.

[†] 27:14: Kariwabu ġaeġaena [§] 27:17: Wei lamna maratete.

³⁶ Ma rava anatapui inanai ma orai i bagibagi ma am i vikarei. ³⁷ Tauai anatapuiai 276 au waga. ³⁸ Ma rava anatapui i am da i am-iaua. Ma witi baikei au boga i viorereni da waga ita votelatelai da au gera ita ġota da avena ita amġaina.

Waga au maratete i amġaena

³⁹ Maranai mara i tom tawanana tau i dobu i 'nanai wate gerana eġa ita aramanei, wate U inanai da gerana aiaina ma i notai da gerana aiaina da waga kampa ita viġaeni. ⁴⁰ Anina ma anika ġuravai i viaituituini, ma labilabi i tere-ġairei, ma waga au naona kuka voaburunei i votawatawanei ma gera aubaina i ruba. ⁴¹ Wate waga au maratete i amġaena da i tapaiei, ma rabama waga ipuna i viairikarikai.

⁴² Sorodia i ġoei da panipani ita viraġeni, da avena ita toa-ġaira au gera ma ita viruberubei. ⁴³ Wate sorodia ai bada i ġoei da Paul ita vilawani ma i viġaei, anina ma ai vogatara eġa ita kauai. Ma tau i aiavoi toa i aramanei i egari da i viauepa au boga ma i toa-ġaira au gera. ⁴⁴ Ma ġelau aiwai da i tenatenam i vidauei. Ma nanare anatapui lawalawaii au gera i ġota.

28

Paul au Malta bonabonana

¹ Maranai a ġota au gera ma a aramanei da tauai au Malta bonabonana. ² Dobuna ravai i nebelelai ma ivii i ai kaua awariai. Garewa atuna i vikarei ma i ubauba, ma tauai au gera ai i viviri. ³ Ma Paul ai ragorago i ġuna da ai au tepana i tereterei ma mota ġaiġaiawana ai bolana malana i vaia da i opui ma Paul nimana i ani. ⁴ Dobuna ravai i 'nanai da motana Paul au nimana i dawedawe ma i pari-ararava, "Wei ravana lamna tauviraġena ma eġa ita monu wate ata god* e ririwa da tauna eġa ina lawana." ⁵ Wate Paul motana i viaikwajiei da ai au menamenana i rauei ma tauna eġa ita kero. ⁶ Rava i vipaipai da Paul nimana ita dodo bo ita peu da ita iraġe. Wate maranai i vipaipai guratana ma i 'nanai da tauna anina, tau i ai nota i virai ma i riwa da tauna god ġelauna.

⁷ Au gerana a ġotaġota - lana au ġereġerena lamna dobuna badana Publius ana wapu ġaeġaena. Tauna i taravainiai ma i paina-kauelai da aupom tonuġa ⁸ Publius amana i doria manawa ruba ma inigugura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani. ⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonuġa. Ma ravai i voagu-kauelai ma maranai ata vomairi, ai ġoana vaġai aubaina anatapuna i verelai. Ma waga ġelauna a gerui lamna mai Alexandria ai waga bodu aubaina kampa i mae. Waga au naona lamna ai god ruaġa kokoitau i tai†. ¹² Kampa ma a amkuka-nae da au Sairakius a ġota ma a mae aupom tonuġa ¹³ Kampa da ambori damana au Regium ma maratamna rau-naġa i wanabauni ma amkuka ma geraei a ruba da maratam ġela au Puteoli a ġota. ¹⁴ Kerisiana kampa a nelaġai ma i riwelai da maiteni a mae wiki tagogi. Anina ma a babara-nae da au Rome taon a ġeta. ¹⁵ Kerisiana

* 28:4: God wavinena wavana kaua aiaina bo kaua jijimanina (Justice). † 28:10-11: Wei lamna mai Rome ai god raġaraġa wawai Castor ma Pollux ruaġai e ġoreġore Dioscuri bo raġaraġa marei, Tau i lamna god Zeus ma Leda natunatui.

au Rome riwai i vaia da a nenei ma i gei da ita nebelelai, gelau i gei au taon e goregorei Vağavağai Tonuğa ai Numa ma gelau i gae Apius ana au maket. Maranai Paul wei ravai i 'nana, ma i vinuai kaua ma God i viegualaei. ¹⁶ Maranai au Rome taon a geta tau Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

¹⁷ Ma aupom tonuğa au murina Jew babadai kampa maemaei i raugoreiai ma awarii i babani, "Varevareiu tau eğa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i paniu ma i veredamaneu Rome gavena awarina. ¹⁸ Mai Rome i etareiu ma i goei da ita rupeniu aubaina eğa aiwai apoapoena ata kauai da ina virağeniu. ¹⁹ *Wate Jew babadai wei eğa ita goei ma lamna aubaina Rome babadai a riwei da tau eğa ana mae wate ana gae au gaeğae Caesar awarina da ita rauetareiu. Wate lamna eğa au rava ata viviğaviei, eğa. ²⁰ Lamna aubaina a goremi weka da tata babani gogona, ma ata riwemi da tau a viparipani aubaina a vitumağana da mai Israel ai tauvilawana wariaga i ririwei boiboği i nei."

²¹ Tau i paribelei, "Tauai eğa pepa Judeaei ata vaia bo ai rava riwa ita neiai. ²² Tauai aramane i da ravai anatapui kerisiana boruna e paripari-virevirei. Wate tauai a goei da am nota ana vaia."

²³ Ma tau mara i terei da Paul maiteni ita viboru, ma patara i getai mepa Paul i mamaelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununai ai au buka i mairi ma i jima. I goei da orai ita taini da Iesu ita vitumağanei. ²⁴ Ana babaniei gelau orai i taini ma gelau eğa ita vitumağana. ²⁵ Ma tau avababani i vipariparinigaiei ma muriai da ita vilamonei Paul wei riwana tagogi i latoni i pa, "Arua Vivivireina riwa kaua Peroveta Isaiah ponanei amamami i riwei i pa:

²⁶ *Ma nae am rava mai Israel awari da ma riwei,
ona nononora wate eğa ona araramanei*

ona inana wate eğa anona ona aramanei.

²⁷ *Aubaina wei ravai orai i bado.*

Taniğai i gudui,

Tau matai i vopotai.

Mepa da tau mataiei ita inainana,

taniğaei ita nononora

oraiei ita araramanei,

ma ita mae-tavirei awariu ma ata vilawani.

(Isaiah 6:9-10)

²⁸⁻²⁹ — Lamna aubaina ona aramane i da God Riwana Aiaina vai-melana aubaina i paritawane Jentail awarii. Tau ina rautaniğana."

³⁰ Paul kampa numa i vivimaiei ma i mae madeğa ruağa taputapuna. Ma rava mağamağau i nenei da i raraugenari ma wei i vinuaiiei. ³¹ Ana tepatorana God ana vigulau ma Iesu Keriso riwana Aiaina i jimei. Ma eğa aiai ita viğaei.

Psalm Wela ma Pari

Pariverena

Mara manamanaina i netawanana rava maḡamaḡau taputapunei ava wela ma pari i girumi wei au bukana. Mai Israel wei wela ma pari i tami ma i teretagogiei da lamnei God i viviborumei.

Wei au bukana wela ma pari tapuna ma tapuna. Ġelaui God e viviborumei ma e vovoeapaepai ma ana iviaiai aubaina e viviegualauei. Ġelaui e vivibaḡa agu ma gagalo aubaina, bo notatawanana aubaina. Wela au ġelaui, rava e raraupari ai gulau aubaina ma god e vivibaḡai da ai ḡavia ita kovoḡi. Ma wela au ġelaui tauamgiruma ana apoapoe ma ana nuabola aubaii God awarina i beubeura.

Ma maraḡela Iesu riwa wei au parii i vaia da i viaramana. Kerisiana wei wela ma parii i welewelei ai au viboruma ma i jimajima.

Wela vinevinei

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

Buka Tagogi

1

Nuaiiai ririwa-kauana

¹ Rava viaiainana, lamna eḡa ḡo'apoapoe ravai ita votaḡotaḡoi,
ma ponai eḡa ita rarautaniḡanei;
ma vivijiboḡai eḡa awarii ita kiakiala.

² Wate BADA ana tarawatu i vinuaiaiei,
aupom ma marai e notanota-vaitetei.

³ *Tauna me ai, waira au adana gogogona,
ana au mara e rarauano;
ma rugurugui eḡa ita poipoi.

Wei ravanana, aiwai anatapuna e kaukauana-kauei.

⁴ Wate ḡo'apoapoe ravai eḡa nanare!

Tau me rugurugu, ive i kapupuana-naiei;

⁵ Lamna aubaina ḡo'apoapoe taukauei BADA ana au etera ita mairi ava,
ma nanare ḡoa apoapoei ta kauei rava jijimani ai au dam ita mae ava.

⁶ BADA ḡoa aiiai ravai e rarauetaraveni ma e paipaini;
wate ḡo'apoapoe ai etanai au damona, pupui.

23

*Bada taupainiu**

David ana wela

¹ BADA taupainiu

ma eḡa aiwai ana voladaḡei.

² Gidagida majimajigai au tepana i vimataveniu,
ma i raveniu waira au raraunairina au adana.

³ Au rewapana e raviravivouni
ma wavana aiaina aubaina etanai jijimaninei i raveniu.

⁴ Avena da gwagwa waguwaguvareina ana naeni,

* 1:3: Jer 17:8 * 23:: Taupainiu me sipu taupainina.

wate eġa aiwai apoapoena ana rovoei.

Aubaina tam au ririvau da am kwapuei ma jġgonei e gagagaloew ma
e vivinuaubaiu.

⁵ Aubaiu torela e vokaukauei au ġavia au naoi.

Oilei kolau u volaġolaġoi da tam u vinuavaineu,
ma au kelaka i oa-karagelai.

⁶ Ee! Riwa kaua da am iviaiai ma am raunuapoapoe maemae nonoana
awariu ina mae, da au mara au damona.

Ma BADA ana au numa ana mae-nonoa.

27

Voepaepa parina

David ana wela

¹ BADA au lalalaina ma au tauvilawana,

aiwai ana rovoei!

BADA au taugagagalo

aiwai ana rovoei!

² Maranai ġo'apoapoei ravaii i ġetai

da ita vunuiu,

au ġavia

aei ina pakana-melei da ina peu.

³ Avena da sorodia borui ina mae-gariġuruvui,

tau eġa ana rovo dadana.

Maranai au ġavia i vomairi,

tau anina da God ana vivitumaġanei.

⁴ Kaua tagogi ava aubaina a vivibaġa.

Au ġoana ġaeġaena da,

BADA ana au numa, boruborumana ana mae,

ma ana voepaepai. Au lawana au anatapuna.

⁵ Nuabola au marana

ina tereġaġariu.

Ana gabu au vivivireina, ina teregovaġiu.

Ma ola au tepana ina tereu

da ġavia eġa ina vodadaniu.

⁶ Ma au ġavia i garigari kwaipipiniu, ana tuvaidoedoei.

Da au tempol ana morelanau pulo ana apui BADA awarina.

Ana vinuaii ma welei ma arei ma ana voepaepai.

⁷ BADA ma rautaniġaneu maranai awarim a kwatukwatu,

ma raunu'apoapoleu ma ma paribeleu.

⁸ Au orau u riwa, u pa, "Ma nei da ma rauduneleu."

Tau a paribelem a pa, "BADA a nenei."

⁹ Eġa ma raugovaġeu,

eġa awariu ma ġaiawa.

Am taunola eġa ma inana geduaiei,

au anatapuna tam, au tauagu.

Eġa ma netawaneu,

au God, tam au tauvilawana.

¹⁰ Avena da amau ma alou ita teretawaneu,

wate BADA ina paina-kaueu.

¹¹ BADA, ma viaramaniu da am ġoana ana kauei.

Ma etanai au ġadaġadarana ma taravainiu aubaina au ġavia i maġa

¹² Tau moruei ma parivairovorovoei e vunuvunuii.

Lamna aubaina, eġa ma teretawaneu awarii

¹³ A 'ramanei da BADA ana viaiaina ana inanai,
weka lawalawai ai au dobu.

¹⁴ BADA ma vitumaġanei,
da ma virewapana ma tepam ina tora.
Anina BADA ma vitumaġanei!

34

BADA ma viborumei

¹ BADA ana vimaēgaēgaeni marana patapatai,
ma ana viborumana-nonoei.

² Orau taputapune BADA ana voepaepai;
Vilamolamonai riwau ina nonori ma ina vinuai.

³ Ona nei ata BADA tana vimaēgaēgaeni
wavana tana voepae-gogonei.

⁴ A raupari BADA awarina ma i paribeleu,
awariu rovo anatapui i vaitawanei.

⁵ Aiavo awarina e inainana,
taui naoi ina ravilalai
ma eġa melanai ina vitepa-ubaubai.

⁶ Au nota i kwa da a ġorei, ma i nonori
ma nuabola au orau i vaitawanei.

⁷ Ai ai da BADA e vivivirana-kauei,
ana anela taui e inana-vaitetei, ma e vivilawani.

⁸ Taumi ona raudadani ma ona aramanei da BADA i aii.
Taui BADA au ġouna maemae nuaiai ġaēgaena awari.

⁹ Taumi vivitumaġanami eġa aiwai ona voladaġei.
Lamna aubaina, BADA ona vivirei.

¹⁰ Lion ġauboi mara ġela am e irairaġe,
wate aiavo da BADA awarina e vitumaġana eġa ina voladaġa.

¹¹ Natunatu, ona nei, ona rautaniġana,
ma ana viararamanimi da BADA ona vivirei.

¹² Taumi o ġoei da ami lawana ina aii
ma ina manawa bo?

¹³ Nanare, lamna menami ona paina-melei da eġa babani apoapoe bo
moru ona babaniei.

¹⁴ Ġoa apoapoe ona geduaiei ma kaua aiaii ona kaukauei,
ma ona voguratei da nuauba lawanana ona maeni.

¹⁵ BADA, matana ġoa aiaii ravai awari e tereterei,
ma taniġana e tonetonei mepa da agu e toutouei.

¹⁶ Wate tauna ġo'apoapoei ravai e mamae-puputei
taui ina iraġe ma rava nuanuai ina vuru.

¹⁷ Rava jijimanii agu aubaina e viviġore BADA awarina
tauna e rarautaniġana ma ai vita e vaivaitawanei.

¹⁸ Tauna rava peupeui, rovorovoi, ma vinuabolai e vivilawani,
tauna rava orana i peu kaua e vovoepai.

¹⁹ Rava jijimanii ai nuabola i maġa
wate BADA taui e vovoagui ai au nuabola.

²⁰ E inainana-vaitetei da eġa gelamina tagogi ina wanagai.

- 21 Ġoa apoapoe ravai ai apoapoe ina vunumelei,
ma aiavoi da ġoa aiiai ravai e gedugeduaiei, ina kovoġi.
22 BADA ana taunola e gagagaloiei,
aiiai da e nenei BADA au ġouna, kovoġa ina vorei.

51

David ana rupena

Mara tagogi, Gulau David ana taunola Uriah awana
Bathsheba i tavimatanei da maiteni i matave.

1 Oo God, ma raunu'apoapoeleu. Tam nuavaina maemae-nonoana amai.
Tam raraunuapoapoei amai

au ġo'apoapoe ma notatawanei.

2 Au rauaġaiġai ma oġai
ma au ġo'apoapoe ma oġa-tawanei.

3 Au rauaġaiġai a aramanei
marana patapatai a notanotai.

4 Kaua apoapoei a kauiei.
Tam ainelam awarim Ġoa apoapoei a kauiei,
ma am viwavu lamna riwa kaua.
Amapo anina da ma kovoġiu.

5 Tau rauaġaiġai, melamelauei da marina
Au manawa da marina tau ġo'apoapoe taukaueina.

6 Wate tam u ġoei da riwa kaua au ora-dewadewau ina mae.
E viviararamaniu da nuaulaula orau ina oai.

7 Au ġo'apoapoei ma oġa-tawanei,
ma oġaiu da ana arapoirana da gonu rovena arapoirana ana ġetawanei.

8 Ma riweu da au ġo'apoapoe u nota-tawanei
da ana vinuaiiai ma ana morelana
avena *da gelamiu u viaigaigai, marina ana vinuaiiai.

9 Au ġo'apoapoe ma inana-tawanei
ma au apoapoe mirai ma boai.

10 Oo God nuanua ma ravivouni
da ana vipatutu kaua awarim.

11 Eġa au naom ma tawana-opuneu
ma awariu eġa Aruam Vivivireina ma vaitawanei.

12 Vilawana nuaiaina ma ravivouni me au naona nanare
aruau ma viaiaini da ana voteletelem.

13 Lamnei, ġo'apoapoei taukauei am kaua ana viararamani,
da ina mae-tavirei awarim.

14 Oo God, vi'raġena vitana awariu ma vaitawanei,
da am kaua jijimanii ana welei.

15 Oo Bada ipiriu ma votawanei da gamou ina vimaēgaēgaenim.

16 Au pulo, ġamoġamo ata apui awarim,
wate tam pulo apuapunana eġa uta vinuaiiaiei.

17 Bada, pulo e ġoeġoei lamna vilamolamona.
BADA, eġa au vilamolamona ma au rupena ma geduaiei!

18 Am nuavaina Jerusalem ma viaiaini,
ma ana gari ma voa-melei.

* 51:8: Au vinuabola lamna me gelamiu wanagaina

- 19 Anina ma ai pulo nota aiainei ina vikarena-melei da ina kaukauei ma
 ma vinuaiaiei.
 Tauī pulo tapuna ma tapuna ina apui awarim.
 Bull maḡamaḡau am au aniamapu ina apuapui.

67

Vieḡualau welana

- 1 Oo God ma raunu'apoapoelelai ma ma viaiainiai,
 ma naom weka ma tereiai da ma voaguiai!
 2 Da au dobu am kua ina aramanei,
 da rava anatapui au dobu ina aramanei da tam ai tauvilawana.
 3 Rava ina voepaepaim Oo God,
 rava anatapui ina vimaēḡaeḡaenim.
 4 Rava anatapui au dobu ina vinuaiai ma ana morelanai ina wela,
 aubaina tam rava anatapui au dobu, kua jijimaninei e vivibadei
 ma e paipaini.
 5 Rava ina voepaepaim Oo God.
 Rava anatapui ina voepaepaim.
 6 Anina ma doa maura ḡaeḡaena ina vereta
 ma God ina viaiaina-kaueta
 7 Riwa kua, God ina viaiainita
 ma rava anatapui au dobu tauna ina vivirei.

90

God ana taunola Moses ana pari

- 1 Bada ai animae
 kimta wariḡa da marina.
 2 Tam God maemae nonoana
 muriai da ola
 ma dobu uta kauēi.
 3 Tam rava e ririwei da e vipokau, ma e ririwei,
 “Rava ona wanaviraimi”
 4 Tam awarim madeḡa 1,000 lamna me aupom tagogi, i tupo kua
 me raviravi, eḡa ita manawa dadana.
 5 Rava ai lawana e vaivaitawanana laḡilaḡinei me rauboni damona.
 Tauī me modu, ubaubanai e raraupairei,
 6 da e rarata ma e talatalai,
 wate aubigai e ḡiviḡivi.
 7 Nanare am meji tauai e lagulaguriai ma
 maranai e ḡaiḡaiawa tauai a rovorovo kua.
 8 Ai ḡo'apoapoe anatapui au naom u lavaei,
 ai ḡo'apoapoe govagovaḡana, wate anatapuna e inainanai.
 9 Am meji ai lawana i vitupoi,
 ma ai madeḡa laḡilaḡina e kwakwa, a lavutu-tawanana.
 10 Madeḡa 70 i vereta da tana mae,
 mepa da tana virewapana lamna 80;
 Wate wei lamna nuabola ava ina vereta,
 eḡa tana mae-pora ma tana nae.
 11 Eḡa aiai am ḡaiawa malana ita vai-kauēi.
 Mepa da am ḡaiawa ata aramana-kauēi, lamna tauai ata vivirana-kauem.

- 12 Ma nanare, ma viararamaniai da ai lawana i tupo kaua,
ma lamna aubaina awarim nuaulaula ana vaia.
- 13 Oo BADA! Ma nememei awariai.
Ma mae-tavirem, ma vinuabolelai, tauai am taunola.
- 14 Ubaubanoi marana patapatai am nuavaina maemaena ma verelai,
da ana morelanai ana logoiai ma ai au mara anatapuna ana vinuaiai.
- 15 Madeğa biağa u kovoğiai, nuaiai ma verelai
da madeğana biağa a vinuapoapoe ina kovoği.
- 16 Tauai am taunola, am nola vivirewapanana ma viatataielai.
Ma natunatuiai am boruma ma viatataiei.
- 17 Ma Bada ata God ana vianina ina viatataieta
ma ina kauai da aiwai anatapuna ta kaukauei anona ina tupua.
Nanare ai nola ma viuai.

91

God ata rawena

- 1 Aiai ravana e nena Aidamo Telarana awarina agu aubaina,
lamna Vivirewapanana Kaukauana au ririvana ina mae.
- 2 BADA au God awarina ana riwa ana pa, “Tam au anigagalo ma au
tauviğavia.
Tam au God, a vivitumağanem.”
- 3 Aubaina tauna, ġavia ana waro govagovağai
ma numa rarauabubu awarinei ina gagaloemi.
- 4 Tauna papenenei ina tereğovağimi ma papena au gabaurina
ina gagaloemi;
ana vipatutu, am rawena ma am anigagalo.
- 5 Waguvara kauai vi’ni-rovorovoi eğa ona rovoei,
bo ġavia madeğai e viviğavia,
- 6 bo numa rarauabubu waguvara e viviğavia,
bo doria madeğai e vivirağena.
- 7 Avena da rava tausan au ririvam i peu,
bo ten tausan au oiem i peu;
wate tam ita voadana-avem.
- 8 Matamiei ona inana ma ona inanai
ġo’apoapoe ravai ai kovoğa.
- 9 Aubaina BADA o vaia ami rawena; Ġetelarana ami taugagalo.
10 Eğa aiwai apoapoena awarimi ina tupua bo au numa ina ġeta.
- 11 God ana anela ina terei da ina painimi
ma ina gagaloemi ami au babara.
- 12 Taui uraiei ina voepaim
da aem eğa ġaima au tepana ma rauei.
- 13 Taumi lion ma mota ona vovaiubai,
lion ġaiğaiawai ma mota viviwaiawai ona tugwadagwadai.
- 14 God i riwa i pa, “Aiai nuanuau e vaivainonoei, ana vilawani;
ma ana gagaloai, aubaina i aramana-kauai.
- 15 Maranai i kwatu awariu, ana paribelei.
Tau kampa ai au nuabola,
ana taravaini ma ana voepaepai.
- 16 Ai lawana ana vimanaini,
ma au vilawana mamae-nonoana ana viatataiei.”

95

BADA tana welei

- ¹ Ona nei! Tana wela BADA awarina.
 Ana nuaiaita tana wela God ata tauvilawana vivirewapana awarina.
- ² Tana nei au naona ma tana viegualaei
 ma welei tana voepaepai.
- ³ Aubaina BADA lamna God virewapana kaukauna,
 ma god anatapui e inainana-ġairei.
- ⁴ Dobu anatapuna au urana,
 guba ġaeġaei doa au orana da ola ġaeġaei au tepai.
- ⁵ Boga tauna ġarinei, tauna i kauiei
 ma nanare tauna uranei dobu alalana i tere-kauiei.
- ⁶ Ona nei ma tana raudune ma tana vimaēġaeġaeni,
 ae tututa tana tapeġaroiei taukaueta BADA awarina.
- ⁷ Aubaina tauna ata God.
 Tauta natunatuna. Ana sipu ma e ġamoġamoita ana au wapu.

Mepa da ponana o nonori amadodo,

- ⁸ ✠E riwei i pa “Eġa orami ona gudui me amamami au Meribah;
 me au mutulua au Massah.
- ⁹ Kampa amamami i ‘nanai, kauababai a kauiei
 wate eġa ita vitumaġaneu, ma i raudadanu.
- ¹⁰ Madeġa 40 wei kimtana awari amlou i ġaiġai ma a riwa,
 ‘Wei ravai orai i bagibagi ġaġa!
 Eġa ita rarautaniġaneu.’
- ¹¹ Ana mejiu a parivainuaġani,
 ‘Gabu a vokaukauei ami lauvitau aubaina wate kampa eġa melanai
 ona rui.”

100

Voepaepa welana

- ¹ Rava anatapumi au dobu ona logoimi BADA awarina!
- ² Ana nuaiaimi BADA ona voepaepaei,
 ona nei au naona ma ona welei.
- ³ Ona aramane i da BADA anina God.
 Tauna i kaueta.
 Ma tauta tauna ġarinei. Tauta tauna natunatuna. God ana sipu ma
 e gagaloeta me sipu taupainina.
- ⁴ Ana welami ana au gari ona rui ma voepaepami
 ana au aniviboru ona rui,
 ma ona vimaēġaeġaeni.
- ⁵ Aubaina BADA i aii;
 natunatuna e vivinuavaina-nonoei,
 ana vipatutu e mamae-nonoei, kimta au anatapui.

103

BADA ana nuavaina

David i girumi

- ¹ Orau taputapunei BADA ana voepaepai.
 Wavana vivivireina ana voepaepai.
- ² Orau taputapunei BADA ana voepaepai,

- kaua aiaii i kauē aubaiu eġa nuanuau ina vuru.
- ³ Au ġo'apoapoe anatapui e notanota-tawaneī,
ma doria awarineī e vivilawaniu.
- ⁴ Ata iraġe ma i sinaepaiu
ma nuavaineī ma raunuapoapoeleī e vivigulaueu.
- ⁵ Au lawana au anatapuna
purapura aiaii avai i verevereu, au vilaraga marana i raviravivouni me
*manubada.
- ⁶ BADA ana kaua anatapuna jijimanina.
- ⁷ Ana oga Moses i viatataiei,
ma mai Israel BADA ana kaua vivirewapanai i 'nanai.
- ⁸ BADA raraunuapoapoena ma ivina aiaina,
Eġa laġilaġina amlona ita voġaiġai. Ana nuavaina maemae-nonoana.
- ⁹ Eġa mara nonoa ina enita,
ma ana amloġaiġai eġa ita mamae-nonoa.
- ¹⁰ Anina da ita kovaġa-kaueta,
wate i raunu'apoapoeleta da kovoġa eġa ġaeġaena ita verevereta.
- ¹¹ Dobu weka ma mara nore au tepadewadewana.
Nanare, BADA ana nuavaina i rata guratana tauī da BADA e vivivirei
awarii.
- ¹² Mepa madeġa e gogogolana da mepa e ġaiġairalana, lamna uama,
ma nanare ata ġo'apoapoe vinimalana e vaivaitawana-naiei aueia.
- ¹³ Me ama natunatuna e rarau-nuapoapoeleī,
nanare BADA natunatuna e rarau-nuapoapoeleī.
- ¹⁴ Aubaina i aramaneī da tauta pokaueī i kaueta.
- ¹⁵ Ata mara au dobu lamna me modu.
Ta gogogo ma ta rarata me berana modueī;
- ¹⁶ Anina ma ive i uvena-kapupueī,
eġa ita mamae, ana gabu i kwakwava.
- ¹⁷ Tauī da BADA e voepaepai ana nuavaina maemae-nonoana
awarii ma nanare noinoī ma ai epaepaia awarii
- ¹⁸ tauī aiavoi da ana parivainuāġana bagibagina e vovojijini
ma ana patupatutui tarawatu e vovojijini.
- ¹⁹ BADA ana vigulau anikialana au mara i terei,
ma kampa ana vigulau e vivibadeī.
- ²⁰ BADA ana anela, vivirewapanami,
BADA riwana o rarautaniġaneī ma o kaukaueī,
BADA ona voepaepai.
- ²¹ Anina BADA ana anela mareī,
BADA ona voepaepai taumi ana taunola ma ana ġoana anatapuna
o kaukaueī.
- ²² Taumi anatapumi BADA uraneī i kauē, ana au vigulau maemaeī, BADA
ona voepaepai.
Tau nanare orau taputapuneī BADA ana voepaepai.

110

Gulauna vinevinena

David ana wela

¹ ☆ BADA au bada wenanare i riwei,

* **103:5:** Manubada tawarana waduboi e peupeu ma voui e gogogo. Me manubada tawarana voui e gogogo nanare tam au lawana e raviravivouni. ☆ **110:1:** Mrk 12:36; Act 2:34-35

- “Au oieu ma kiala
da am ġavia
au ae karem ana terei da ma tuvaídoedoei.”
- ² BADA, am gabemani vivirewapanana Zion * ana parata ina viratai,
da am ġavia ma vibadei.
- ³ Am laraga ana nuaii ina verena-melei da ina visorodia,
ma ona ġae BADA ana ola au tepana viġavia aubaina,
ma ami rewapana ina ravivouni ubaubanai patapatana me ubaubanai
turuvanina.
- ⁴ BADA i parivainuaġanim ma eġa nuanuana ina virai;
“Tam piriši maemae nonoana me Melkisedek.”
- ⁵ BADA au oiem e maimairi da e paipainim;
tauna gulagulau ina piaġi maranai amlona ina ġaiġai.
- ⁶ Dobu nununai ai ġoa apoapoe ina kovoġi,
ma taubeu dobuna ina vioai
ma dobu gulagulau anatapui kolai ina viaigwadagwada.
- ⁷ Wate au etanai au vuvura ina uma
ma rewapana ina verei ma ina vovaiuba.

119

BADA ana tarawatu boruborumana

- ⁹ Rava vouna menanare lawana aiaina ina maeni?
Tauna riwamei ina paina-melei.
- ¹⁰ Lamna aubaina a baibaie orau taputapunei;
eġa ma votereu da riwam ana geduaiei.
- ¹¹ Riwam a iaiavi ma au nuanuau a tereterei,
da eġa ġo'apoapoei awarim ana kauai.
- ¹² BADA, a voepaepaim!
Am tarawatu ma viararamaniu.
- ¹³ Ipiriuei ana bababani ma
am tarawatu anatapui u vereverei ana jime.
- ¹⁴ Am tarawatu votelatelana a vinuaiainana-kauai,
eġa me vipurapura bo vimane.
- ¹⁵ Riwam ana iavi
ma ana vinuanotenotei.
- ¹⁶ Am tarawatu a vinuaiaina-kauai,
eġa riwam ana voteretawanei.

139

Bada anatapuna i aramanei.

- David ana wela
- ¹ BADA orau u inanai ma au kaua anatapui u aramanei.
- ² U aramanei mara aiwai a kiala ma a vomairi.
Avena au uama wate au nota e araramanei.
- ³ E inainanai maranai a babara bo au numa a vililauvitau.
Anatapuna a kaukai e araramanei.
- ⁴ Muriai da ata babani tam e araramanei aiwai ana latoni.
- ⁵ Tam e garigari-kwaipipiniu,
ma uram virewapananei e paipainiu.
- ⁶ Lamna riwa kauana, awariu i aii kaua
ma i ġe-dewadewa da kolau i kwauna-kauai.
- ⁷ Mepa ana nae da Aruam ana raugovaġei?

* 110:2: Jerusalem wavana ġelauna.

- Mepa ana ruba da ana raugovaḡem?
- ⁸ Ata ḡae au mara da tam kampa;
mepa da i 'rairaḡei ai au dobu ata rauviraiu, tam kampa.
- ⁹ Mepa da ana lave nae au maramatanei,
bo mepa madeḡa e neneulai,
- ¹⁰ avena kampa ma uram ina raveniu,
ma am rewapana ina painiu.
- ¹¹ Mepa da ana riwa, "Gimtona ina tereḡovaḡiu
ma lalalaina ina gimtona."
- ¹² Wate avena da gimtonana amapo eḡa ana raugovaḡem.
Tam awarim gimtona ina rarana me marai, aubaina tam awarim
gimtona ma lalalaina lamna tagogina.
- ¹³ Tam tupuau anatapuna u voai da alou au manawana u teretagogieu.
- ¹⁴ A viviegualauem aubaina tam am nuavainei ma am borumei u voa-
kaueu! Am rauḡaroḡaro i aii,
A voepaepaim aubaina a aramana-kauei.
- ¹⁵ Tam u vivineneḡaneu maranai a tuputupua au govagovaḡana, alou au
manawana,
tam ainelam anatapuna u aramanei.
- ¹⁶ Tam u inanaiu muriai da a tupua.
Aupom biaḡa u vereu da ana mae
lamna au buka u girumi,
muriat da aupom naona i ḡotai.
- ¹⁷ God! I piripiri guratana da am nota ana aramanei.
Am nota kolau i kwauni, eḡa aiwai ḡelaunei am kaua ana aramanei.
- ¹⁸ I maḡa guratana eḡa me bubu, iavana ana kauana-avei,
avena da ata iava-pai, tau amapo da tam ana vivinuanainem.
- ¹⁹ Oo God! A ḡoei da ḡo'apoapoei ravai uta viraḡeni.
Taufiraḡena uta viaḡaḡei da eḡa ina nei awariu.
- ²⁰ Aubaina e vivijiboḡim,
ma wavam eḡa ita vivivirei.
- ²¹ BADA, rava e gedugeduaiem, tau ravai a gedugeduaiei.
Tau i eḡa ita voteletelem lamna aubaina tau i au ḡavia.
- ²² Tau i a geduaiana-kauei,
anina tau i au ḡavia.
- ²³ Ma tuvirevireu, ma orau ma inana-pai.
Ma raudadaniu da nuanuau ma aramanei.
- ²⁴ Mepa da ḡoa apoapoe au orau, ma viatataieu,
ma ma raveniu etanai e nenaie au lawana maemae-nonoana awarina.